



Հայկական գիտահետազոտական հանգույց Armenian Research & Academic Repository



Սույն աշխատանքն արտոնագրված է «Ստեղծագործական համայնքներ
ոչ առևտրային իրավասություն 3.0» արտոնագրով

**This work is licensed under a Creative Commons Attribution-NonCommercial
3.0 Unported (CC BY-NC 3.0) license.**

Դու կարող ես.

պատճենել և տարածել նյութը ցանկացած ձևաչափով կամ կրիչով
ձևափոխել կամ օգտագործել առկա նյութը ստեղծելու համար նորը

You are free to:

Share — copy and redistribute the material in any medium or format

Adapt — remix, transform, and build upon the material

УДРГА

52

5
103



2 0 02'

110 ms.

ՍԵՐԵԲ

52

ՍՐԲՈՅՆ

Ա.Ի.Գ.ՈՍՏԻՆԵԱՅ

ՀԻՊՊՈՆԱՅ ՀԱՅՐԱՊԵՏԻ

Ս.ՈՒՍՆՁՆԱԽՕՍՈՒԹԻԻՆՔ

ԵՒ

Ս.ՈՒՉԵՌԻՆԱԿԱՆ

70



ՎԵՆԵՏԻԿ

Ի ՎԱՆՍ ՍՐԲՈՅՆ ՂԱԶԱՐՈՒ

1838

1988


23175

ՀԱՅԿԱՍՏԱՆԻ ԳՐԱԳԻՏՈՒԹՅԱՆ
ԿԵՆՏՐԱԿԱԼ ԳՐԱԳԻՏՈՒԹՅԱՆ
ՍՕՑԻԱԼԻՍՏԻԿԱՆ ԹՐԱՆՍԴՈՒՄԻ

Ի ՅԻՇԱՏԱԿ ՀՈԳԻՈՅ

Տ Ի Կ Ն Ո Ջ Մ Ա Ր Ի Ա Մ Ո Ի

ՍՕՑԵԱԼԻՍՏԱՆ ԹՐԱՆՍԴՈՒՄ



1851

(4860
41)

52-2002


Յ Ա Ռ Ա Ջ Ա Բ Ա Ն

Թարգմանն սրտի սրբոյն Գրիգորի
Նարեկացոյ՝ զսուրբն Աւգոստինոս
Հիպպոնայ հայրապետ՝ թուի մեզ կար
ծել, և զմերոյ հոգերգողին զբանս՝
Թարգմանն սրտին Աւգոստինեայ: Ձի
թէպէտ յառաջ էր դարուք հնգե
քումքք Աւգոստինոս քան զմերս Նա
րեկացի, այլ որպէս թէ հոգևով ըն
թերցեալ զհոգի նորա՝ զնորին խորու
թիւն յայտնաբանեաց՝ ի խորին պար
զութեան իւրում, և Նարեկացին՝ որոյ
չէր տեսեալ զգիրս Աւգոստինոսի՝ ըզ

նորայն հոգի եբեր յանձին: Քանզի
մի և նոյն աղբիւր սիրոյ՝ հոգի Աստու-
ծոյ յերկոսին տալաւորեաց զնոյն սէր,
զնոյն հաստելով սիրտ հրաբորբոք յեր-
կոսեան, կենդանախարուկեալ սիրովն
Աստուծոյ: Ընթերցիր սիրով զերկո-
սին՝ ի սրտի, և ժառանգ լեր մի և նոյն
սիրոյ, որ անթարգմանելին է, բայց
խմանալի, ցանկալի և ժառանգելի:

Նորին սիրաբուն սրտի է սեպհա-
կան՝ ոճ կրկնութեան անդադար՝ նմա-
նաւոր կարծեցեալ բառից և բանից,
որպէս ՚ի Նարեկն, նոյնպէս և ՚ի սլի-
տառութիւնս Աւգոստինոսի. թո՛ղ ըզ-
հանգամանս բարբառոյ՝ զոր գրիչն բա-
ցադրէ իբրև թարգման լեզուի քան
սրտի. իսկ ձև կրկնութեանն է պար-
զապէս թարգման սրտի. զորոյ զթանձր
օրինակս զօր ամենայն տեսանես ՚ի խօ-
սել մարդկան զառաւել սիրելեաց և
զկարի ախորժեկեաց. զի կրկնեն և ե-

մեքինեն և չորեքինեն զբանս քաղցրու-
թեան կամ գովութեան, ևս առաւել
կարօտութեան. և ոչ յագին՝ բայց ան-
յագութեամբ: Յանկալի է մեզ՝ որպէս
և հոգեսիրի Առն տպագրութեան գրոցս
փափաքողի, զի որ ընթեռնուն զմատե-
նիկս զայս աղօթից՝ առնուցուն փոքր
ի շատէ զքաղցրութիւն սիրոյն Աս-
տուծոյ:



Գ Ի Ր Ք


ԱՌԱՆՁՆԱԽՕՍՈՒԹԵԱՆՑ





N° 689

Bernard Lebel Ed. Imp. Paris




Գ Ի Ր Ք

ԱՌԱՆՁՆԱԽՕՍՈՒԹԵԱՆՑ

ՀՈԳԻՈՅ

ԸՆԴ ԱՍՏՈՒԾՈՅ



ԳԼՈՒԽ Ա.

Յաղագս անպատու՛մ քաղցրու-
քեանն Աստուծոյ .

Ա. Ծանեայց զքեզ տէր՝ սրտագէտ
իմ . ծանեայց զքեզ զօրութիւն հոգւոյ
իմոյ : Յոյց ինձ զքեզ մխիթարիչ իմ ,
տեսից զքեզ լոյս աչաց իմոց : Մատիր
առ իս խնդութիւն հոգւոյ իմոյ . տե-
սից զքեզ ուրախութիւն սրտի իմոյ :
Սիրեցից զքեզ կենդանութիւն հոգւոյ
իմոյ : Երևեաց ինձ՝ խնդութիւն իմ մեծ
և սփոփութիւն տէր Աստուած իմ .

կեանք իմ և փառք հոգւոյ իմոյ : Գաից
զքեզ ցանկուծիւն սրտի իմոյ , փարե-
ցայց զքե սէր անձին իմոյ : Գիրկս ար-
կից քեզ փեսայ երկնաւոր՝ ցնծուծիւն
իմ պատարուն ներքոյ և արտաքոյ :
Ժառանգեցից զքեզ յաւերժ երանու-
ծիւն , ժառանգեցից զքեզ ՚ի սրտի ի-
մում , կեանք երանաւէտ , անուշակ
քաղցրուծիւն անձին իմոյ : Սիրեցից
զքեզ տէր զօրուծիւն իմ , տէր ամ-
բուծիւն իմ , ապաւէն իմ և փրկիչ
իմ : Սիրեցից զքեզ Աստուած իմ , օգ-
նական իմ , աշտարակ զօրուծեան ի-
մոյ՝ և յոյս իմ զուարթարար յամենայն
՚ի վիշտս իմ : Ի քեզ միացայց ՚ի բա-
րուջդ եղելում , զի բաց ՚ի քէն չիք ու-
րէք բարի . ՚ի քեզ յամենաբաւդ ճո-
խացայց . զի բաց ՚ի քէն չիք ինչ բա-
ւական : Բաց զախեալ մուտս լսելեաց
իմոց՝ հատու բանիւդ քան զամենայն
սուր երկսայրի՝ լսել ինձ զբանս քո :
Որոտա տէր յերկնից ահագին և բար-
ձրագոչ ձայնիւ : Խուովեսցի ծով և լրու-
ծիւն նորա . շարժեսցի երկիր , և ո՛ր
՚ի նմա բովանդակ :

Բ. Լուսաւորեա զաչս իմ լոյսդ անս
 պարագիւր՝ փայլեա զփայլատակունս քո
 և ցրուեա զնոսս՝ զի մի տեսցեն զնանս
 բուժիւն : Շանթեա և խռովեա զնոս
 սա, երևեսցին աղբերք ջուրց. և յայտ
 նեսցին հիմունք տիեզերաց : Տուր զօ
 բուժիւնս աչաց իմոց լոյսդ անտեսա
 նելի՝ զի տեսից զքեզ : Նորաստեղծեա
 ինձ հոտոտելիս՝ հոտ կենաց, որ զհեա
 քո՝ ի հոտ իւզոց ընթանայցէ : Բժըշ
 կեա զքիմս իմ գիտել և խելամուտ
 լինել և տեսանել որչափ զեղուն է քաղ
 ցրուժիւնս քոյ տէր՝ զոր պահեցեր
 որոց լցեալ են սիրով քով : Շնոր
 հեա ինձ սիրտ ի խորհել զքեզ. և հո
 գի սիրել զքեզ. միտս՝ որ ցանգ առ
 քեզ կանխեսցէ. իմացուն՝ որ զքեզ ի
 միտ առնուցու միշտ, ի քեզ յարեսցի
 անապակ զուարճութեամբ : Նա և սէր
 իմաստուն՝ որ անդուլ զքեզ սիրեսցէ :
 Ա՛վ կեանք՝ որում կեանս ամենեքեանս,
 որ կեանս շնորհէ ինձ. կենդանութիւնս
 իմ, որով կեամս, և առանց նորա մե
 ռանիմ. կեանք որով յառնեմ, և ա
 ռանց նորա կորնչիմ, կեանք՝ յոր իւրն

դամ, և առանց նորա տազնապիմ :
 Կեանք կենդանատու, քաղցր և սիրե-
 լի և անմոռաց. խնդրեմ զքեզ, ո՛ւր ես :
 Ո՛ւր գտից զքեզ. զի առ յինէն նուա-
 զեալ 'ի քեզ հաստատեցայց : Մերձ
 կաց առ հոգւոջ իմում. մօտ առ սրբ-
 տիս. հուսի բերանոյս, և ականջացս,
 կանխեա ինձ յօգնութիւն. զի սիրով
 քոյ թալկանամ, զի առանց քո մեռա-
 նիմ, և յառնեմ երկրպագեալ քեզ :
 Հոտ քո զիս բժշկէ, յիշատակ քո ա-
 պաքինէ զիս. բայց ես յագեցայց յե-
 րևել փառաց քոց կենդանութիւն հո-
 գւոյ իմոյ : Յանկայ և նուաղէ անձն
 իմ ընդ յիշատակ քոյ. երբ եկից և
 երևեցայց քեզ խնդութիւն իմ :

Գ. Ընդէր դարձուցանես զերեսս
 քո՝ ցնծութիւն իմ յոր զուարճանամ :
 Ո՛ւր թագչիս ով գեղեցիկդ՝ որում
 փափաքեմ : Ի զմայլեալ հոտ քո կեն-
 դանի մնամ և ցնծամ. այլ զքեզ ոչ
 տեսանեմ : Զձայն քո լսեմ և կենդա-
 նանամ. սակայն զմէ՞ ծածկես զերեսս
 քո : Ասես ապաքէն՝ ոչ տեսանէ զիս
 մարդ՝ և ապրի. անէ տէր, մեռայց գէթ

զքեզ տեսից • տեսից և մեռայց աստա-
 նօր : Ոչ խնդրեմ կեալ , մեռանել փա-
 փաքիմ • ցանկամ լուծանիլ և ընդ
 Քրիստոսի լինել : Անձկանօք մնամ
 մահու՝ զի տեսից զՔրիստոս • հրաժա-
 րիմ 'ի կենաց զի կեցից ընդ Քրիստո-
 սի : Ո՛վ տէր Յիսուս ընկալ զհոգի իմ •
 կեանք իմ ընկալ զանձն իմ • ցնծու
 թիւն անձին իմոյ ձգեա առ քեզ ըզ-
 սիրտ իմ : Վերակուր իմ քաղցր , ճա-
 շակեցից զքեզ : Գլուխ իմ ուղղեա զիս •
 լոյս աչաց իմոց՝ լուսաւորեա զիս • ան-
 մահու թեան նուազ՝ զիս ներգաշնա-
 կեա : Բուրումն անուշահոտ՝ կենդանա-
 ցո զիս : Բանդ Աստուծոյ՝ նորաստեղ-
 ծեա զիս : Բարեբանեալդ՝ ուրախացո
 զհոգի ծառայի քոյ • մուտ 'ի սա ցնծու-
 թիւն իմ , զի ցնծասցէ 'ի քեզ • մուտ 'ի
 սա լիասպասար , զի քաղցրասցի խոր-
 հուրդ սորա : Լոյսդ յաւետախաղաց
 փայլեա 'ի սա զլոյս քո՝ 'ի միտ առ-
 նուլ զքեզ , ճանաչել և սիրել : Եւ վասն
 այնր ոչ սիրէ զքեզ տէր , զի ոչ ճանա-
 չէ զքեզ • և ճանաչէ իսկ ոչ , զի ոչ 'ի
 միտ առնու • իսկ զբանէ 'ի միտ առնուլ՝

զի զլոյս քո ոչ ընդունի . լոյսն 'ի խա-
լարի ծագէ , և խաւարն նմա ոչ լինի
հասու :

Դ . Ո՛վ լոյս մտաց , ո՛վ լուսահրաշ
ճշմարտութիւն . ո՛վ իսկաճեմ սրայծա-
ւութիւն՝ որ լուսաւորէ զամենայն
մարդ որ գայ յաշխարհ : Զեկեալն յաշ-
խարհս՝ այլ ոչ և զպարաւանդն 'ի սէր
նորա . քանզի որ սիրէ զաշխարհ՝ խի-
զախէ թշնամի Աստուծոյ : Ի բաց մեր-
ժեա զխաւար յանդնդոց մտաց խմոց .
զի տեսցէ զքեզ խելամտութեամբ , զի
ծանիցէ զքեզ բովանդակութեամբ , սի-
րեսցէ զքեզ ծանօթաբար : Զի որ միան-
գամ ծանեաւ զքեզ՝ նա 'ի քեզ յարի ,
և զանձն իւր մոռանայ . առաւել քան
զանձն սիրէ զքեզ . զանց արարեալ
զանձամբ՝ առ քեզ հասանէ զմայլել 'ի
քեզ : Յաղագս այսորիկ տէր՝ ոչ ըստ
չափուն սարտուցս բաւականութեան
սիրեմ զքեզ . զի ոչ լի բովանդակ ճա-
նաչեմ զքեզ . այլ զի ընդ աղօտ նկա-
տեմ 'ի քեզ , և սէր իմ առ քեզ թերի
է . վասն այնր և խնդութիւնս 'ի քեզ
նիազ : Այլ 'ի քէն 'ի ճշմարիտ ներ-

քին խնդուլթենէդ 'ի բաց անջատեալ՝
արտաքնովքս 'ի վերջանալս առ 'ի քէն՝
ակն գնեմ արտաքնովքս ստապատիր
բարեկամութեանց : Եւ այսպէս հիգա-
ցեալ գտայ , քանզի զոր արժանն էր
ինձ զսիրտ իմ բովանդակ սիրով և ըղ-
ձիւ քեզ միայնոյ պատարագել , 'ի սնու-
տիս անճնատուր եղէ . և վասն այնր
ունայնացայ , զի զունայնութիւն սի-
րեցի :

Այսր աղագաւ ոչ խնդամ տէր 'ի
քեզ , և ոչ 'ի քեզ միանամ , զի ես յար-
տաքինս անդ և դու 'ի ներքինս . ես
յառժամանակեայս և դու յաստուա-
ծեղէնս , ես 'ի դիւրեղծականս շաղեալ
գնիմ խորհրդով , տատանիմ լեզուաւ ,
և դու տէր 'ի յաւիտենականս բնակես
և ինքն յաւիտենականութիւն ես . դու
յերկինս՝ ես յերկրի . դու զբարձունս
սիրես՝ ես զստորինս . դու զերկնաւորս՝
եւ զերկրաւորս . և երբ իցէ ներհակա-
նացս միաբանութիւն :

Գ Լ Ո Ւ Խ Բ .

Յաղագսս բշտառոտքեան և տկարոտքեան մարդկան .

Ա . Եղուկ եմ՝ ես , իցէ՛ թէ թիւրու թիւնս իմ՝ ՚ի քո ճշմարտութիւնդ օրինակեսցի , ՚ի հաւասարութիւն : Գուտէր ցանկաս առանձնութե՛ , ես խուռն բազմութեան . դու լուութեան՝ ես ամբոխի . դու ճշմարտութեան՝ ես ունայնութեան . դու խնդրես զսրբութիւն , և ես զպղծութիւն : Զի՞ ևս տէր : Գու իսկութեամբ բարի , և ես չար . դու բարեգութ , և ես անբարիչա . դու սուրբ՝ և ես տառապեալ , դու արդար և ես անիրաւ : Գու լոյս ես , և ես կոյր . դու կենդանութիւն և ես մեռելութիւն . դու դեղ դարմանոյ՝ իսկ ես ախտացեալ . դու խնդութիւն՝ և ես տրտմութիւն : Գու ամենեին ճշմարտութիւն , և ես բովանդակ ունայնութիւն , որպէս և ամենայն մարդ

կենդանի : Այն ինձ , զինչ այլ ևս ա-
սացից ով արարչագործ տէր . մատոռ
զուսկն քո արարիչ : Արարած եմ քո՝
ևահա կորնչիմ . ստեղծուած եմ քո , և
արդ աւանիկ մեռանիմ . հրաշակերտ
եմ քո . արդ փոքր մի ևս 'ի հող դառ-
նամ . գործած եմ քո . ձեռք քո տէր
արարին և ստեղծին զիս . ձեռք՝ որ հե-
ղուսեալ բևեռօք վասն իմ . զգործս ձե-
ռաց քոց մի անտես առներ . աղաչեմ՝
հայեաց 'ի վերս ձեռաց քոց : Ահա տէր
'ի վերայ ձեռաց քոց նկարեցեր զիս .
'ի դոյն ակնարկեա և փրկեա զիս : Առ-
քեզ կարդամ , զի ստեղծուած եմ
քո . ստեղծող ես՝ նորոգեա զիս : Առ-
քեզ գոչեմ , զի քո արարած եմ . կեն-
դանարար ես , կենագործեա զիս : Այն-
րակարդամ առ քեզ , զի հրաշակերտ
եմ ձեռին քո . արարիչ ես , դու զօ-
րացո զիս : Խնայեա յիս տէր՝ զի չեն
ինչ աւուրք կենաց իմոց :

Բ . Ձինչ է մարդ՝ զի կարասցէ խօ-
սել ընդ քեզ ընդ տեառն արարչի իւ-
րոյ : Խնայեա յիս՝ որ սկիզբն կալայ
խօսել ընդ քեզ : Թող ծառայի քում՝

որ համարձակ բարբառել ընդ տեառ-
 նրդ : Հարկի չկան օրէնք : Տան-
 ջանք իմ բուռն առնեն ինձ բարբա-
 րել . տազնապս որ վշտագնէ զիս տայ
 ինձ աղաղակել : Հարեալ եմ ախտիւք՝
 առ բժիշկդ պաղատիմ . կոյր եմ՝ առ
 լոյսդ ճեպեմ . մեռեալ եմ՝ առ բաշխողդ
 կենդանութեան կարդամ : Դու բժիշկ
 ես , դու լոյս , դու ինքն կենդանարար
 Յիսուս նազովրեցի՝ ողորմեա ինձ . որ-
 դի Դաւթի ողորմեա ինձ՝ աղբիւր ո-
 ղորմութեան : Լուր՝ զոր առ քեզ կար-
 դայ հիւանդն տկարացեալն : Լոյսդ որ
 անցանես՝ նայեաց ՚ի կոյրս . ձգեա նմա
 զձեռն քո զի առ քեզ եկեսցէ , և լու-
 սով քով զլոյս տեսցէ : Վեանք կենդա-
 նի՝ կենդանացո զմեռեալս : Զի՞նչ եմ
 ես՝ զի ընդ քեզ խօսեցայց : Վայ ինձ
 տէր , ինայեա յիս տէր : Դիակն եմ
 նեխեալ , կերակուր որդանց , անօթ
 գարշութեան , և ճարակ հրոյ : Զի՞նչ
 եմ ես՝ զի ընդ քեզ խօսեցայց . վայ
 ինձ տէր , ինայեա յիս տէր : Մարդ
 եմ մեղաւոր՝ կանանցածին սակաւա-
 կեաց , և նշաւակ աղետից բաղմաց .

մարդ սնուտի , հաւասարեալ անասնոց
անբանից և նմանեալ նոցա :

Գ . Դարձեալ , զինչ իցեմ ես : Ան-
դունգք խաւարին , երկիր աղետից , որ-
դի բարկութեան . անօթ արհամար-
հութեան . ծնեալ մեղօք , կեցեալ 'ի
վիշտս , և տառասանօք հասեալ 'ի մահ :
Եղճեմ զիս , զինչ եմ ես , զինչ լի-
նեւոց եմ ես : Անօթ աղբեաց և փոռ-
թեան , լցեալ սղծութեամբ և դար-
շութեամբ . կոյր , աղքատ , մերկ , բազ-
մաց պիտոյից կարօտեալ , մոռացեալ
զէլ և զմուտ իմ , ողորմ կերպարան և
ապականացու : Աւուրք իմ որպէս հո-
վանի անցանէն , և կեանք իմ իբրև զըս-
տուեր լուսնի նուազէ . աճէ որպէս
ծաղիկ 'ի ծառս' և երագ թառամի ,
ծաղկէ' և անգէն առ նմին դօսանայ :
Վեանքս իմ՝ զազիազիուն և դիւրեղ-
ծական . որ որչափ աճէ՝ այնչափ և
նուազէ , և որչափ յառաջադէմ խա-
ղայ՝ նոյնչափ և առ դրամբք մահու զե-
գերի : Վեանք դիւրապատիր և ստուե-
րատեսակ , լարեալ որոգայթիւք մա-
հու : Մինչդեռ տրամուծիւն ունի զիս ,

մինչդեռ հզօր եմ, և ահա վհատիմ. այն
 ինչ կենդանի եմ, և մօտ նմին մեռանիմ.
 մերթ երջանկացեալ, և մերթ հիգա-
 ցեալ. մերթ ծիծաղիմ, և մերթ լամ:
 Ահա զայսօրինակ ամենայն ինչ յեղա-
 փոխ է. զի և ոչինչ ընդ մի ժամ ընդ
 միով մնայ կերպարանաւ: Չհետ գայ
 զայսոցիկ մահ գժնդակ, որ բազմադէմ
 օրինակօք զօրհանապաղ յեղակարծում
 յափշտակէ զմարդիկ անապաւէն: Չսա
 ջերմամբ սպանանէ. զնորա ցաւովք
 զոգիսն կորզէ. զոմն սով սպառէ. զայլ
 ոք ծարաւ սպապակէ. է զի 'ի ջուր ըն-
 կրղմէ. է զի յորոգայթս կորուսանէ.
 զորս հրով ծախէ, և զորս ընդ ժանեօք
 գազանաց գիշատէ: Չսա սրով խող-
 խողէ. զնա մահուն արբուցմամբ վա-
 րակէ. և զայլ ոք՝ յեղակարծ սասա-
 նութեամբ ցանկացուցանէ վճարել
 զկենցաղս աղցաւոր: Եւ արդ 'ի մէջ
 այս ամենայն դառն ալեախից՝ ուր չեք
 ինչ հաւաստի քան զմահ, մոռացօնք
 լինի մարդոյ վախճան նորա: Եւ մինչ-
 դեռ հաստատուն համարէր կալ, զար-
 կուցեալ և կորնչի յոյս նորա: Զի

ոչ գիտէ մարդ՝ երբ, կամ ո՞ւր, կամ
 ո՞րպէս մեռանիցի. սակայն քաջայայտ
 է զի մեռանել անշուշտ է :

Դ. Ով տէր, զիւրդ մեծ է թշուա-
 ռութիւն մարդկան, յորում կամս և ոչ
 զանգիտեմ. ո՞րպէս դառն է տագնապս՝
 յորմէ տառասլիմ, և ինձ ոչ ցաւէ, և
 ոչ ձայն արկեալ գոչեմ առ քեզ : Զքեզ
 կարդացից տէր՝ մինչև անցեալ իցեմ
 ըստ կեանս, զի թերևս առանց անցա-
 նելոյ առ քեզ մնացից : Արդ ասացից,
 պատմեցից զաղէտս իմ, խոստովանե-
 ղէց և ոչ ամօթ համարեցայց առաջի
 քո զտառասպանս իմ : Օգնեա ինձ զօ-
 րութիւն իմ որով բարձրանամ. հաս
 ինձ յօգնութիւն՝ որով զօրանամ. մա-
 տիր առ իս լոյսդ՝ որով տեսանեմ. ե-
 ըրևեաց փառքդ՝ որով ցնծամ. երևեաց
 աղբիւր կենդանութեան յորում կեամ,
 ո՞վ տէր Աստուած իմ :

Գ Լ Ո Ւ Խ Գ .

Յադագսս սքսւնչեղի սաստուածեղեկ
լուսոյ .

Ա . Ո՛վ լոյս՝ զոր տեսանէրն Տով-
բիթ՝ երբ աչօքն վիակելովք ուսուցա-
նէր որդւոյն զճանապարհն կենաց :
Լոյս՝ զոր Իսահակ տեսանէր հոգւով,
երբ 'ի խաւարել աչացն առ արտաքս՝
պատմէր որդւոյն զհանդերձեալն : Լոյս
անտեսանելի, որում բացերև են դաղտ-
նիք սրտից մարդկան : Լոյս զոր տեսա-
նէր Յակովբ, յորժամ ըստ քոյին հո-
գեղէն ազդեցու թեանդ նախապատմէր
որդւոց իւրոց զգալոցսն : Ահա խաւար
թանձրանայ զանդնդօք մտաց խնոց .
դու լոյս ես : Ահա մառախուղս աղջա-
մըղջին մածեալ կայ 'ի վերայ ջուրց
սրտի իմոյ . դու ինքն ճշմարտութիւն
ես :

Բ . Ո՛վ Բանդ, որով ամենայն ինչ
եղև . և առանց քո եղև և ոչինչ : Նա-

խայաւիտեան Բանդ, և չիք ինչ կան-
խադոյն քան զքեզ: Ամենաբաւական
Բան, առանց քո ոչինչ են ամենայն ե-
ղականք: Բանդ՝ որ ասացեր 'ի սկըզ-
բանն, եղիցի լոյս՝ և եղև լոյս: Ասա-
արդ և ընդ իս. եղիցի լոյս. և բանքդ
արդիւնք եղիցին. տեսից զլոյս և ծա-
նեայց՝ զոր ինչ չէ լոյս. զի առանց քո
խաւարն 'ի լոյս դառնայ ինձ, և լոյսն
'ի խաւար: Առանց լուսոյդ չիք ճշմար-
տութիւն, անդ խաւար և անդ ունայ-
նութիւն. չիք յստակ տեսութիւն,
այլ բովանդակ խառնիխուռն. անդ
տգիտութիւն, և չիք գիտութիւն. անդ
կուրութիւն, և ոչ գոյ տեսութիւն.
անդ անկոխ ճանապարհք, և ոչ արա-
հետ. անդ մահ՝ և ոչ կեանք:

ԳԼՈՒԽ Դ .

Յադագս մահկանացու բնութեան
մարդկան .

Ա . Աւասիկ տէր՝ զի լոյս ոչ գոյ ,
մօտ նմին հասեալ կայ մահ . նա՛ և ոչ
մահ , զի ոչ ինչ իսկ է մահ : Զի նովին
յոչէութիւն դառնամք , քանզի բնաւ
երբէք ոչ երկնչիմք 'ի մեղանչելոյ : Եւ
արդարև տէր , զի արժանի որոց գոր-
ծեցաք ընդունիմք յորժամ 'ի չիք լինի-
ցիմք՝ իբրև զջուր որ հեղու . զի առանց
քո եղև և ոչ ինչ . և մեր՝ զոր ոչ էն
գործելով՝ ոչ ինչ լինիմք , զի առանց
քո ոչ ինչ եմք , որով եղև ամենայն , և
առանց նորա եղև և ոչ ինչ : Ո՛վ տէր ,
ո՛վ Աստուած Բան որով ամենայն ինչ
եղև , և առանց նորա ոչ ինչ կերպա-
ցաւ : Վայ ինձ հէգ և կուրացեալ առն ,
զի դու լոյս ես , և ես չեմ առ քե . վայ
ինձ հէգ և կարեվէր առն . զի դու փրկ-
կութիւն ես , և ես տարամերժեալ առ


'ի քէն : Աւանդ ինձ հէգ և միշտ մտա-
խաբ անն , զի դու ճշմարտութիւն ես ,
և ես անջատեալ առ 'ի քէն : Աւանդ
ինձ հէգ և մոլորական անն , զի դու
ճանապարհ ես , և ես հեռացեալ առ
'ի քէն : Այն ինձ հէգ և մեռեալ անձն .
զի դու կեանք ես՝ և ես առանց քո :
Այն ինձ հէգ և չքացեալ անձն , զի
դու թան ես՝ որով ամենայն ինչ եղև .
և ես մեկնեալ առ 'ի քէն՝ առանց որոյ
եղև և ոչ ինչ :

Բ. Ո՛վ տէր Թան , ո՛վ Աստուած
Թան , որ լոյս ես՝ և որով եղև լոյս . որ
ճանապարհդ ես , ճշմարտութիւն և
կեանք՝ յորում չիք խաւար , ոչ զար-
տուղի սխալ . ոչ ունայնութիւն և ոչ
մահ : Լոյս՝ աւանիկ առանց քո խաւար
է . ճանապարհդ՝ և առանց քո զարտու-
ղի մոլորութիւն է . ճշմարտութիւնդ՝
և առանց քո ընդունայնութիւն է . կեն-
դանութիւն՝ և առանց քո մահ է : Ասա
Թանդ , եղիցի լոյս , զի տեսից զլոյս և
զգուշացայ 'ի խաւարէն . տեսից զճա-
նապարհդ՝ և 'ի բոց կացից յանկոխ
վայրաց . տեսից զճշմարտութիւն՝ և

52-200

02

158
0985



անձնապահ էղէց յունայնութեանէ . տե-
սից զկեանս՝ և խուսեցից 'ի մահուանէ :
Ծագեա տէր զլոյս քո լոյս իմ՝ լուսաւո-
րութիւն իմ և փրկութիւն իմ , յորմէ
երկեայց տէր իմ , զոր բարեբանեցից
Աստուած իմ՝ զոր փառաւորեցից հայր
իմ՝ զոր սիրեցից փեսայդ իմ՝ որում
պահեցից զանձն իմ : Լուսաւորեա ծա-
գեա զլոյս քո 'ի կուրացեալս որ նստի
'ի խաւարի և 'ի ստուերս մահու , և
ուղղեա զոտս նորա 'ի ճանապարհս
խաղաղութեան . որով մտից 'ի վայրս
հրաշակերտս խորանին մինչև 'ի տունն
Աստուծոյ՝ 'ի ձայն ցնծութեան և խոս-
տովանութեան : Քանզի ճշմարիտ խոս-
տովանութիւն՝ ճանապարհ է մտանե-
լոյ 'ի քեզ 'ի ճանապարհդ , և ելանե-
լոյ յանկոխ վայրաց , և դառնալոյ առ
քեզ առ ճանապարհդ , զի դու ես ճշ-
մարիտ ճանապարհ կենաց :

ԳԼՈՒԽ Ե .

Չի՞նչ իցե յոչեռնոսիւնս դասնալ .

Ա . Խոստովանեղէց , խոստովանեղէց քեզ հայր , տէր երկնի և երկրի զցաւս իմ . զի մարթացայց հասանել ողորմութեան քում : Տառապեալ եմ ես և յոչեութիւնս խոնարհեալ , և ոչ գիտացի : Գու ճշմարտութիւնս ես և ես չէի ընդ քեզ . խոց լքին զիս անօրէնութիւնք իմ և ոչ ցաւէր ինձ . դու կեանք ես . և ես չէի առ քեզ : Ի չեք դարձուցին զիս , զի դու Բանս ես , և ես չէի ընդ քեզ . որով ամենայն ինչ եղև , և առանց քո եղև և ոչ ինչ . և վասն այնր առանց քո յոչ ինչ դարձայ , քանզի չեութիւնն է որ 'ի չեք փոխարկէ : Ամենայն ինչ Բանիւդ եղեն , որ ինչ և որ զինչ որպիսի : Ետես Աստուած զամենայն զոր արար՝ և ահա բարի են յոյժ : Ամենայն ինչ որ եղև՝ Բանիւնս եղև , և որ ինչ բանիւ եղեն բարի են յոյժ : Եւ

ընդէր՝ զի ամենայն ինչ Բանիւ եղև և
 առանց նորա եղև և ոչ ինչ՝ զի չեք ինչ
 բարի՝ առանց ծայրագոյն բարւոյ : Իսկ
 չար է՝ ուր չգուցէ ինչ բարի՝ և ահա
 ոչ ինչ է՝ զի այլ ոչ ինչ է չարն բայց
 եթէ պակասութիւն բարւոյն՝ որպէս
 ինչ և կուրութիւն չէ ինչ այլ՝ բայց
 պակասութիւն լուսոյ :

Բ. Արդ չարն չէ և չէ ինչ՝ զի եղև
 առանց Բանի, առանց որոյ եղև և ոչ
 ինչ : Եւ այն ապաքէն չար է՝ որ ան-
 բաժ է՝ ի բարւոյն որով եղև ամենայն
 որ զինչ եղև : Եւ որ ինչ ոչն է՝ ոչ եղև
 նովաւ, և յայն սակա չէ և ոչ ինչ : Չար
 են՝ զի եղեն իսկ ոչ. զի որ ինչ եղեն՝
 Բանիւ եղև, և ամենայնն բովանդակ
 բարի եղեն ՚ի ձեռն Բանին : Եւ քանզի
 ամենայն ինչ Բանիւ եղև՝ ապա չարն
 չեղև Բանիւ : Ապա որ ինչ ոչն եղև՝
 չէ բարի. զի ամենայն որ ինչ եղեն՝
 բարի է. և վասն այն՝ չար են, զի ոչն
 եղեն. ուստի և չեն ինչ. զի առանց Բա-
 նի եղև և ոչ ինչ : Չարն չէ ինչ՝ զի ոչ
 եղև. իսկ թէ ոչն եղև, զի արդ չար իցէ.
 զի առ չարն պակասութիւն բարւոյ է

որով որ եղևն՝ բարի եղև: Ապա առանց
 Բանին լինել՝ չար է. զի հուժիւն չէ.
 զի առանց նորա չէ և չէ ինչ: Այլ զինչ
 իցէ բաժանելն՝ ՚ի Բանէն:

Գ. Թէ զայդ գիտել խնդրես՝ լուր
 զինչ Բանն իցէ: Բանն Աստուծոյ ա-
 սէ. ես եմ՝ ճանապարհ ճշմարտութիւն
 և կեանք. իսկ բաժանել ՚ի Բանէն՝ է
 մնալ առանց ճանապարհի, առանց
 ճշմարտութեան և առանց կենաց. քան
 զի և առանց նորա չկայ ինչ. վասն որոյ
 և չար է. զի տարանջատի ՚ի Բանէն՝ ո-
 րով ամենայն ինչ բարի եղևն յոյժ: Իսկ
 տարամերժութիւն ՚ի Բանէն՝ որով ա-
 մենայն ինչ եղև՝ ոչ այլ ինչ է՝ բայց եթէ
 պակասել և յեղելութենէ յոչէութիւն
 գնալ. զի առանց նորա չէ և ոչ ինչ:
 Արդ որչափ ՚ի բարւոյն արտուղի գնաս՝
 ՚ի Բանէն ՚ի բաց քեցես զքեզ՝ զի նա
 ինքն է բարին. և յոչինչ դառնաս, զի
 հեռի կաս ՚ի Բանէն, առանց որոյ ոչ
 ինչ եղև: Եւ արդ տէր լոյս իմ, լու-
 սաւորեցեր զիս տեսանել զքեզ. տեսի
 և ծանեայ զքեզ: Զի ցորչափ ՚ի քէն
 հեռացայ՝ նոյնչափ և յոչէութիւն փո-

խեցայ . զի մոռացայ զքեզ ինքն զբարիդ , և վասն այնր 'ի չարիս զեղծայ :
 Վայ ինձ հիգացելուսն , զի ոչ գիտէի
 թէ յոչեուծիւն եղծանիմ 'ի թողուլս
 զքեզ : Այլ զի խնդրեմ ես . թէ ոչ ինչ
 էի՝ իւ հնարէի ճանաչել : Գիտեմք թէ
 չարն ոչ ինչ է . և որ ինչ չէ՝ նա եղեալ
 չէ . և որ ոչն է բարի՝ ոչ է , զի ոչ ինչ
 է : Արդ եթէ ես ընդ չեղեալս համարեցայ ,
 յորժամ առանց քո եղէ , իբրու ոչ ինչ
 եղէ , ըստ նմանութեան դրօշկոց ,
 որ ոչ ինչ իսկ են : Քանզի կան նոցա
 ականջք՝ այլ ոչ լսեն . ունչս ունին՝
 և ոչ հոտոտեն , աչս ունին՝ և ոչ տեսանեն .
 բերան ունին և ոչ խօսին . ձեռս
 ունին՝ և ոչ շօշափեն , ոտս ունին և ոչ
 գնան . և զամենայն զնմանութիւն ունին
 զանգամոց՝ այլ ոչ ինչ իմանան :

ԳԼՈՒԽ Զ .

Յադասգս գայրագիւերոյ հոգւոյն 'ի մեղս .

Ա . Եւ քանզի մնացի առանց քո , ոչ կացի յիս , այլ յոչէութիւն փոխեցայ . և յայն սակս կոյր էի՝ խուլ և անզգայ . որ ոչ զբարին տեսանէի , և ոչ 'ի չարէն խորչէի . ոչ 'ի միտ առնուի զկսկիծ վերացս , և ոչ զխաւարն իմ նշմարէի . զի մեկնեալ էի 'ի քէն 'ի ճշմարիտ լուսոյ որ լուսաւորես զամենայն մարդիկ որ դալոց են յաշխարհ : Այն ինձ . խոցեցին զիս , և ոչ ցաւէր ինձ . ձգեցին՝ և ոչ իմացայ . զի ոչ ինչ էի . զի կէի առանց կենաց որ է Բանդ՝ որով ամենայն ինչ եղև : Եւ յայն սակս , տէր լոյս իմ , թշնամիք իմ արարին ընդ իս զոր ինչ և կամեցան . հարին , մերկեցին , սղծեցին , յափշտակեցին , վէրս 'ի վերայ եղին և սպանին . զի մեկնեցայ առ 'ի քէն և առանց քո ընդ չեղեալս համարեցայ :

Բ. Տէր կեանք իմ՝ որ արարեր զիս յոյս իմ՝ որ կանգնեցեր զիս : Պաշտպան կենաց իմոց՝ ողորմեա ինձ, և յարո զիս տէր Աստուած իմ, յոյս իմ, զօրութիւն իմ, զօրավիգն իմ, մխիթարութիւն իմ : Յաւուր նեղութեան իմոյ հայեաց ՚ի թշնամիս իմ և զերծո զիս փախիցեն յերեսաց իմոց ատելիք անձին իմոյ և ես կեցից քե ՚ի քեզ : Ձի նոքա տէր խորհուրդ կալան վասն իմ, և տեսեալ զիս առանց քո՝ արհամարհեցին զիս : Բաժանեցին ՚ի մէջ իւրեանց զհանդերձս առաքինութեանց՝ որովք զիսն պերճացուցեր արարին իւրեանց ճանապարհ զինև օտնհարեղեն ինձ մըրովք մեղաց պղծեցին ըզտաճար քո սուրբ և եղին զիս յանապատ, և լքին ՚ի թախծութեան : Ընթանայի զհետ նոցա կոյր և մերկ վարակեալ ՚ի հաղքս մեղաց : Ձգեցին զիս զկնի իւրեանց յախտից յախտս, և ՚ի սողմոյ ՚ի կարակում, գնայի կթուցեալ ՚ի զօրութենէ առջի երեսաց վարողին զիս : Ծառայ էի՝ և զծառայութիւն սիրէի, կոյր էի՝ և կուրութեան փափա

քող • կապեալ էի՝ և ի կապանացս ոչ
խորշէի : Չգառնն քաղցր , և զքաղցրն
գառն համարէի :

Գ • Տառապեալ էի՝ և ոչ ՚ի միտ առ-
նուի • և այն՝ զի տարանջատ կայի ՚ի Բա-
նէդ , առանց որոյ եղև և ոչ ինչ • որով
բովանդակն սահպանի , և առանց նո-
րա ամենայն ինչ ՚ի չէք դառնայ : Չի
զոր օրինակ ամենայն ինչ ՚ի ձեռն նո-
րա եղև , և առանց նորա եղև և ոչ ինչ ,
նոյնպէս և ամենայնն բովանդակ նո-
վաւ սահպանի , որ ինչ իցեն՝ եթէ յեր-
կրի՝ և եթէ ՚ի ծովս և յամենայն ան-
դունդս : Ոչ մասն ՚ի մասն մաճնու ՚ի
վիմի՝ և ոչ յայլ ինչ արարածս , բայց
զի բանիւն սահպանին՝ որով ամենայն
ինչ եղև : Ապա ՚ի քեզ միացայց ՚ի Բանդ՝
զի սահեցես զիս , զի ուր միանգամ
անջատեցայ ՚ի քէն յիս ինքն կորեայ ,
մինչև դարձեալ դու տէր որ զիս ստեղ-
ծեր՝ անդրէն նորաստեղծեր : Ես մե-
ղայ՝ և դու ինձ յայց ելեր • ես անկայ՝
և դու կանգնեցեր • ես տգիտացայ՝ և
դու ուսուցեր • ես ոչ տեսի՝ և դու լու-
սաւորեցեր :

ԳԼ ՈՒԽ Է .

Յադագս քաղմադեմ քարերարու-
րեանցն Աստուծոյ .

Ա . Եղո՛ւկ զիս , Աստուած իմ . որ-
պէս զի հրամանք են ինձ սիրել զքեզ .
ուստ ինձ՝ զհարդ գովեցից զքեզ . ցոյց
ինձ՝ որպէս հաճոյ եղէց քեզ . ծանո
ինձ զքեզ : Որոտա տէր յերկնից՝ ի վե-
րուստ մեծ և ահեղ ձայնիւ . ուստ զիս
ընդ ներքին ահանջս սրաի իմոյ , և
փրկեա զիս : Բարեբանեցից զքեզ՝ որ
արարեր զիս յոչնչէ . և լուսաւորեցեր
զիս՝ զխաւարեալս , որ յարուցեր զիս
զմեռեալս , որ տածեցեր զիս բարեօք
քովք ՚ի մանկութենէ իմմէ : Մնուցա-
նես ամենայն սքանչելի սարգևօք քո
զայս որդն անպիտան , և զծնունդս մե-
զայ :

Բ . Բաց ինձ՝ ո՛վ դաւթեան բանալի ,
որ բանաս՝ և ոչ ոք փակէ որում դու
բանաս . և ոչ ոք բանայ որում դու փա-

կես : Բայ ինձ զգուռն լուսոյ քոյ , զի մտից տեսից և ծանեայց , և խոստովան եղէց յամենայն սրտէ իմմէ . զի ողորմութիւն քո մեծ է 'ի վերայ իմ , և զերծուցեր զանձն իմ 'ի դժոխոց ներքնոց : Տէր Աստուած մեր՝ որպէս զի սքանչելի և գովելի է անուն քո ընդ համօրէն տիեզերս . և ո՛վ է մարդ զոր յիշատակես դու տէր , կամ որդի մարդոյ՝ թէ այց ինչ արասցես դու նմա : Տէր յոյս սրբոց և աշտարակ զօրութեան նոցա : Աստուած կենդանարար անձին իմոյ , որով կեամ և առանց քո մեռանիմ . լոյս աչաց իմոց , որով տեսանեմ . և առանց քո կացցեն աչք իմ 'ի տեսանելոյ : Խնդութիւն սրտի իմոյ , և ուրախութիւն հոգւոյ իմոյ . սիրեցից զքեզ յամենայն սրտէ իմմէ և յամենայն մտաց և զօրութենէ իմմէ . զի նախ դու զես սիրեցեր :

Գ . Եւ ուստի՞ ինձ այս ո՛վ արարչագործ երկնի և երկրի և անգնդոց՝ որ ոչն կարօտիս բարեաց իմոց . ուստի՞ ինձ այս՝ զի սիրեցեր զես : Ո՛վ իմաստութիւն՝ որ բանաս զբերանս համերց .

ով Բան՝ որով ամենայն ինչ եղև . բայց զբերան իմ . տուր ինձ ձայն ցնծութեան , զի պատմեցից զամենայն երախտիս քո զոր արարեր ընդ իս տէր 'ի սկզբանէ : Ահա տէր կենդանի եմ զի դու արարեր զիս . և յաւիտենից նախակարգեցեր լինել ինձ 'ի թուոյ ըստեղծուածոց քոց մինչ չև արարեալ էր քո զաշխարհս , մինչ չեւ ձգեալ զերկինս , մինչ չև էին անդունդք ծովու , յառաջ քան զերկիր առնել , և նախ քան զլերինս հաստատել , և զաղբերաց բղխել . մինչ չև ստեղծեալ էր Բանդ զայս ամենայն՝ յառաջատեսեալ նախախնամութեամբ ստուգասպառում ճշմարտութեան քո՝ սահմանեցեր լինել ինձ արարած քո :

Դ . Եւ ուստի է ինձ այս , տէր բարեգութ , Աստուած բարձրեալ , հայր բազումողորմ , արարիչ ամենիշխան , և յամի երկայնամիտ . ո՞ր իմ արժանիք էին , և զինչ շնորհք , զի հաճոյ թուեցաւ մեծվայելչութեանդ քո ստեղծել զիս : Ոչ էի՝ և դու ստեղծեր . ոչ ինչ էի՝ և յոչնչէ հաստատեցեր զիս : Եւ

ո՞րպէս այն . ոչ շիթ ջրեղէն , ոչ հուր ,
 ոչ թուչուն , ոչ ձուկն , ոչ օձ՝ և կամ այլ
 ինչ յանասուն կենդանեաց , ոչ քար և
 ոչ փայտ : Ոչ՝ յորոց միայն զկեանքն ու-
 նին . ոչ յորոց միայն ենն , և աճեն , և
 զգան : Այլ գեր ՚ի վեր քան զայս ա-
 մենայն հրամայեցեր լինել ինձ . ՚ի կար-
 գի որոց զկեանքն ունին , զի եմս . և յո-
 րոց զլինեւն ունին և զաճեւն , զի եմ
 և աճեմ . և յորոց են , աճեն և զգան .
 զի եմ , աճեմ և զգայուն եմ : Եւ փո-
 քու իւրիք նուազ արարեր զիս քան
 զհրեշտակս . զի ընկալայ ընդ նոսա առ
 ՚ի քէն՝ միտս ՚ի ճանաչել զքեզ . սա-
 կայն փոքր ինչ նուազեալ . զի նոքա
 յայտնապէս ունին արդ զերանաւէտ
 տեսութիւն երեսաց քոց , իսկ ես յու-
 սով . նոքա գէմ յանգիման , իսկ ես
 ընդ հայելի օրինակաւ . նոքա լիով և
 ես փոքր ՚ի շատէ :

ԳԼՈՒԽ Ը .

Յաղագս արժանաշորոշրեանն մար-
դոյ հանդերձելոյ .

Յ. Այլ յորժամ եկեսցէ կատա-
րեալն՝ նանրասցի որ ըստ մասնեայն
է՝ ՚ի տեսանել մեր զերեսդ բացաւ ե-
րեսօք : Եւ արդ զինչ արգելու զմեզ
չլինել փոքր քան զհրեշտակս , զորս
դու տէր պսակեցեր յուսոյն պսակաւ՝
սլճնելոյ փառօք և պատուով . զորս մե-
ծասկէս փառօք պատուասիրեցեր՝ իբ-
րև զբարեկամս քո . նա մանաւանդ ըստ
ամենայնի հաւասար եմք և կցորդ հրեշ-
տակաց : Քանզի վկայեաց սմին և ճըշ-
մարտութիւնդ քո՝ հաւասարք են հրեշ-
տակաց . զինչ զարմանք թէ որդիք Աս-
տուծոյ լինին , և հաւատք հրեշտակաց .
զի ինքնին որդի մարդոյ եղև՝ որդին Աս-
տուծոյ : Չայս խորհելով իմ համարձա-
կիմ ասել՝ թէ ոչ ինչ փոքր է մարդ քան
զհրեշտակս , նա ոչ հաւասար եւթ՝

այլ գերագոյն քան զհրեշտակս . զի մարդ՝ Աստուած , և Աստուած՝ մարդ , և ոչ հրեշտակ :

Բ . Եւ յայս սակս՝ մարդ արարած է արժանապատիւ . զի Բանն՝ որ էր ՚ի սկզբանն Աստուած առ Աստուած , Բանն՝ որով ասաց Աստուած՝ եղիցի լոյս՝ և եղև լոյս , իմա հրեշտակականն բնութիւն , Բանն՝ որով ՚ի սկզբանն անդ արար Աստուած զամենայն ինչ , նա ինքն Բանն մարմին եղև և բնակեաց ՚ի մեզ և տեսաք զփառս նորա : Ահա փառք՝ յոր ՚ի փառաւորելս և պանծամ , ահա խնդութիւն՝ յոր ՚ի խնդալս ունի զիս ցնծութիւն : Տէր Աստուած իմ՝ կեանք և փառք անձին իմոյ . խոստովան եղէց քեզ տէր Աստուած իմ՝ որ եգեր զիս բանաւոր և կարգեցեր հրեշտակաց հաւասար . զի կատարեալ ՚ի ձեռն բանիդ քո թեակոխեցից ՚ի հաւասարութիւն հրեշտակաց , զի զորդեգրութիւն ընկալայց՝ տէր ՚ի ձեռն միածնի բանիդ քո . ՚ի ձեռն որդւոյ քո սիրելոյ՝ ընդ որ հաճեցար ՚ի ձեռն փառակցի և համադոյակցի քոյ և մշտն

Չենաւորակցի , Յիսուսի Քրիստոսի միոյ տեառն՝ փրկչի մերոյ , լուսաւորչի , մխիթարչի և բարեխօսի մերոյ առ .քեզ , և լուսոյ աչաց մերոց , որ է կեանք մեր և ազատարար և միակ յոյս մեր . որ սիրեաց զմեզ առաւել քան զանձն իւր . որով համարձակութիւն ունիմք և յոյս հաստատուն , և քաջալերութիւն առ .քեզ մատչելոյ : Զի ետ իշխանութիւն յորդիս Աստուծոյ լինել որոց հաւատասցեն յանուն նորա :

Գ . Բարեբանեցից զանուն քո տէր՝ որ ստեղծեալ զիս՝ ի պատկեր և ՚ի նմանութիւն քո՝ արժանի արարեր աստուածեղէն փառաց՝ որով կարացից լինել որդի Աստուծոյ : Չեն ձեռնհաս ծառատունկք այսմ , ոչ բաւեն քարինք , և ոչ որք շարժին կամ աճեն յօդս , կամ ՚ի ծովու , և կամ յերկրի . զի ոչ ետ նոցա իշխանութիւն ՚ի ձեռն բանիդ . քոյ լինել որդիս Աստուծոյ՝ զի չունին նոքա բան իմաստից : Քանզի և այս կարողութիւն գործ է բանական հոգւոյս որով ձանաչեմք զԱստուած : Եւ զայս կարողութիւն շնորհեաց մար-

գկան՝ զորս ստեղծ բանաւորս ըստ սլատ
կերի և ըստ նմանութեան իւրում: Եւ
ես տէր մարդ եմ շնորհօք քոյ, և հնա-
րաւորիմ լինել որդի քո՝ ի ձեռն շնոր-
հաց քոց՝ որում նոքա չեն ձեռնհաս:

Դ. Ուստի է ինձ այս տէր՝ իսկու-
թիւն գերագոյակ, և գերակայութիւն
իսկապէս սկիզբն ամենայն արարա-
ծոց: Ուստի ինձ այս տէր՝ զի կարող
եղէց լինել որդի Աստուծոյ՝ որում նո-
քա չեն բաւական: Դու ես՝ որ մնաս
յաւիտեանս՝ որ զամենայն համան-
գամայն արարեր: Միով հրամանաւ
ստեղծեր զմարդիկ և զանասուն, զքա-
րինս և զխոտս երկրի: Քանզի և ոչ իսկ
յառաջագէմ գտան արդիւնք նոցա, և
ոչ ուրուք նախագրաւ երևեցան շը-
նորհք. զի զամենայն ինչ միայն բա-
րութեամբ քով ստեղծեր. որք և հա-
ւասար գտան ամենայնիւ, ամենևին
սոսկացեալ յարդեանց: Իսկ արդ ի՞նչ
սքանչելագործէ բարութիւն քո մեծա-
հրաշ յայս քո արարած՝ զոր արարեր
բանաւոր՝ քան զայլովք ամենեքումբք
որք անմասն են ՚ի բանէ: Իսկ ընդէր

չեմ ես իբրև զայլսն. կամ զի նոքա
 ամենայնք չեղեն իբրև զիս, կամ ես
 միայն իբրև զնոսա: Ձինչ են վաստակք
 իմ. կամ զինչ շնորհ որ ստեղծեր զիս
 բաւական յորդեգրութիւն Աստուծոյ,
 զոր ոչն ետուր այլոց ամենեցուն: Քաւ
 ինձ տէր՝ թէ զայս առից 'ի միտ. միայն
 քո շնորհք, քո միայն բարութիւն ա-
 րար զիս՝ լինել կցորդ քաղցրութեանդ
 քոյ: Արդ այն շնորհ՝ որով յոչնչէ ըս-
 տեղծեր զիս՝ զնոյն խնդրեմ 'ի քէն,
 տէր, շնորհեա ինձ փոխարինել քեզ
 զայդ շնորհ:

ԳԼՈՒԽ Թ .

Յաղագս ամենիշխան զօրոշրուսն
Սառուծոյ .

Ա . Ամենակալ ձեռնքո յաւեժ ան-
փոփոխ և անյեղևի ստեղծ յերկինս
զհրեշտակս և յերկրի զգեոունս . ոչ 'ի
նոսին գերագոյն՝ և ոչ 'ի սոսին տրկա-
րացեալ : Ձի զոր օրինակ ոչ այլ ոք
ձեռն արար զհրեշտակ նոյնպէս և ոչ
այլ ոք ձեռնհաս գտանիցի որդն ստեղ-
ծանել . որպէս ոչ ոք զերկինս ճարտա-
րապետել կարաց , նոյնպէս և ոչ այլ ոմն
զգիւրատատան տերև ծառոյ . որպէս
ոչ ոք կարաց ստեղծուլ մարմին՝ նոյն-
պէս և ոչ ոք սպիտակ առնել կամ
թուխ զվարսս . այլ ամենակալ ձեռն
քո՝ որում ամենայն ինչ հանգիտա-
բար հնարաւոր են :

Բ . Ձի ոչ թէ գիւրին իցէ նմա ըս-
տեղծուլ զորդունս քան զհրեշտակս ,
և ոչ գժուարին՝ խորանայարկ սլար-

զէլ զերկինս, քան տերև մի բուսու
 ցանել, և ոչ առ ձեռն պատրաստ հերս
 աճեցուցանել, քան թէ մարմին հաս
 տատել. և ոչ դժուարին հիմնել զեր
 կիր 'ի վերայ ջուրց, քան զջուրս 'ի
 վերայ երկրի: Այլ զամենայն զոր կա
 մեցաւ և արար յերկինս և յերկրի, 'ի
 ծովու և յանդունդ ամենայն. և զիս
 գլխովին ընդ նոսա զինչ օրինակ կամե
 ցաւ, կարաց և գիտաց: Վարէր տէր
 ապաքէն և գիտէր ձեռն քո ստեղծա
 նել զիս քար, կամ հաւ թռչուն, կամ
 օձ, կամ գազան. այլ ոչ կամեցաւ
 վասն բարութեանդ քոյ: Եւ զի՞ չէմ
 ես վէմ, կամ ծառ, կամ այլ ինչ դա
 զան. զի այսպէս տնօրինեաց բարու
 թիւնդ քո. և առ այդ ոչ ինչ յառաջ
 ընթաց գտան վաստակք իմ:

ԳԼՈՒԽ Ժ .

Յադագս գովորեալն Սատուծոյ որ
'ի վեր է քան զվիտս .

Ս . Ուստի ինձ այս տէր , ուստի ինձ
բանք գովութեան 'ի բարեբանել ըզ-
քեզ : Ձի զոր օրինակ արարեր զիս ա-
ռանց իմ , որպէս հաճոյ եղև առաջի
քո , այսպէս և բարեբանեալ ես ա-
ռանց իմ , որպէս հաճոյ է յաչս քո :
Դու ինքն քեզ 'ի բարեբանութիւն ես .
գովեսցեն զքեզ գործք քո՝ ըստ բա-
ղում մեծութեան քում : Չափ փառա-
բանութեան քո տէր անկշիռ է մտաց .
ոչ սիրտ խելամոէ , բան բերանոյ ոչ
չափէ , և ոչ լսելիք բովանդակեն . զի
սոքա անցանեն , և գովութիւն քո տէր
մնայ յաւիտեան : Խորհրդոյ սկիզբն
է և կատարած . ճայն՝ հնչէ և անցանէ .
ունկն լսէ և դադարէ , իսկ գովութիւն
քո մնայ յաւիտեան :

Բ . Իսկ արդ ո՞վ է որ զքեզ գովես-

ցէ • ո՞վ որք 'ի մարդկանէ սլատմեսցէ
 զփառս քո : Գովուծիւն քո անեղծա-
 կան է՝ և ոչ սահաւալախաճան : Նա ըզ-
 քեզ բարեբանէ՝ որ քեզ բարեբանիչ
 զքեզ դաւանէ : Նա զքեզ բարեբանէ ,
 որ խոստովանի զանձն 'ի քոյոց վեր-
 ջացեալ գովուծեանց : Յաւերժական
 բարեբանութիւն՝ որ ոչ երբէք անցա-
 նէ • 'ի քեզ է գովուծիւն մեր , 'ի քեզ
 գովեսցի անձն իմ : Ոչ մէք զքեզ գո-
 վեմք , այլ դու զքեզ , և քեւ , և 'ի քեզ •
 և մեր իսկ 'ի քէն է գովուծիւն : Անդ
 է մեր իսկապէս գովեստ՝ թէ առ 'ի քէն
 գովեսցուք՝ 'ի լուսաւորել լուսոյդ • զի
 դու գովուծիւնդ ճշմարիտ՝ զճշմարիտն
 բաշխես գովուծիւն : Յորչափ յօտա-
 րաց ակնկալեմք գովուծեան՝ և ոչ առ
 'ի քէն , նոյնչափ և զքոյին կորուսա-
 նեմք զգովուծիւնդ • զի նոքա դիւրա-
 թառամք են՝ և քոյինդ յաւիտենական :
 Թէ զանցաւորաց սնդիմք զհետ՝ զյա-
 վիտենականն կորուսանեմք գովուծի •
 իսկ թէ զյաւիտենականն խնդրես-
 ցուք՝ ոչ սպարանիմք 'ի սէր անցաւո-
 րացս : Մշանջենաւոր գովուծիւն , տէր

Ատուած իմ, յորմէ ամենայն գովու-
թիւն, և առանց նորա և ոչ ինչ. չեմ
բաւական գովել զքեզ առանց քո. կա-
լայց զքեզ և գովեցից: Զի զի՞նչ եմ
ես ինձէն որ իշխեցից բարեբանել ըզ-
քեզ: Հող եմ և մոխիր, շուն մեռեալ
և նեխ, որդն և ասպականութիւն: Ո՞
եմ ես՝ զի գովեցից զքեզ տէր Աս-
տուած հզօր, հոգի ամենայն մարմնոյ
բնակեալ ՚ի լոյս յաւիտենից:

Գ. Միթէ գովեսցէ՞ խաւար զլոյս,
կամ մահ զկեանս: Գու լոյս՝ և ես
խաւար. գու կեանք, և ես մահ: Մի-
թէ գովեսցէ՞ նանրութիւն զճշմար-
տութիւն. գու ճշմարտութիւն՝ և ես
մարդ նմանեալ նանրութեան: Եւ
իւ տէր գովեցից զքեզ. միթէ հիգու-
թիւն իմ ՚ի գովութիւն առցէ զքեզ.
նեխեալս զբուրումնդ կենաց. այր իբրև
զիս մահկանացու՝ որ այսօր է, և վա-
ղիւ ՚ի բաց բառնայ: Միթէ գովեսցէ՞
զքեզ մարդ ասպականացու, և որդն
որդի մարդոյ: Իշխեսցէ՞ բարեբանել
զքեզ՝ յղացեալն, ծնեալն և սնեալն ՚ի
մեղս: Զի չէ գովութիւն հաճոյական

'ի բերան առն մեղաւորի : Գովեսցէ ըզ-
 քեզ տէր Աստուած իմ, ամենիշխան
 զօրութիւնդ քո, անպարագիր իմաս-
 տութիւնդ, և անպատում բարութիւնդ :
 Օրհնեսցէ զքեզ Աստուած գթութիւնդ
 քո, մշտնջենաւոր զօրութիւն և աս-
 տուածութիւն քո : Բարեբանեսցէ
 զքեզ ամենազօր կարողութիւնդ քո,
 անբաւելի բարեգթութիւն և սէր քո՝
 որով արարեր զմեզ տէր Աստուած՝
 կենդանութիւն հոգւոյ իմոյ :

ԳԼՈՒԽ ԺԱ.

Յադագս փտուսնոչքեան ւո
Աստուած .

Ս . Ես արարած ձեռաց քոց ընդ հովանեաւ թւոց քոց ակնկալայց բարութեանդ քում, որով զինն ստեղծեր : Օգնեա քումդ արարածոյ՝ զոր հաստեաց բարեգթութիւնդ քո . մի կորիցէ՝ ի չարութեանս իմում՝ զոր արարն բարութիւն քո . մի կորիցէ՝ ի թշուառութեան իմում՝ զոր գործեաց յիս գթութիւնդ քո : Զի զինչ օգուտ յարարչութենէդ՝ թէ իջանիցեմ յապականութիւն իմ . զև ոչ եթէ ի նանիր ինչ ստեղծեր զամենայն որդիս մարդկան : Ստեղծեր զիս տէր, խնամ տար որում ստեղծեր . զգործ ձեռաց քոց մի անտես առներ . յոչնչէ արարեր զիս, և թէ ոչ խնամես զիս տէր՝ վերլստին յոչէութիւն անգր դարձայց .

զի որպէս ոչ էի՝ և արարեր յոչնչէ՛ ,
այսպէս՝ թէ ոչ խնամ ունիցիս ՚ի վե-
րայ իմ անդրէն փոխարկիմ յոչնչու-
թիւն :

Բ. Օգնեա ինձ տէր կեանք իմ՝ զի
մի կորեայց ՚ի չարիս իմ : Թէ ոչ ստեղ-
ծէիր զիս տէր՝ և ոչ իսկ էի . արդ եմ՝
զի ստեղծեր . թէ ոչ խնամեսցես՝ ոչ
ևս եմ : Զի ոչ եթէ վաստակք իմ և շը-
նորհք ետուն քեզ ստեղծանել զիս ,
այլ բարեսէր քաղցրութիւնդ քո և
գթութիւն : Այլաչեմ զքեզ տէր՝ այն
սէր որ ետ քեզ ստեղծուլ զիս՝ նոյն
դարձեալ տացէ քեզ խնամել զիս : Զի
զի՞նչ օգուտ է ստեղծանելդ զիս սի-
րովդ քով թէ կորեայց ՚ի տառապանս ,
և ոչ հովանասցի ինձ աջ քո : Այդ
գթութիւն քո , տէր Աստուած , բա-
րեխօս լիցի քեզ փրկել զարարածս , որ
և յօժարեցոյցն զքեզ հաստել զոր ոչն
էր : Այն սէր յօժարեսցէ զքեզ ապ-
րեցուցանել զանձն իմ՝ որ յօժարեացն
յարարչագործել . քանզի և չէ ինչ նը-
ւազ քան զքեզ . իբրև զի՝ դու այն սէրն
ես՝ որ յամենայնի նոյն ես : Զէ ինչ

նուազեալ ձեռն քո տէր՝ որ ոչ յօժարեացի 'ի փրկու[թիւն մեզ. ոչ [թէ չըլանն ահանջք քո, այլ մեղք իմ խարոց ընդ մէջ արկինն իմ և քո, ընդ խաւար և ընդ լոյս, ընդ մահու օրինակիս և ընդ կենդանու[թիւնդ, ընդ ստու[թիւն և ընդ ճշմարտու[թիւն, ընդ եղծանելի կեանս իմ յաստիս, և ընդ մշանջենաւորու[թիւն քո :

ՔԼՈՒԽ ԺԲ .

Յադագս որագայրից ցանկոտքեանց .

Ե . Ս հա ստուերք խաւարի՝ որ ծածկեն զիս յանդունդս միգամած բանտիս, յորում անկեալ դնիմ՝ մինչև ծագեսցի տիւն՝ և խոնարհեսցինն ըստուերք, և եղիցի լոյս 'ի հաստատու[թիւն զօրու[թեան քոյ : Չայն տեառն 'ի զօրու[թեան, և ձայն տեառն 'ի մեծ վայելչու[թեան, ասասցէ . եղիցի լոյս՝ և 'ի բաց մերժեսցի խաւար . երևեսցի ցամաքն՝ և ընձիւղեսցէ երկիր զբան

Զար խոտոյ՝ որ արասցէ սերմն՝ զպը-
տուղ բարի՝ զարդարութեան արքայ-
ութեան քոյ : Տէր հայր և Աստուած
կենդանատու՝ յորում կեան ամենե-
քեան, և առանց նորա ՚ի մեռելոց սա-
կի են ամենեքեան, մի թողցես զիս ՚ի
չար խորհուրդս, և զբարձրայօն ամ-
բարտաւանութիւն մի տար ինձ. բարձ-
րինէն զցանկութիւնս իմ, և մի մատ-
ներ զիս անպատկառ և արձակերասան
հոգւոյ, այլ ստացիր քեզ զսիրտ իմ՝
զի զքէն խորհեսցի հանապազ :

Բ. Լուսաւորեա զաչս իմ՝ զի տես-
ցեն զքեզ, և մի մեծամտեսցեն առաջի
քո՝ փառք մշտնջենաւոր. և մի ձգես-
ցին յորս ՚ի վեր են քան զինքեանս.
զաջակողմեանսն տեսանիցեն, և ոչ զա-
հեկինսն որք ՚ի բացէ կան առ ՚ի քէն :
Արտևանունք քո յառաջ ընթասցեն
քան զգնացս իմ՝ զի նոքա քննեն զոր-
դիս մարդկան : Խորտակեա զցանկու-
թիւն իմ քաղցրութեամբդ քով՝ զոր
սրահեցեր երկիւղածաց քոց, զի ցան-
կացայց ՚ի քեզ ցանկութեամբ յաւի-
տենականաւ, և զի մի սնոտեօք հրա-

սուրբեալ և սպառեալ ներքինն ախոր-
 ժանացն, զգառն քաղցր դնիցէ և ըզ-
 քաղցրն դառն. զխաւարն լոյս՝ և զլոյսն
 խաւար. զի ապրել մարթացայց՝ ի հաղ-
 բից աստի լարեւոց՝ ի թշնամւոյն ընդ
 ճանապարհ աստի կենացս՝ որսալ զհո-
 գիս մեղաւորաց՝ որովք լցեալ են տիե-
 ղերք համօրէն : Զորս որ ետեսն՝ ոչ
 զանց արար լուռթեամբ. այլ ասաց՝
 որ ինչ է յաշխարհիս՝ ցանկութիւն է
 մարմնոյ, ցանկութիւն աչաց՝ և ամ-
 բարտաւանութիւն աստի կենաց :

Գ. Ահա տէր Աստուած իմ, լցաւ
 տիեզերս որոգայթիւք ցանկութեանց՝
 լարեալք ընդ ոտիւք իմովք, և ո՞վ աս-
 րեսցի յայդցանէ : Նա միայն՝ յորմէ՝ ի
 բաց առնուցուս զաչացն մեծամիտ ահ-
 նարկութիւն, զի մի յափշտակեսցեն
 զնա ցանկութիւնք աչաց. և զոր աս-
 րեցուսցես ի ցանկութենէ մարմնոյ՝
 որ ոչ ունիցին զնա, և յորմէ՝ ի բաց
 մերթեսցես՝ զանպատկառ և զլրբենի
 հոգի, զի մի սպառեսցէ զնա ամբար-
 տաւանութիւն աստի կենացս : Ա՛վ
 մեծի շնորհիս՝ որում դու զայդ արաս-

ցես , անցանել ազատութեամբ ընդ սոսա :

Դ. Եւ արդ փրկիչ՝ աղաչեմ զքեզ՝ օգնեա ինձ , զի մի անկայց առաջի թըշնամեաց իմոց , շաղեալ յորողայթս նոցա՝ զորս լարեցին ընդ ոտիւք իմովք՝ առ ՚ի սարանել զանձն իմ : Այլ կորզեա զիս՝ զօրութիւն փրկութեան իմոց , զի մի ծիծաղեսցին զինն թշնամիքքո՝ որք ատենն զքեզ : Արի տէր Աստուած՝ զօրութիւն իմ՝ և ցրուեսցին թշնամիքքո , և փախկցեն ատելքքո յերեսաց քոց : Որպէս հալի մոմ ՚ի հրոյ՝ այնպէս կորիցեն մեղաւորք յերեսաց քոց . և ես թագեայց ՚ի ծածկութեան երեսաց քոց , և ուրախ եղէց ընդ որդիս քո՝ լիացեալ յամենայն բարութեանց քոց : Եւ դու տէր Աստուած՝ հայր և մայր որբոց , լուր ձայնի որդւոց քոց , և սարգեա զթւս քո՝ զի ապաստան լիցուք ընդ նոքօք յերեսաց թըշնամեաց : Աշտարակ զօրութեան Իսրայելի՝ որ ոչ նիրհես և ոչ ննջես պահպանդ Իսրայելի . քանզի և ոչ նիրհէ և ոչ ննջեսցէ թշնամին՝ որ մարտնչի ընդ Իսրայելի :

ԳԼՈՒԽ ԺԳ .

Յադագս մարդկային բշռառուքեան,
և բարերարութեանցն Սատուծոյ .

Ե. Ո՛վ լոյս՝ զոր ոչն տեսանէ լոյս
օտար . լոյս՝ յոր այլ լոյս ոչ ակնարկէ :
Լոյս՝ որ աղօտացուցանէ զամենայն
լոյս, և որ կուրացուցանէ զամենայն
արտաքինս : Լոյս՝ յորմէ ամենայն լոյս .
և ճրագ՝ յորմէ վառին ամենեքեան :
Ճրագ՝ առ որով խաւար են ամենե-
քեան, և ամենայն ճրագունք խաւար-
ամած : Լոյս՝ որում յայտնի են ամե-
նայն խաւարինք, և որում ամենայն
մթութիւնք սպարդեալ են : Լոյս երկ-
նային զոր կուրութիւն ոչ նսեմացու-
ցանէ . զոր մառախուղ ոչ մթագնէ .
զոր աղջամուղջ ոչ խաւարէ . զոր ոչ
ինչ խաւանէ . զոր ստուեր ոչ վերար-
կէ : Լոյս՝ որ լուսաւոր առնես զա-
մենեսեան միանգամայն՝ միահաղոյն և

միշտ • ձգեա զիս յընդարձակութիւնս
սիրոյ .քոյ , զի յամենայն կողմանց տե-
սից զքեզ 'ի քեզ , և զիս 'ի քեզ՝ և զա-
մենայն ինչ ընդ .քե : Մի թողուր զիս՝
զի մի թանձրասցինս ստուերք տգիտու-
թեանս իմոյ , և անօրէնութիւնք իմ բազ-
մասցին : Քանզի առանց .քո ամենայն
ինչ խաւար է ինձ , և ամենայնն չար •
զի չեք ինչ բարի առանց .քո , որ եսդ
խկասպէս՝ միայն և գերագոյն բարի :

Բ • Չայս խոստովանիմ , զգոյն զայդ
գիտեմ , տէր Աստուած իմ , զի ուր և
իցեմ առանց .քո՝ չար է ինձ յամենայ-
նի , ոչ միայն արտաքոյ իմ՝ այլ և յանձն
իմ գլխովին • զի ամենայն լրութիւնս
զատուցեալն յԱստուծոյ կարօտու-
թիւն է ինձ : Յագեցայց ես յերևել
փառաց .քոց : Եւ դու տէր կեանք իմ
երանաւէտ , տուր ինձ խոստովան լի-
նել քեզ զտառապանս իմ , քանզի յոր-
մէ հետէ 'ի կցորդութենէ անտի բա-
րութեանդ .քո , 'ի ծայրագոյն և 'ի միակ
բարւոյդ կորզեաց զիս բազմակերպ տե-
սիլ առժամանակէիցս , և ցնդեաց ընդ
զգայութիւնս մարմնեղէնս , և 'ի միոյն

՚ի բազումն տարանջատեաց, փոխեցաւ
ինձ լիութիւնս տառապագին, և կարօտութիւնս՝ զեղուն. քանզի բազմաց
զհետ պնդելով՝ և ոչ միտին յագեցայ,
զի ոչ գտանէի զանփոփոխելիդ՝ և զանբաժանելի միակ բարիդ. զոր ստացեալ
միանգամ՝ յայնմ հետէ ոչ ևս կարօտիմ,
ստացեալ ոչ ցաւիմ. ժառանգեալ՝ յագեսցի
ամենայն ցանկութիւնս իմ:

Գ. Աւանդ հիգութեանս՝ ՚ի հիգութեան վերայ. զի հոգի իմ տառապեալ
հեռանայ ՚ի քէն, որով միշտ լիացեալն էր
և զուարճացեալ. զաշխարհի զհետ ընթանայ,
ընդ որում հանապաղ կարօտի և վշտագնի:
Այլադակէ աշխարհս և ես սպակասեմ.
Դու տէր ձայնես, և նորաստեղծիմ.
այլ հեղգութիւնս իմ զհետ գնայ
նուազելոյն, քան կենդանարարին:
Ահա այս է ցաւս իմ: Բըժիշկ
հոգւոյ ապաքինեա զիս, առողջութիւն
անձինս իմոյ, զի խոստովանեղէց
քեզ յամենայն սրտէ իմմէ ՚ի վերայ
ամենայն բարերարութեանց քոց՝
որովք տածես զիս ՚ի մանկութենէ

խմէ մինչև յալիս ծերութեան: Պա-
ղատիմ առ քեզ մի ընդ վայր հարցես
զիս. արարեր զիս՝ երբ ոչն էի, և փրկ-
կեցեր՝ այն ինչ կորուսեալն էի: Կո-
րուսեալ և մեռեալ էի, իջեր առ մե-
ռեալս և զմեռելու թիւնս՝ ի քեզ ընկա-
լար. թագաւորդ խոնարհեցար առ ծա-
ռայս. վասն զիս փրկելոյ՝ զքեզ մատ-
նեցեր: Զի ես կեցից՝ դու մահու ան-
չընչացար՝ և յաղթեցեր մահու: Զիս
վերականգնեցեր քոյին խոնարհելովդ:

Դ. Կորուսեալ էի մոլորական, և մե-
ղօք վաճառեալ. եկիր վասն իմ՝ առ ՚ի
փրկութիւն իմ. և այնչափ զիս սիրե-
ցեր՝ մինչև փոխանակ իմ՝ ի գին փրկ-
կանաց ետուր զարիւն քո. սիրեցեր
զիս տէր՝ առաւել քան զքեզ. զի մե-
ռանել յօժարեցար վասն իմ: Ուխ-
տիւդ այդու, և ծանու գնով դարձու-
ցեր զիս յաքսորանացս, զերծուցեր
զիս ՚ի ծառայութենէ, հաներ ՚ի տան-
ջանացս, զանուն քո եղեր ՚ի վերայ իմ,
և կնքեցեր զիս արեամբդ քով. զի ա-
նեղծ մնասցէ առ իս յիշատակ քո
և մի հեռասցի ՚ի սրտէ իմմէ՝ որ ոչն

հրաժարեաց վասն իմ 'ի խաչէ : Օծեր
 զիս իւղովդ քով՝ որով դու օծար , զի
 յանուն քո կոչեցայց քրիստոնեայ :
 Ահա 'ի ձեռս քո նկարեցեր զիս , զի
 անմոռաց եղէց առ քեւ , միայն թէ և
 յիշատակ քո կացցէ առ ինև : Շնորհք
 քո և ողորմութիւն կանխեցին առ իս ,
 քանզի 'ի բազմադէմ և յահաւոր վը-
 տանգից ապրեցուցեր զիս , ազատիչ
 իմ : Ի մոլորելս իմում՝ առաջնորդեցեր
 ինձ 'ի ճանապարհս 'ի տգիտութեանս
 ուսուցեր զիս , 'ի մեղանչելս կշտամ-
 բեցեր , 'ի տխրութեանս մխիթարե-
 ցեր , յանցաւութեանս քաջալերեցեր ,
 յանկանելս կանգնեցեր , 'ի կանգնելս
 հաստատուն կալար , 'ի գնալս՝ առաջ-
 նորդեցեր , 'ի գալս ընկալար , 'ի ննջելս
 պահեցեր , 'ի կարգալս և լուար :

ԳԼՈՒԽ ԺԳ .

Նայի Սատուած յամենայն ժամ 'ի գործս և 'ի խորհոշրդս մարդկան .

Ս . Զայս և առաւել քան զսոյն բազումս արարեր ընդ իս երախտիս՝ տէր Աստուած իմ, կենդանատու հոգւոյ իմոյ . զորոց քաղցր է ինձ խօսիլ, խորհիլ միշտ և գոհանալ, զի բաւական գրտայց գովել զքեզ յամենայնի վասն ամենայն բարեաց քոց, և սիրել զքեզ յամենայն սրտէ իմմէ, և յամենայն անձնէ իմմէ, և յամենայն մտաց իմոց, և յամենայն զօրութենէ իմմէ . միանգամայն և բովանդակ իսկ 'ի սրտէ իմմէ, և որչափ ինչ բաւական գտանիցիմ : Երանաւէտ զմայլումն ես, տէր Աստուած իմ՝ որոց սիրենն զքեզ : Այլ զանգործս իմ տեսանեն աչք քո՝ որ լուսաւոր են քան զարեգակն, և նկատեն զամենայն ճանապարհս մարդկան,

և զխորս անգնդոց՝ և շուրջ տեսանեն
անդուլ զբարիս և զչարիս :

Բ . Եւ քանզի գեր ՚ի վեր անցեալ էս
զամենեքումք, ընուս զամենեսին, և
զամենայնն լիւ իւրով տեսանես, և ա-
մենայնի խնամ՝ ունիս զորս արարեր .
զի ոչ զոք մերժես յորոց ստեղծերն ,
քննես զընթացս իմ և զհետս ոտից ի-
մոց . և զցայտ և զցերեկ հսկես յիմ
սլահպանութիւն՝ հայելով զգուշու-
թեամբ յամենայն ՚ի գնացս իմ : Աննիր-
հելի սլահապան , գոգ անտես արարեալ
քո զամենայն արարածովք երկնի և
երկրի , յիս միայն դէտակն ունիս . զանց
զայլովք արարեալ : Զի ոչ առաւելու
աննուազ լոյս տեսութեանդ քում
թէ ՚ի մին և եթ ակնարկեսցես . և ոչ
նուազ , թէ յանհամարս և ՚ի զանա-
զանս նայեսցիս : Քանզի իբրև ընդ մի
միայն նայիս յամենեսին և անձնիւրցն ,
թէպէտ զատուցելոց . զի բովանդակ խե-
լամտեն հայեացք աչաց քոց : Որպէս
զամենայնն՝ նոյնպէս զմին . և որպէս
զմէն մի , նոյնպէս և զընդհանուրան՝ ա-
ւանց տրոհելոյ՝ կամ փոփոխութեան

կամ նուազութեան յակն արկանես :
 Յամենայն ժամանակի՝ անժամանակ .
 ինամես զիս ամենայնիւ յամենայնի՝ որ
 պէս թէ չգուցէ այլ ինչ խնամոց քոց
 արժանի :

Գ. Հսկես 'ի վերայ իմ որպէս թէ
 զամբօժմբ զանց արարեալ՝ միայն ընդ
 իս նայեսցիս , յամենայնի ականատես ,
 և յամենայնի կազմ թէ զիս սրատրաստ
 գտանիցես : Յո՛ և գնացից ոչ թողուս
 զիս՝ մինչ չե իմ թողեալ զքեզ : Ուր և
 իցեմ՝ ոչ 'ի բաց հեռանաս , զի ամե-
 նայն ուրեք ես , և յո և գնացից՝ գտա-
 նեմ զքեզ , որով կացից մնացից . և մի
 կորեայց հեռացեալ առ 'ի քէն , զի ա-
 ռանց քո հաստատուն կալ անհնար է
 ինձ : Խոստովանիմ զի զամենայն ինչ
 զոր առնեմ՝ առաջի քո է . և զոր առ-
 նեսն դուքաջ տեսանես քան զիս . քան-
 զի զոր ինչ գործեմ ես յամենայն ժամ՝
 յամենայնի մերձ կաս , զի հայիս յա-
 մենայն խորհուրդս իմ , 'ի միաս , 'ի սէր
 և 'ի գործ : Տէր առաջի քո է ամենայն
 ցանկութիւն իմ և խորհուրդ իմ :

Դ. Իու տէր տեսանես ուստի՛ դայ

հոգի , որ է և յո՞ գնայ . զի դու ես որ
 քննես զամենայն հոգիս . դու դատա-
 ւոր , գիտես քաջ՝ որ արմատ քաղցր ի-
 ցէ կամ դառն , և որ գեղաստղարթ դա-
 լարանայ . և զարմատս նոցա մանրա-
 պատում քննեցեր : Նա՛ որչ զգորու-
 թիւն միայն՝ այլ և զներքին խողովակս
 նորա բացածագեալ ճշմարտութեամբ
 լուսոյդ քո զննես քաջ , թուես , հայիս
 և սահմանես . զի հատուցես իւրա-
 քանչիւրում որչ միայն ըստ գործոց և
 ըստ խորհրդոց , այլ և ըստ ներքին թա-
 գուն ուղղոց արմատոյն՝ յորմէ բուսա-
 նին արդիւնք գործողին : Դու տեսա-
 նես թէ՛ որչ ձգտիմ՝ ի գործս իմ , զի
 խորհիմ , և զինչ սիրեմ . լսեն ականջք
 քո , տեսանեն սչք քո և իմանան . հա-
 յիս ՚ի նշանս և ՚ի նշանակս , և արձա-
 նագրես ՚ի մատենիդ քում եթէ բարի
 և եթէ չար . զի հատուցես ըստ ժա-
 մուն՝ բարեաց մրցանակ և չարեաց պա-
 տուհաս . յորժամ բանայցին գիրք , և
 դատեսցին իւրաքանչիւր ըստ գրեւոյն
 յայնմ մատենի :

Ե . Թերևս այն իցէ զոր ասացերն

մեզ . քննեցից զամենայն զգործս նո-
րա . և որ ինչ ասի զքէն տէր զիւրա-
քանչիւրոցն 'ի միտ առնու նա զկատա-
րած . զի յամենայնի զոր ինչ գործեմք
քննես զնպատակ մտացն քան զգործ :
Ի խորհեա իմ զայս, տէր Աստուած իմ
ահաւոր և հզօր, երկիւղիւ և սրտկա-
ռանօք վարակիմ . զի մեզ անխուսափ
հարկ է գնալ իրաւամբք և արդարու-
թեամբ, զի զամենայն ինչ գործեմք ա-
ռաջի աչաց դատաւորին՝ որ զամենայն
տեսանէ :

ԳԼՈՒԽ ԺԴ .

Չի մարդ չէ իմ իբր բաշակիսն՝ առանց
սատուածատուշր շնորհաց .

Ա . Հ զօր և սքանչելագործ Աստուած
հոգւոց , և ամենայն մարմնոց . աչք քո
քննեն զգնացս որդւոց Ադամայ , յօրէ
ծննդեանն նոցա մինչ 'ի կատարած , զի
հատուցես իւրաքանչիւր ըստ գործոց
իւրեանց վարձ կամ սլատուհաս . ցոյց
ինձ զի խոստովան եղէց քեզ զաղքա-
տու թիւն իմ . զի ասացի թէ մեծատուն
եմ և չեմ իւրիք կարօտեալ . և ոչ գի-
տէի թէ աղքատ եմ , կոյր , մերկ , հէգ
և տառապեալ . կարծէի թէ իցեմ ինչ
որ բնաւ չէի . ասացի՝ իմաստուն եղէց՝
և յիմարեցայ . հանճարեղ համարե-
ցայ , և սլատրեցայ . և ահա տեսանեմ
զի սլարդե է քո՝ առանց որոյ յոչ ինչ
եմք ձեռնհաս . զի թէ ոչ գուտէր սա-
հեսցես զքաղաք՝ 'ի նանիր տքնին սա-

Հասպանք նորա : Ուսուցեր զիս 'ի միտ
 առնուլ զչափ անձինն իմոյ . զի թողեր
 զիս , և փորձեցեր զիս . ոչ զի դիտասցես
 զիս այլ զի ես խելամուտ եղէց անձինն
 իմոյ : Քանզի որպէս ասացի , ինձ կար-
 ծեալ այնպէս էր թէ իցեմ ինչ . կար-
 ծէի բաւական լինել անձամբ , և ոչ 'ի
 միտ առնուի թէ դու խնամես զիս . մինչ
 զի 'ի հեռանալ քո առ յինչն՝ տապաստ
 անկայ . տեսի և ծանեայ զի ես սաշտ-
 սպան իմ դու . ես ինձէն անկայ , և քե
 կանգնեցայ :

Բ . Բացեր ինձ զաչս իմ , ով լոյս , և
 զարթուցեր և լուսաւորեցեր զիս . տե-
 սի , և ահա փորձութիւն է կեանք մար-
 դոյ 'ի վերայ երկրի , մի պարծեսցի ա-
 ռաջի քո ամենայն մսեղի , և ոչ արդա-
 րացի ամենայն կենդանի : Ձի որ ինչ
 դուցէ բարւոյ մասին որ սակաւ և որ
 շատ , է քո պարգև , և մեր չեք այլ ինչ՝
 բայց եթէ չարիք : Եւ իւ պարծեսցի
 ամենայն մարմին , բայց միայն ընդ չա-
 րիս իւր : Այդ չէ փառք՝ այլ թշուա-
 ռութիւն . ոչ իւրք պանծացի ընդ
 բարին , և ոչ ընդ այն որ չէ իւր : Քո

է տէր բարին, և քո են փառք, և որ
 որք բարեօք քովք փառս անձին խըն-
 դրեսցէ՝ և ոչ վասն քո ջանասցէ, գող է
 և աւազակ, նմանեալ սատանայի՝ որ
 խնդրեացն գողանալ զփառս քո: Ձի
 որ որք զքո պարգևսդ ՚ի գովեստ իւր
 հանցէ, ոչ խնդրելով ՚ի նմին զքոյին
 փառս այլ զանձին իւրոյ, թէսկէտև վասն
 պարգևաց քոց նա գովեսցի առ ՚ի մար-
 դկանէ՝ այլ ՚ի քէն մերժեսցի, զի ՚ի պար-
 գևս քո զանձին իւրոյ և ոչ զքոյ խըն-
 դրեաց զփառս: Ձի որ գովու թիւն
 դատանէ ՚ի մարդկանէ՝ տարամերժեալ
 ՚ի քէն, ոչ գտցէ զօգնու թիւն ՚ի մար-
 դկանէ ՚ի դատելն քո, և ոչ ազատեսցի
 ՚ի դատապարտելդ քո:

Գ. Եւ արդ տէր՝ որ նկարեցեր զիս
 յորովայնի մօր իմոյ՝ մի թողուր զիս
 անկանել յայն նշաւակ՝ մինչև յան-
 դրգնել ինձ՝ կապտել զփառս քո • քո
 են փառք որոյ են ամենայն բարիք • իսկ
 մեզ ամօթ երեսաց և թշուառու թիւն՝
 որոց են ամենայն չարիք, մինչ չև քո
 հաճեալ իցէ գթասիրել: Ողորմեա
 տէր, ողորմեա ամենեցուն, և մի ատեր

զոք յորոց ստեղծերն • տուր մեզ զբարիսդ քո, և ճոխացո տէր Աստուած զմեզ զտնանկացեալս գերագոյն սարգևօք քովք • զի սիրես զաղքատս, և ընուս զնոսա աստուածու[թեամբ քով: Ահա տէր՝ մէք աղքատքս որդիք քո եմք, և հօտ քո փոքրիկ, բաց մեզ զղբուհս քո • կերիցեն տնանկք և յագեսցին • և գովեսցեն զքեզ որք [թողինն: Գիտեմ տէր և խոստովան լինիմ՝ զի նոքա միայն որք աղքատս համարին զանձինս՝ և խոստովան լինին քեզ զկարօտու[թիւն իւրեանց՝ ճոխանան առ 'ի քէն • զի որք մեծատունս զանձինս առդնեն՝ յաղքատու[թեան անդ իւրեանց 'ի բաց ելանեն 'ի քոյոց մեծու[թեանց:

Դ • Ահա խոստովան լինիմ քեզ, տէր Աստուած իմ, զաղքատու[թիւն իմ, զի 'ի քեզ գրեսցին ամենայն փառք քո, զի քո են ամենայն բարիք առ 'ի քէն հաստեալք: Խոստովանիմ տէր զի ուսուցեր զիս՝ [թէ չեմ այլ ինչ՝ բայց ամենևին նանրու[թիւն, ստուեր մահու, անդունդք խաւարին և երկիր աներևոյթ և անսպատրաստ, որ ոչ ինչ

վերընձիւղէ առանց օրհնութեանդ •
 պողաբերէ և ոչ ինչ բայց միայն նա-
 խաափնս , մեղս և մահ : Թէ իցէ բարի
 ինչ առ ինև՝ 'ի քէն ընկալայ • զոր ինչ
 ունիմ բարիս՝ քո են և 'ի քէն ընկա-
 լայ : Ի կալս՝ քև հաստատեցայ , այլ
 'ի կործանմանս՝ անձամբ դայթակղե-
 ցայ • և հանապազ կայի մնայի 'ի տղմի՝
 եթէ ոչ դու 'ի վեր առնուիր զիս • և
 միշտ 'ի կուրութեան խարխափէի՝ թէ
 ոչ դու զիս լուսաւորէիր : Յանկանիլս
 անմարթ էր ինձ յառնել՝ թէ ոչ ձեռն
 տայիր • և յետ կանգնելոյս՝ դարձեալ
 կործանէի 'ի բազում նուագս՝ եթէ ոչ
 հասանէիր ինձ յօգնութիւն : Ի բա-
 զումս բազում անգամ կորնչէի՝ թէ
 ոչ խնամ տանէիր ինձ :

Բ • Այսպէս ահա շնորհք քո և ո-
 զորմութիւն կանխեցին առ իս՝ փրկե-
 կել զիս յամենայն չարեաց • յանցե-
 լոց քաւել , յառաջիկայից փրկել և
 յապագայից ազատել : Նանրացուցեր
 առաջի իմ զորոգայթս մեղաւորաց ,
 բարձեր զդէսս և զառիթս • զի եթէ ոչ
 ըստ այսմ օրինակի առնէիր դու ընդ իս ,

գործէի արդեօք զսամենայն մեղս աշխարհի : Գիտեմ՝ տէր զի չեք ինչ մեղք զոր ոչ արասցէ մարդ, [թէ՛ ՚ի բացեայ ելցէ արարիչն՝ յորմէ ստեղծաւս մարդ : Այլ երագեցեր՝ զի մի գործեցից . հրամայեցեր ժուժկալել՝ և զեղեր զչնորհսքո՝ զի հաւատացից ՚ի քեզ : Զի դու, տէր, խնամակալ լինիս ինձ ընդ իմ և ընդ քո : Շնորհ և լոյս պարգևեցեր յետս կալ յսամենայն մեղաց :

ԳԼՈՒԽ ԺԶ .

Յադագս դիշիև և բազմադեմ փորձնքևանց ևորս .

Ա . Տեղի ետ փորձիչն՝ ըստ քումդ սատարելոյ, պակասեաց տեղին և ժամանակն ըստ քումդ սադրելոյ : Ի վեր վազեաց փորձողն . ոչ նուազեաց տեղի և ժամանակ, այլ դու զօրացուցեր զիս զի մի ունկնդիր եղէց նմա : Եհասս փորձողն խաւարչտին՝ ըստ որում և

էն, և դու ինձ ետուր զօրութիւն՝ արհամարհել զնա: Դիմեաց փորձողն վառեալ զինու և զօրութեամբ. և դու սանձեցեր զնա և ետուր ինձ ուժգնութիւն զի մի յաղթեսցէ ինձ: Մերձեցաւ փորձողն կերպարանեալ՝ ի հրեշտակ լուսոյ, և դու նկուն արարեր զնա զի մի պատրեսցէ զնա. լուսաւորեցեր զնա զի ծանեայց զնա. քանզի նա է վիշապն մեծ և հրաշէկ օձն հին, անուանեալն այս չար և սատանայ, որ ունի գլուխս եօթն և եղջիւրս տասն՝ զոր ստեղծեր խաղալ ՚ի ծովս յայս մեծ և ընդարձակ, յորում սողան զեռունք՝ որոց ոչ գոյ թիւ. և կենդանիք փոքունք և մեծամեծք, այս է՝ բազում ազգք զիւաց, որք ոչ ինչ գործեն ՚ի տուէ և ՚ի գիշերի՝ բայց շուրջ պատեալ ՚ի կլանել փութալով՝ թէ ոչ դու փրկեսցես:

Բ. Նա ինքն է վիշապն հին՝ երևեալն ՚ի դրախտին փափկութեան, որ տտամբ իւրով ձգէր զերրորդ մասն աստեղաց երկնից՝ և արկանէր զնոսա յերկիր՝ որ թունուփն իւրով ասպականեաց ըզ-

Ջուրս երկրի՝ առ 'ի մահ մարդկան ըմ-
պելոյ. որ զոսկի իբրև զկաւ առդնէ ա-
ռաջի իւր. և ձգի վստահութեամբ շրն-
չել զՅորդանան ըստ բերան իւր, և որ
չունի ինչ խէթ երկիւղի յումեքէ: Եւ
ո՞ք սլատսպարեսցի 'ի ժանեաց սորա.
ո՞ք թափեսցի 'ի բերանոյ նորա՝ եթէ
ոչ դու տէր՝ որ խորտակեցեր զգլուխ
վիշապիս մեծի: Օգնեա մեզ, սարգեա
տէր 'ի վերայ մեր զթևս քո՝ ապաս-
տան լինել ընդ նովաւ յերեսաց վիշա-
պիս՝ որ սնգեալ է զհեա մեր, և աս-
պարաւդ քո զերծո զմեզ յեղջերաց
նորա: Քանզի այս ինչ է հանապազորդ
ճիգն նորա, և այս միակ ցանկութիւն
նորա, կլանել զհոգիս՝ զորս ստեղծեր:

Գ. Աղաղակեմք առ քեզ, Աստուած
իմ, փրկեա զմեզ 'ի մշտնջենաւոր թըշ-
նամւոյն մերմէ, որ եթէ 'ի քուն իցեմք
և եթէ յարթմնի, եթէ կերիցուք և
եթէ արբցուք, և յամենայնի զոր ինչ
և գործեսցուք՝ զցայգ և զչերեկ կայ
'ի վերայ մեր նենգութեամբք և ա-
րուեստիւք. է զի յայտնի և է զի 'ի
ծածուկ ուղղել զթունալից նետս իւր

ընդդէմ մեր՝ սպանանել զանձինս: Սա-
կայն մեծ է անմտութիւնս մեր. զի հա-
նապազօր տեսանելով զվիշապն բա-
ցեալ ՚ի վերայ մեր զբերան իւր պատ-
րաստեալ ՚ի կլանել, ննջեմք և մեղկա-
նամք ՚ի հեղգութեանս մերում, իբրև
անվտանգս առաջի նորա՝ որ ոչ այլ ի-
միք՝ բայց միայն կորստեանս մերոյ փա-
փաքէ: Անքուն արթուն կայ թշնամին՝
առ ՚ի սպանանել, և մեր չիք փոյթ
արթնութեան՝ առ ՚ի պահպանութիւն:

Դ. Ահա ձգեաց առաջի ոտից մերոց
զորոգայթս իւր անչափս, և զամենայն
ճանապարհս մեր բազմօք լցոյց պատ-
րանօք՝ զբռամբ ածել զհոգիս մեր: Եւ
ո՞րք զերծ գտցի: Որոգայթս արկ ՚ի
ճոխութեան, որոգայթս յաղքատու-
թեան, որոգայթս ՚ի կերակուրս, յրո՛-
պելիս, ՚ի քուն և յարթնութեան, ՚ի
բանս և ՚ի գործս, և յամենայն ճանա-
պարհս մեր: Այլ դու, տէր, փրկեա
զմեզ ՚ի հաղբից որսորդաց և ՚ի բանից
խստաց. զի խոստովան լիցուք քեզ՝ ա-
սելով. Օրհնեալ տէր որ ոչ ետ զմեզ
յորս ատամանց նոցա: Անձինք մեր

որպէս ճ'նճղուկ ապրեցան յորոգայ-
 թից որսողաց . փշտեցան թակարդքն ,
 և մէք ազատեցաք :

ԳԼՈՒԽ ԺԷ .

Թե Սատուած յոյս և արդարոց .

Ա . Դու տէր , լոյս իմ , լուսաւորեա
 զաչս իմ , զի տեսից զլոյս՝ և գնացից 'ի
 լոյս քո , և մի ըմբռնեցայց 'ի թակարդս
 նորա : Զի ո՞ ոք գնասցէ ընդ բազմա-
 դէմ որոգայթս ընդ այսոսիկ՝ եթէ ոչ
 տեսցէ զնոսա , և զիանրդ տեսցէ՝ թէ ոչ
 լուսաւորեսցես լուսովդ քով . քանզի
 նա է հայր խաւարին որ թագուցանէ
 զորոգայթս իւր յաղջամիջի իւրում ,
 ունել 'ի նոսին զորս իցեն 'ի մթան անդ .
 որք որդիք են խաւարիս , որ ոչ տեսա-
 նէ զլոյս քո , ուր թէ ոք շքեացի՝ մի
 երկիցէ : Քանզի որ շքի 'ի տուէ ոչ
 գայթակղի . իսկ որ շքեցի 'ի գեշերի՝
 գայթակղի , զի լոյս չէ ընդ նմա : Դու

տէր լոյսդ՝ լոյս եւ որդւոցն լուսոյ . օր
աներեկ , յորում՝ գնան որդիք քո ան-
սասան . և զի որք հեռացեալ շրջեսցին
առ 'ի նմանէ՝ 'ի խաւարի են , զի ոչ
ուշինն ընդ իւրեանս զլոյսդ աշխարհի :

Բ . Ահա զօրհանասպազ տեսանեմք՝
զի որչափ տարագէմ որ 'ի ճշմարիտ
լուսոյդ հեռանայ՝ այնչափ թաւալի 'ի
խաւար մեղաւորաց . և որչափ կայ 'ի
խաւարի՝ ուր ուրեմն տեսանէ զոր 'ի
ճանասպարհի իւրում որոգայթս . ոչ
տեսանէ , բազումս յափշտակի , և ան-
կանի 'ի նոսին . և առ ահին՝ և զիւր իսկ
կործանումն 'ի մոռացօնս արկանէ : Իսկ
որ իւրում անծանօթ իցէ գայթակ-
ղութեան՝ ուր ուրեմն յառնելոյն լինի
'ի խնդիր , որչափ զի 'ի հաստատութե
զանձն իւր համարեսցի : Այլ դու ,
տէր , որ լոյս ես մտաց , լուսաւորեա
զաչս իմ՝ տեսանել և ճանաչել՝ զի մի
գնացից առաջի թշնամեաց իմոց : Քան-
զի 'ի կործանումն մեր ճգնի թշնամին
մեր . հալածեա զնա յերեսաց մերոց ,
որպէս հալի մոմ յերեսաց հրոյ : Նա
է , տէր , աւազակն հին և յետին՝ որ

սնդի յափշտակել զփառս .քո, զի բար-
 ձրացեալ և ուռուցեալ անկաւ 'ի վերայ
 երեսաց իւրոց . և 'ի բաց մերժեցեր
 զնա 'ի լեռնէ սրբոյ քումմէ և 'ի հրա-
 ցայտ քարանց՝ յորս չըջերն :

Գ . Եւ արդ՝ կեանք իմ, տէր Աս-
 տուած, քանզի անկաւ նա՝ ոչ դադա-
 րէ հալածել զորդիս .քո, և ցանկայ կո-
 րուսանել զայս .քո արարած յատե-
 լութիւն .քո, ո՛վ թագաւոր, զոր ստեղծ
 ամենակալ բարութիւն .քո ըստ սպա-
 կերի .քոյ՝ առ 'ի ժառանգել զփառս
 .քո՝ զոր կորոյս ամբարտաւանութեամբ
 իւրով : Այլ խորտակեա զնա հզօրդ
 մեր՝ մինչ չև ծախեալ իցէ նորա զգա-
 ոինս .քո . և լուսաւորեա զմեզ տեսա-
 նել զորոգայթս՝ զորս կազմեաց նա, և
 հասանել առ քեզ, ով խնդութիւնդ
 Իսրայելի : Զայս ամենայն քաջ գիտես
 դու տէր՝ որ գիտակ ես մտաց նորա և
 ապառում խորհրդոցն : Ոչ զայս ա-
 սեմ՝ զի ցուցից քեզ թէ տեսանես զա-
 մենայն՝ և ոչ ծածկի 'ի քէն խորհուրդ
 ուրուք . այլ առաջի ոտից մեծվայել
 չութեան .քոյ բողոք ունիմ զթշնամուոյ

խմէ՛ դատաւոր արդար • զի դատաւոր
պարտեալ զնա՛ զմեզ զորդիս քո փրկե-
կեսցես՝ զի զօրութիւն մեր դու ես :

Գ. Նենգաւոր է անբ թշնամին՝ և կամա-
կոր • ոչ դիւրաւ ՚ի յայտ գոն շրջանք
զնացից նորա , և ոչ ճանաչի տեսութիւն
զիմաց նորա՛ թէ ոչ դու լուսաւորեացես : Զի մերթ զայս , մերթ զայն՝
է զի դազան , է զի գայլ , երբեմն խաւար
և երբեմն լոյս յանձին կերպարանէ • և ըստ
անցնիւր հանգամանաց , տեղեաց և ժամանակաց ,
և բազմագէտ գիպացն յեղանակելոյ՝ նորօրինակս ՚ի
մէջ առնու փորձութիւնս : Առ ՚ի պատրել
զտխրեան՝ տխրի և նա • առ ՚ի խաբել
զխնգամիսն՝ բերկրութիւն յանձին
ցուցանէ • առ ՚ի նենգել զհոգեւէրս՝
կերպարանի ՚ի հրեշտակ լուսոյ • առ
նուաճել զհզօրս՝ ՚ի գառն փոխարկի •
առ գիշատել զհեզս՝ գայլ երեւի : Զովանս
սասանէ գիշերային արհաւրօք • զովանս
նետիւք ՚ի տուէ թուչելովք • զայլս
ըստ գիպաց ՚ի խաւարի անցելոց •
զկէսս յընթացս , և զայլս ՚ի ձեռն
դիւին միջօրէի : Ո՞րք քաջագէտ՝

առ 'ի զայսոսիկ 'ի միտ առնուլ, և ըզհանձար նորա ճանաչել. ո՞ յայանես, ցէ զտեսիլ կերպարանաց նորա, և զկըր ճուճն ատամանց նորա ո՞ գիտասցէ:

Ե. Ահա թագոյց 'ի կապարձս զնեաս իւր, և զորոգայթս իւր ծածկեաց ընդ երևութիւ լուսոյ. զոր ուր ուրեմն է նկատել՝ եթէ ոչ 'ի քէն տէր որ յոյսդ ես մեր՝ ընդունիցիմք լոյս՝ 'ի տեսանել զամենայն, զի ոչ միայն 'ի մարմնոյսն որոց դիւրին է լինել վերահասու, նա՛ և ոչ յախտս իսկ, այլ 'ի հոգեկան վարժս թագուցանէ զգաղտնորոգայթ հնարան. և ընդ սլատրուակաւ առաքինութեանց՝ զախտս զիւրև զգենու, և կերպարանի 'ի հրեշտակ լուսոյ: Այսու և առաւել քան զսոյն ձգի ընդդէմ՝ մեր ծնունդն Բելիարայ՝ այն է սատանայ, տէր Աստուած իմ. և արդ իբրև զառիւծ և զվիշապ՝ յայանի և 'ի ծածուկ, 'ի ներքոյ և արտաքոյ, 'ի գիւշերի և 'ի տունջեան ջանայ ճգնի յափըշտակել զանձինս մեր: Դու, տէր, զերծո զմեզ, որ փրկես զյուսացեալս 'ի քեզ. զի 'ի նա ցաւք մեր յորդես:

ցին, և դու գովեսցիս 'ի մեզ' տէր Աստուած մեր :

ԳԼՈՒԽ ԺԸ .

Յադագս բարերարոչքեանցն
Աստուծոյ .

Ա . Ես որդի աղախնոյ քոյ՝ նուիրեալս 'ի ձեռս քո՝ խոստովանեղէց քեզ նուաստ բանիւքս խմովք յամենայն սրտէ՝ ազատեցուցիչդ իմ . և յուշածից զամենայն զբարիսդ զոր արարեր ընդ իս 'ի մանկութենէ խմէ յամենայն կեանս իմ . քանզի գիտեմ թէ ապերախտութիւնս իմ բազմօք անհաճոյ է յաչս քս , որ արմատն է ամենայն ջարեաց հոգևորաց , և հողմն տապախարչ ամենայն բարեաց , և փակող աղբեր աստուածային ողորմութեանդ 'ի վերայ մարդկան , որով մեռեալք անմահանան , և կենդանիք 'ի գործ իւրեանց մահազգեաց գտանին՝ անօգուտ

մնալով յամենայնէ : Շնորհս կալայց
 քեզ տէր՝ զի մի գտայց անշնորհակա-
 լու՝ փրկիչ իմ որ փրկեցեր զիս . զի
 քանիցս անգամ և յափշտակեաց զիս
 վիշապն՝ դու տէր թափեցեր զիս ՚ի
 ժանեաց նորա :

Բ . Ի մեղանչելս իմում՝ մինչ դեռ նա
 հնարս հնարէր կլանել զիս , դու տէր ,
 սաշտապան կացեր ինձ յերեսաց նորա :
 Յանիրաւելս իմ առ քեզ՝ և յապախտ
 առնել զպատուիրան քո՝ նա մինչ
 ճգնէր յափշտակել զիս ՚ի դժոխս՝ դու
 արգելեր զնա : Ես զքեզ նշկահէի՝ և
 դու զիս սատասպարէիր : Ես չունէի
 առ ՚ի քէն երկիւղ՝ և դու զիս սահ-
 սպանէիր : Մեկնեալ ՚ի քէն և անձնա-
 մատն լինէի ՚ի ձեռս թշնամւոյս . այլ
 դու զնա սասանէիր՝ զի մի յափշտա-
 կեսցէ զիս : Այսպէս բարերար առ իս
 երևէիր , Աստուած իմ , և ես թշուա-
 ռացեալս առնուի ոչ ՚ի միտ : Քանզի
 բազում անգամ զերծուցեր զիս ՚ի ժա-
 նեաց դիւին , ապրեցուցեր ՚ի բերանոյ
 առիւծուն . և զյափշտակեալս ՚ի դը-
 ժոխս՝ հաներ ՚ի վեր . խոնարհեցայ մինչև

'ի դրունս դժոխոց՝ այլ դու կալար զիս՝
զի մի մտից ընդ այն :

Գ. Մերձեցայ 'ի մահ՝ և դու օգնեցեր՝ զի մի յափշտակեցայց . քանզի և 'ի մահուանէ իսկ մարմնոյ յուրով անգամ զերծուցեր զիս փրկիչ իմ՝ մինչդեռ արհաւիրք մահու ունէին զիս . գլտայ 'ի վտանգս՝ ընդ ծով և ընդ ցամաք, 'ի հրոյ և 'ի սրոյ՝ և յամենայն վտանգէ փրկեցեր . հանապազ մերձ առ իս կացեր, և ողորմութեամբ քով խնամեցեր : Գիտէիր դու, տէր, զի 'ի յափշտակել զիս մահու, ընդունէին դժոխք զհոգի իմ, և յաւիտեան դատապարտ գտանէի : Այլ քո ողորմութիւն և շնորհք կանխեցին առ իս, զերծուցեալ զիս 'ի մահուանէ մարմնոյ և հոգւոյ . զայս և աւաւել քան զսոյն ցուցեր ինձ երախտիս . այլ ես կոյր էի և ոչ ծանեայ՝ մինչև լուսաւորեցեր զիս : Եւ արդ՝ լոյս հոգւոյ իմոյ տէր Աստուած իմ, կեանք իմ՝ որով կեամ . լոյս աչաց իմոց՝ որով տեսանեմ . ահա լուսաւորեցեր զիս և ծանեայ զքեզ . զի քե կեամ և շնորհս քեզ ունիմ՝ թէ

պէտ և նուաաստ և խոտան իցէ, և անհաւասար երախտեաց՝ ըստ տանելոյ տկարութեանս իմոյ: Ձի դու ես միայն Աստուած իմ, արարիչ իմ բարեգութ, որ սիրես զանձինս մեր, և ոչ ատես զոք յորոց ստեղծեր: Ահա ես դուխս մեղաւորաց՝ զորս փրկեցեր՝ զի ցուցցես ամենեցուն զգթասէր բարերարութիւն քոյ:

Դ. Խոստովան եղէց քեզ զերախտիս քո զմեծամեծս, զի փրկեցեր զես ՚ի դժոխոց ներքնոց՝ միանգամ և երկիցս և երկիցս՝ նա և բազում անգամ. և ես յամենայնի ՚ի դժոխս անդ ակնարկի առնէի՝ իսկ դու վերականգնէիր. ուր բազում անգամ ՚ի դէպ էր քեզ առնել ընդ իս ըստ արդարութեան: Այլ դու կամեցար՝ զի սիրես զհոգիս, և ՚ի մոռացօնս արկանես զմեզս մարդկան՝ զի ապաշխարեսցեն: Աստուած բազում ողորմ, տեսանեմ և իսելամուտ լինիմ լուսովք քով, և կորնչի անձն իմ յողորմութիւնս քո մեծս՝ զի փրկեցեր զհոգի իմ ՚ի դժոխոց ներքնոց, և ՚ի կեանս ինձ առաջնորդեցեր. քանզի էի

'ի մահուան և դու յարուցեր զիս : Արդ
քո եղիցի ամենայնն որով կեամ, և զիս
քեզ մատուցանեմ : Հոգի իմ, սիրտ և
մարմին, և ամենայն կեանք 'ի քեզ կեց-
ցեն՝ կեանք իմ քաղցր, քանզի ամենայ-
նիւ ազատեցեր զիս՝ զի ամենայնիւ ժա-
ռանդեսցես, ամենևին նորոգեցեր՝ զի
ամենևին ստասցիս : Սիրեցից զքեզ տէր
զօրութիւն իմ, սիրեցից զքեզ անպա-
տում ցնծութիւն իմ, և 'ի քեզ ապրե-
ցայց և ոչ յիս : Կեանքս իմ կորու-
սեալ 'ի թշուառութեան իմում՝ վե-
րահանգնեցաւ ողորմութեամբդ քով՝
որ ես Աստուած ողորմած և բարե-
գութ 'ի հազարս՝ որք սիրենն զքեզ :

Ե. Տէր Աստուած իմ, որ սրբեսդ
զիս՝ հրամայեցեր յօրէնս քո՝ սիրել
զքեզ յամենայն սրտէ իմմէ, և յամե-
նայն անձնէ իմմէ, և յամենայն մտաց
իմոց, և յամենայն զօրութենէ իմմէ և
յամենայն ճգանց իմոց, նա՛ և 'ի խո-
րութենէ սրտիս, ըստ ամենայն ժա-
մուց և բոսկից յորս վայելեմ յողոր-
մութեան քում, զի յամենայն ժամ
կորնչէի արդեօք՝ եթէ ոչ հանապազ

զիս կենագործեսցես, և յամենայն ժա-
 մուս զիս ընդ պարտիւք գրաւականես-
 ցես՝ որ յամենայնի զեղուս զինև զքո
 երախտիս: Արդ որպէս չիք ժամ կամ
 րոպէ յամենայն կեանս իմ՝ յորում
 ոչ վայելցից ՚ի բարերարութեանդ
 քում, այսպէս և չէ օրէն զի անցանիցէ
 վայրկեան՝ յորում ոչ առաջի աջաց
 ունիցիմ զքեզ ՚ի յիշողականիս իմում,
 և ոչ սիրեցից զքեզ յամենայն զօրու-
 թենէ իմմէ: Այլ չեմ առ այս ձեռն-
 հաս՝ թէ ոչ դու տացես ինձ յորմէ
 են ամենայն տուրք բարիք և պարգևք
 կատարեալք՝ իջեալք առ ՚ի հօրէն լու-
 սոյ յորում չիք փոփոխումն և կամ
 շրջելոյ ստուեր: Զի չէ վաղասւաց կամ
 երագընթաց, այլ քո ողորմութիւնդ,
 զի սիրեցից զքեզ: Քո է տէր պարգևս՝
 որոյ են ամենայն բարիք: Հրամայեա
 սիրել զքեզ, տուր զոր հրամայես, և
 պատուիրեա զոր կամիս:

ԳԼՈՒԽ ԺԹ .

Յաղագս Լուսնդեան սիրոյ .

Ա . Սիրեմ զքեզ Աստուած իմ, նա
 և հանապազ իսկ զնոյն փափաքեմ . զի
 քաղցր ես դու քան զմեզր , պարարիչ
 քան զկաթն , և սլայծառ քան զլոյս . և
 յայն սակս ըղձալի ես ինձ քան զոսկի
 և զարծաթ՝ և քան զամենայն ականս
 պատուականս . դժկամակ եմ ընդ որս
 գործեմ՝ ի կենցաղումս՝ առ քաղցրու
 թեան քոյ , և փառաց տան քո զոր սի
 րեցի : Ո՛վ հուր մշտավառ և անշէջ . ո՛վ
 սէր որ յեռանդեան ես հանապազ , և
 ոչ գիտես ցրտանալ՝ բորբոքեա և զիս :
 Վառեցայց իսպառ ՚ի քէն . զի և իս
 պառ սիրեցից զքեզ : Նուազ սէր ունի
 ՚ի քեզ՝ որ զայլ ինչ սիրէ ընդ քեզ՝ որ
 ոչ վասն քո իցէ : Սիրեցից զքեզ տէր՝
 զի դունախ զիս սիրեցեր . այլ ո՛ւր բանք՝
 յարտայայտութիւն տարացուցի սիրոյ

քոյ մեծի առ իս, վասն անթիւ բարեացդ քոց՝ որովք ՚ի սկզբանէ խնամարկեցեր զիս:

Բ. Յետ երախտեաց արարչութեդ՝ ուր ՚ի սկզբան անդ ստեղծեր զիս յօջընչէ ըստ պատկերի քում՝ պատուեալ բարձրացուցեր զիս ՚ի դասս արարածոց քոց զորս արարեր. զարդարեցեր լուսով երեսաց քոց՝ հաստատելով ՚ի մուտս սրտի իմոյ, որով ՚ի բաց զատուցեր յանդգայից և ՚ի զգայնոց անասնոց, սակաւ ինչ նուազ կարգեալ քան զհրեշտակս: Նա՛ և այս իսկ դոյզն ինչ թուեցաւ առաջի աստուածութեանդ քոյ, զի զօրհանապազ առանձին և մեծամեծ պարգևօք քոյոց երախտեաց՝ առանց ինչ խտրանաց խնամարկեցեր զիս, և իբրև զմանուկ մատաղ առատ մխիթարութեամբդ դիեցուցեր զիս և զօրացուցեր: Եւ առ ամենայնիւ պաշտել զքեզ՝ զամենայն ինչ զոր և արարեր՝ յիմ ծառայութիւն կարգեցեր:

ԳԼՈՒԽ Ի .

Յադագսս կոչաձևոյ Սարտուծոյ զա-
մենայն ինչ ընդ ծառայոչքեամբ
մարդկան .

Ա . Զամենայն ինչ նուաճեցեր ընդ
ոտիւք մարդկան՝ զի մարդն կեթ ամե-
նեկին նուաճեսցի ընդ քե . և զի ամե-
նայնիւ քո լինիցի մարդն՝ տիրեաց մարդ
'ի վերայ ամենայն գործոց քոց : Զար-
տաքինս ամենայն ստեղծեր վասն մար-
մնոյ . զմարմին վասն հոգւոյ . իսկ զհո-
գի վասն քո . զի 'ի քեզ միայն մտադիր
գտցի , և զքեզ միայն տիրեսցէ . զքեզ
'ի սէտս մխիթարութեան ժառան-
գեալ , և զստորինս՝ 'ի սէտս սպասու :
Ար ինչ կայցէ 'ի շրջանս երկնից՝ ստու-
րև է քան զհոգի մարդոյ՝ որ հաստե-
ցաւն 'ի ստանալ զբարին գերազոյն՝
որով կցորդ գտցի երանութեան . ընդ
որում եթէ լծորդեսցի՝ 'ի վերոյ անցցէ

քան զամենայն փոփոխելիս որ ընդ ստորևս . և որում փափաքէրն՝ տեսցէ ակներև զդէմս մեծվայելչութեան նորա և յաւիտենական անմահութեան : Անդ վայելեսցէ 'ի գերահրաշ բարութիւնսն 'ի տանն տեառն . առ որովք զամենայն զոր տեսանեմքս իբրև յոչ ինչ են համարեալ . զոր ոչ աչք տեսանեն և ոչ ականջք լսեն և ոչ 'ի սիրտ մարդկան մերձենան՝ զոր պատրաստեաց Աստուած սիրելեաց իւրոց . և զայս հանդերձեալ ես տէր տալ հոգւոց . սոքօք զօրհանապազ ուրախ առնես զանձինս ծառայից քոց , տէր ոգեսէր :

Բ . Մեծ է զարմանս , տէր Աստուած իմ , որ զպատկերդ քո և զնմանութիւն պատուասիրես . քանզի և մարմնոյս մերում որ ապականացուն է և խոտան՝ շնորհեցեր զպայծառութիւն երկնից 'ի տեսանել՝ 'ի ձեռն անխոնջ պաշտօնէիցդ քոց՝ արևու և լուսնի . որք ըստ պատուիրանաց քոց զօրհանապազ ըզցայդ և զցերեկ սպասահարկու լինին որդւոցդ քոց . ընդարձակեցեր զմտք-

րուծիւնն օդոց՝ առ ՚ի շնչել. զձայնից
 զանազանութիւնն առ ՚ի լսել. զբուր-
 մանց քաղցրութիւնն՝ առ ՚ի հոտոտել.
 զքմաց որակս՝ առ ՚ի ճաշակել. թանձ-
 րութիւնն ետուր մարմնոց՝ առ ՚ի շօշա-
 փել : Նսպաստաւորս շնորհեցեր պի-
 տոյից նորա զգրաստս . նա՛ զթռչունս
 երկնից, զձկունս ծովու և զբերս եր-
 կրի՝ ՚ի կազգուրումն կենաց : Դեղո-
 րայս ստեղծեր յերկրէ՛ ըստ ամենայն
 ակտից . առ մէն մի արկած և զսփո-
 փանս սրատրաստեցեր . զի ողորմած ես
 և զթած . և գիտես զկազմութիւնս մեր
 արարիչդ մեր . և մեք ամենեւեկեան իբրև
 զկաւ եմք ՚ի ձեռս քո :

ԳԼՈՒԽ ԻԱ.

Յադագս յոչ ածկոյ զառաւելոյնքիւն
 Երկնաւոր խորհրդոց՝ 'ի քննուշրեան
 Ժամանակաւոր քարեացս .

Ա. Բացան ինձ ողորմութիւնք քո
 լուսովք քով մեծաւ . հայցեմ զառա-
 ւելութիւն լուսոյդ՝ առ առաւել ևս
 ընդարձակութիւն ողորմութեանդ . զի
 'ի փոքունց աստի զքո մեծամեծս 'ի
 միտ առնումք, և 'ի տեսանելեացս զան-
 տեսանելիս՝ տէր Աստուած սուրբ և
 բարերարդ մեր : Զի եթէ, տէր իմ,
 վասն այսր խոտան և ասպականացու-
 մարմնոյ մեծամեծս և անթիւս սրա-
 րաստեցեր բարերարութիւնս յերկնից
 և յօդոց, յերկրէ և 'ի ծովէ, 'ի լու-
 սոյ և 'ի խաւարէ, 'ի տապոյ և 'ի հո-
 վանւոյ, 'ի ցօղոյ և 'ի տարափոյ, 'ի հող-
 մոց և յանձրեաց, 'ի թռչնոց և 'ի ձը-
 կանց, յանասնոց և 'ի ծառոց, բող-

մութեամբ խոտոց և բուսոց երկրի և
ամենայն արարածովք քովք՝ մի ընդ
միոց սպաս հարկանել մեզ ըստ ժամա-
նակին՝ առ ՚ի բաց վարել զտաղտկու-
թիւնս մեր, իսկ զհարդ մեծամեծք ի-
ցեն և ընդ թուով անպարունակք բա-
րութիւնքն՝ զոր պատրաստեցեր սիրե-
լեաց քոց յերկնաւոր հայրենիան՝ ուր
տեսցուք զքեզ դէմ յանդիման. զի թէ
՚ի բանտարկութեանս սյսչափ՝ քանի՞օն
ապա յարբունիս :

Բ. Մեծ և անհամար են գործք քո
տէր թագաւոր երկնից. զի ուր այս
ամենայն բարի են յոյժ և ակորժա-
կան զոր միօրինակ շնորհեցեր բարեաց
և չարաց, յի՞նչ հանգամանս իցեն՝ զորս
միայն վասն առաքինեաց գանձեցեր :
Զի ուր բազմահամար են և բազմօրի-
նակ պարգևք քո՝ զոր առատաձեռնես
բարեկամաց քոց և թշնամեաց, իբր ա-
ռաւելեալ իցեն և յոլովադէմ, քաղցր
և բերկրական, զորս միայն բարեկա-
մացդ քոց ունիցիս շնորհել : Թէ յար-
տասուաց աւուրս սփոփութիւն այս-
չափ՝ իսկ որսիսիք յաւուրս հարսա-

նեաց: Թէ բանտս՝ այսպիսիս ունիցի
բերկրութիւնս, քանիօն սպա հայրե-
նիքն: Ոչ տեսանեն աչք զոր պատրաս-
տեցեր, տէր, սիրելեաց քոց՝ առանց
քո: Ըստ բազմապատիկ շնորհաց քոց՝
բազում են և քաղցրութիւնք զոր պա-
հեցեր երկիւղածաց քոց:

Գ. Մեծ էս դու և անչափ, տէր Աս-
տուած իմ. չիք եզր սպառուածոյ մե-
ծութեանդ քոյ. ոչ թիւ իմաստու-
թեան քոյ, ոչ չափ բարեգթութեանդ
քոյ, ոչ վախճան. ոչ դուամար և ոչ
չափ հատուցմանց քոց. այլ որպէս մեծ
էս դու՝ մեծամեծ են և պարզէք քո.
զի դու էս յաղթանակ և պարզի ամե-
նայն քաջամարտիկ նահատակաց քոց:

Գ Լ ՈՒԽ Ի Բ .

Յադագս'ի բաց բառնայոյ աստուշա-
ծայիև քաղցրոշքեան զամենայն ըզ-
դառնոշքիւն աստի կենցաղոյս .

Ա . Այս են բարերարութիւնք քո
մեծամեծք տէր Աստուած՝ որ զսուր-
բըս սրբէս . որովք ընուս զանանկու-
թիւն որդւոյ քոց քաղցեւոց . զի դու
ես յոյս լքեւոց . դու պսակ ակնկալու-
թեան զարդարեալ փառօք՝ յաղթա-
կանաց պատրաստեալ . դու մխիթա-
րութիւն մշտնջենաւոր՝ որ միայն չնոր-
հես զքեզ՝ որք արհամարհեցին զմխի-
թարութիւն զայսր աշխարհի՝ վասն
քոյոյ յաւիտենական մխիթարութե .
զի այսու մխիթարեալքն քումդ անար-
ժան են սփոփութեան : Այլ չարչա-
րեալքն աստէն՝ 'ի քէն մխիթարին , և
կցորդեալքն չարչարանաց քոց՝ կցորդ-
լինին և մխիթարութեանդ . քանզի չէ

մարթ ումէք սփոփուածիւն գտանել 'ի
 յաւիտեանս յերկօսին • և ոչ կարէ ոք
 աստ և 'ի հանդերձեալն ուրախուածեան
 հանդիպել • այլ հարկ է զմին կորու
 սանել՝ որ զմիւսն խնդրլցէ ժառանգել :

Բ • Ի խորհելա զայս , տէր մխիթա
 րիչ իմ , ջառնում յանձն մխիթար գտա
 նել 'ի կենցաղումս , զի արժանի երևե
 ցայց յաւիտենական քումդ սփոփու
 թեան • քանզի անշուշտ 'ի բաց թողու
 զքեզ՝ որ այլով իւրք ընտրէ սփոփու
 թեան հանդիպել՝ և ոչ քե : Ազաչեմ
 զքեզ 'ի ձեռն քո , ճշմարտութիւն
 յաւիտենական , մի թողուր զիս զսնո
 տեաց երթալ զհետ • այլ դառնասցի
 ինձ ամենայն՝ զի դու միայն քաղցրաս
 ցիս անձին իմոյ , որ քաղցրութիւնդ
 ես անբաւ , որով ամենայն դառինք
 քաղցրանան :

Գ • Քոյինդ քաղցրութիւն քաղցրա
 ցոյց Ստեփանոսի զքարինս տանջա
 նաց • քոյդ քաղցրութիւն զկասկա
 րայս երանելոյն Լաւրենտիոսի քաղ
 ցրացոյց • վասն քումդ քաղցրութեան
 զնային առաքեալքն ցնծութեամբ յե

րեսաց ատենին՝ զի վասն անուան քո
արժանաւոր գտան անարդանաց • ըն-
թանայր Անդրէաս առ խաչն յապա-
հովս, զի առ քոյդ քաղցրութիւն մեր-
ձենայր • այս քո քաղցրութիւն զօրա-
ցոյց զգլուխն առաքելոց՝ զկախաղանն
ընտրել անձին և զխաչ, և այլ ոք ոչ
ինչ խեթացաւ ընդ սրով գնել զգլուխն :
Ի գին այսր ետ Բարթոլղիմէոս զմօրթ
իւր • առ ՚ի զայս ճաշակել՝ արբ Յով-
հաննէս անվէհեր զբաժակն թունա-
լից • զայս ճաշակեալ Պետրոսի՝ մոռա-
ցաւ զստորինս ամենայն, և աղաղա-
կեաց իբրև զարբեալ ասելով • Տէր, բա-
րւոք է մեզ աստ լինել՝ արասցուք ե-
րիս տաղաւարս, աստ կացցուք,
ստորհեսցուք • զի չեմք կարօտեալ իւրիք :
Շատ է մեզ տէր տեսանել զքեզ, շատ
է, ասէ, այսչափ քաղցրութեամբս յա-
գենալ : Կաթիլ մի ճաշակեաց նա ըզ-
քաղցրութեան, և ամենայն քաղցրու-
թիւն նմա տաղտկացաւ : Իսկ զինչ ար-
դեօք ասէր՝ թէ զմեծ և զանչափ ըզ-
քաղցրութիւն աստուածութեանդ ճա-
շակէր, զոր պահեցեր երկիւղածաց

քոյ : Չայս քո անպատում քաղցրու
 թիւն ճաշակեաց և կոյսն այն զորմէ
 ընթեռնումք թէ խնդագին և փառօք
 իմն ընթանայր 'ի բանտ' իբրև 'ի կո
 չունս հրակիրեալ : Ինձ թուի եթէ զնո
 ըին քաղցրութեան էառ զճաշակ և նա
 որ ասացն . Չիարդ մեծ է քաղցրու
 թիւնդ քո տէր՝ զոր պահեցեր երկիւ
 ղածաց քոյ . որ քարոզ կարդայր ,
 ճաշակեցէք և տեսէք զի քաղցր է տէր .
 քանզի այս այն երանութիւն է , տէր
 Աստուած մեր՝ որում մնամք ընդու
 նել 'ի քէն . յոյր սակս զօրհանապաղ
 'ի դրունս քո զինուորիմք , և մեռա
 նիմք վասն անուանդ քոյ՝ զի 'ի կեանս
 քո և 'ի քեզ կեցցուք :

ԳԼՈՒԽ ԻԳ .

Յադագս զի յԱստուած հաստատել
արժան է զամենայն ակրեկարու-
րիշն մեր և զիդձս սրտի .

Յ . Գուռ տէր ակնկալուածիւն իա-
րայելի , ցանկուածիւն մեր՝ առ որ ձգի
հանապազ սիրտ մեր , փուլթա և մի
յապաղեր : Արի , երագեա և եկ՝ յու-
սուցանել մեզ ՚ի բանտի ասա խոստո-
վան լինել անուան քում՝ զի փառա-
ւորեսցուք ՚ի լոյս քո : Բաց զականջս
քո աղաղակի արտասուաց որբոց քոց՝
որք կարգան առ քեզ . հայր մեր՝ տուր
մեզ այսօր զհաց մեր հանապազորդ՝
ոյր զօրութեամբ կեամք ՚ի տուէ և ՚ի
գիշերի՝ մինչև հասցուք ՚ի լեառն սուրբ
քո ՚ի Քորեբ . և ես կրտսեր եմ ՚ի փո-
քունս տան քո , Աստուած հայր և զօ-
րութիւն իմ , երբ եկից և երևեցայց ե-
րեսաց քոց . զի որ արդ ՚ի ժամուս

խոստովան լինիմ քեզ՝ յայսմ հետէ և
յաւխտեանս խոստովան եղէց զնոյն :
Երանի է ինձ թէ գտայց 'ի կեանս փա-
ռաց քոց . և ո՞րք շնորհեսցէ ինձ զայդ՝
Թողուլ ինձ ժամանել առ քեզ :

Բ. Գիտեմ տէր , գիտեմ և խոստո-
վան լինիմ զանարժանութիւնս իմ՝
առ 'ի մտանել ընդ յարկաւ քով , այլ
արա վասն անուանդ քում՝ և մի խո-
րասոյզ առներ զառ 'ի քեզ յուսա-
ցեալ զծառայս քո : Ո՞րք մտցէ 'ի սըր-
բութիւնս քո՝ առ 'ի միտ առնուլ զգօ-
րութիւն քո՝ եթէ ոչ դու բանայցես .
Իսկ ո՞րք բանայցէ 'ի փակելդ քո : Զի ե-
թէ կործանես՝ ոչ որք է որ շինէ . և թէ
'ի բաց հանցես զորք՝ ոչ որք իցէ որ բաց-
ցէ նմա . թէ ունիցես զճուրս՝ ամենայն
ինչ ցամաքեսցի , և թէ արձակեսցես՝
դոգ յեղաշրջեն զերկիր . թէ զամենայն
զոր արարերդ յոչ ինչ դարձուցես՝ ո՞ր
որք ընդդէմ քո բարբառեսցի՝ բայց մի-
այն մշտնջենաւոր բարութիւն ողոր-
մութեանդ քոյ՝ որով արարեր զամե-
նայն՝ ընդ որ և հաճեցար : Դու ստեղ-
ծեր զմեզ՝ արարիչդ աշխարհի , ինա-

մակալ լեր մեզ. դու հաստեցեր զմեզ,
մի մերժեր զի գործած եմք ձեռաց
քոց: Տէր Աստուած մեր՝ մեք կաւ և
որդն՝ չեմք բաւական մտանել 'ի յա-
վտենականութիւնդ քո՝ թէ ոչ դու
առաջնորդեսցես՝ որ յոչնչէ արարեր
զմեզ:

ԳԼՈՒԽ ԻԴ .

Թե յԱստուծոյ ե փրկոչքիւն մեր .

Ա. Ես գործ ձեռաց քոց՝ խոստո-
վան լինիմ քեզ երկիւղել քով, զի ոչ
յաղէղն իմ յուսացեալ եմ, և ոչ սուր
իմ կեցուցանէ զիս, այլ աջ քո և բա-
ղուկ քո և լոյս երեսաց քոց. ոչ լինիմ
յուսակտուր, զի յոյս իմ դու ես՝ որ
արարեր զիս, որ ոչ թողուս զյուսա-
ցեալս 'ի քեզ: Դու ես տէր Աստուած
մեր՝ քաղցր և երկայնամիտ, որ ոլոր-
մութեամբդ խնամարկես զամենեսեան:
Զի եթէ մեղիցեմք քո եմք, և եթէ ոչ՝
քո եմք դարձեալ, զի հուպ եմք առ

քեզ: Այլ մէք իբրև զտերևս եմք և
անտախ է ամենայն մարդ կենդանի, և
իբրև զհողմ են կեանք մեր 'ի վերայ
երկրի: Մի բարկանար 'ի կործանիչ
սրբոցդ քոց՝ զի դիտես դու զբնուածիւնս
մեր՝ տէր Աստուած մեր:

Բ. Եւ արդ տէր, անբաւելի զօրու-
ածիւն՝ ցոյց զկարողութիւն քո ընդ-
դէմ տերևոց յափշտակելոց 'ի հողմոց,
և հալածեա զխուիւս ցամաքեալս: Մի-
թէ դատապարտ առնիցես զուն մի՝
արքայդ Իսրայելի յաւիտենական: Ի
մահ վարեացես զլու մի: Լուաք վասն
ողորմութեան քոյ տէր՝ զի դու ոչ առ-
նես զմահ, և ոչ խնդաս ընդ կորուստ
մեռելոց: Վասն այսր՝ աղաչեմք զքեզ
տէր՝ մի թողուր իշխել 'ի վերայ ստեղ-
ծուածոցդ քում՝ զոր ոչն ստեղծեր՝
զի թէ ընդ կորուստն զզջանաս դու,
տէր, զինչ արդելցէ զամենակալդ՝ միշտ
ուրախանալ ընդ մեր փրկութիւն: —
Թէ կամիս՝ կարող ես զիս փրկել. իսկ
ես թէ և կամիցիմ՝ չեմ բաւական .
մեծ է բազմութիւն թշուառութեանց
խոց զինև:

Գ. Ինչ անկ է խնդրելն, իսկ զկատարումն ոչ գտանեմ. ոչ կարեմ զբարին խնդրել՝ եթէ ոչ դու կամիցիս, և ոչ զոր կամիմն կարեմ՝ (թէ ոչ կարողութիւն քո զիս զօրացուսցէ. և զոր կարեմն ոչ կամիմ, (թէ ոչ՝ կամք քո որպէս յերկինս նոյնպէս և յերկրի աստ կատարեսցին : Չոր կամիմն և կարեմ՝ ոչ գիտեմ, մինչև իմաստութիւն քո զիս լուսաւորեսցէ : Նա՛ (թէ և գիտացից զկամս և զկարողութիւնս՝ յանօգուտս և ՚ի նանիր անցանէ իմաստութիւն իմ՝ (թէ ոչ ձեռնտու լիցի իմաստութիւնդ քո ճշմարիտ :

Դ. Ընդ քոյով կարողութեամբ են ամենայն ինչ. և չիք ոք՝ որ հակառակորդ գացի կամաց քոց, տէր ամենակալ, որ զսկիզբն ունիս զամենայն մարմնոց. և զոր ինչ կամիս առնես, յերկինս և յերկրի, ՚ի ծովս և յամենայն խորս : Եղիցին կամք քո ՚ի վերայ մեր՝ յորոց վերայ կոչեցեալ է անուն քո. զի մի ՚ի կորուստ մատնեսցի գեղեցիկ հաստուածս քո՝ զոր ստեղծեր վասն փառաց քոց : Եւ զինչ է մարդ կանան

ցածին, որ կեայ և ոչ տեսանէ զմահ, և մասնէ զանձն իւր 'ի ձեռս դժոխոց՝ եթէ ոչ դու փրկեսցես՝ կեանքդ ամենեցուն՝ որով կեան ամենեքեան :

ՔԼՈՒԽ ԻԵ .

Յադագս տկարոշքեան վարդկային կամաց առ 'ի բարին՝ առանց աւտոշածային շնորհաց .

Յ . Ահա թէպէտ և խոստովան եղէ քեզ ցնծութիւն կենաց իմոց՝ տէր Աստուած իմ, կեանք հոգւոյ իմոյ . այլ էր երբեմն ինձ յուսալ 'ի զօրութիւն իմ՝ որ և ոչ իսկ էր ինչ : Եւ այն ինչ զայսօրինակ ընթանայի՝ ուր կարծէի հաստատուն կալ՝ անդ անկայ, և ընդ կրունկն մնացի՝ և ոչ խաղացի յառաջ . և ուր կարծէի ժամանել՝ վերջացեալ գտայ . այս է տարացոյց իմում՝ զօրութեան : Արդ ծանեայ զի լուսաւորեցեր զիս՝ զի զոր ինչ կարծել յիս

մարթ էր՝ յոչ ինչ համարեցայ: Քան-
զի ասէի, զայս արարից, զայն ինչ կա-
տարեցից, ուր ոչ զայս և ոչ զայն ՚ի
գլուխ հանէի: Աերահաս էին կամք և
ոչ կարողութիւն. ժամանեաց կարո-
ղութիւն՝ այլ ոչ և կամք. զի վստա-
հացեալ էի յիմ զօրութիւն:

Բ. Եւ ահա խոստովան եղէց քեզ
տէր Աստուած իմ՝ հայր երկնի և եր-
կրի. զի ոչ զօրութեամբ իւրով զօրա-
նայ հզօր՝ սլանծալ առաջի քո ըստ ան-
միտ յանդգնութեան ամենայն մար-
մնոյ: Քանզի ոչ է մարդկան՝ կամիլ
զոր կարասցէ, կամ կարող լինել ո-
րում կամեցաւն. և կամ գիտել զոր
կամեցաւն և կարաց. այլ ՚ի քէն ուղ-
զին գնացք առն, յաւէտ որոց խոս-
տովանեսցին առ ՚ի քէն ուղղութեան,
և ոչ յանձանց: Արդ աղաչեմք զզը-
թութիւնդ քո՝ փրկեա զմեզ՝ զորս ըս-
տեղծեր, զի թէ կամիս՝ կարող ես փրկ-
կել զմեզ. և ՚ի քո կամս է զօրութիւն
փրկութեան մերոյ:

ԳԼՈՒԽ ԻԶ .

Յադագս ևսխնի բարերարոչքեանց
Սատուծոյ .

Ա . Յուշ եղիցին քեզ ոլորմութիւնք
քո առաջինք , որովք կանխեցեր առ
մեզ 'ի սկզբան անդ օրհնութեամբ
քաղցրութեան քոյ : Մինչ չև ծնեալ
էր իմ որդւոյս աղախնոյ քոյ՝ տէր
յոյս իմ յորովայնէ մօր իմոյ՝ ժամա
նեցեր առ իս , պատրաստեալ շաւիղս՝
գալ և հանդիպել վառաց տան քոյ :
Մինչ չև ստեղծեալ էի յարգանդի՝
ծանեար զիս . և մինչ չև ելեալ էի յո
րովայնէ՝ սահմանեցեր վասն իմ՝ որ
քեզն հաճոյ թուեցաւ : Չգիտեմ ես
որ ինչ գրեալ իցէ 'ի թագնութեան
գրոց քոց զինէն , յայն սակս և սրակու
ցեալ եմ ահիւ :

Բ . Դու գիտես իմ իմիք ակն ունի
ցիմ ընդ շրջանս աւուրց և ամաց մինչև
'ի հազար ամ՝ որ եղեալն է առաջի յա

Լիտեննականու թեանդ քոյ • և որ ապա-
 գայն է՝ նա եղեալ իսկ է: Իսկ ես որ
 կամս ՚ի մթագին գիշերիս՝ ոչ գիտեմ
 զայս • ահ և երկիւղ շուրջ պատեալ են
 զինև, տեսեալ զվտանգս ամենայն ուս-
 տէք • քանզի թշնամիք բազումք և ազգի
 ազգի վարանք տարակուսանաց շուրջ
 պատեալ պաշարեալ են զանձն իմ: Եւ
 պակասէի արդեօք ՚ի յուսոյ՝ թէ ոչ
 յայսչափ չարիս մերձ լինէր առ իս օգ-
 նու թիւն քո:

Գ • Այլ յոյս իմ ՚ի քեզ է, քաղցրա-
 գու թ թագաւոր Աստուած իմ • և խոր-
 հըրդածու թիւն բազում ողորմութեդ
 քոյ ՚ի վեր ամբառնայ զմիտս իմ: Եւ
 նախագրու տարացոյցք ողորմութեդ
 քում կանխեցին առ իս՝ մինչ չև ծնեալ
 էր իմ • և արդ զեղան զինև՝ պարգևօք
 հանդերձեալ բարեգթութեանց քոյ
 բարեաց և կատարելոց՝ զոր գանձեցեր
 բարեկամացդ քոյ, որք զօրացուցա-
 նեն զակնկալութիւնս իմ ՚ի քեզ խրա-
 խանալ տէր Աստուած իմ, ուրախու-
 թիւն սուրբ և կենդանի • որով հանա-
 պալ ուրախ առնես զմանկութիւնս իմ:

ԳԼՈՒԽ ԻԷ .

Յադագս հրեշտակաց՝ ՚ի պահպա-
նոչքիչև մարդկան կարգելոց .

Յ . Սիրեցեր զիս սէր իմ՝ մինչ չև
իմ սիրեալ էր զքեզ . և ըստ սլատկերի
քոյ ստեղծեալ զիս՝ նախադասեցեր
քան զամենայն արարածս քո : Սպա-
սահարկու եղէց մեծի շնորհիս ՚ի ճա-
նաչելս զքեզ՝ յոյր սակս և ստեղծեր
զիս :

Բ . Նա՛ ՚ի վեր քան զայսոսիկ ա-
րարեր զհրեշտակս հոգիս՝ յիմ սակս .
որոց պատուիրեցեր պահպանել զիս
յամենայն ճանապարհս իմ, զի մի հա-
րից զքարի զոտն իմ : Սոքա պահա-
պանք են ՚ի վերայ պարսպաց քաղա-
քին նորոյն Երուսաղեմի . և լերինք
չըջապատ զնովաւ, հսկելով և պահ-
պանելով արթնուլթեամբ զժողովուրդ
քո . զի մի արդեօք յափշտակեսցէ որ-

սէս զառիւծ՝ զանձինս մեր՝ առ ՚ի չգոյէ
 փրկողի, օճն հին հակառակորդն մեր
 սատանայ. որ իբրև զառիւծ գոչէ շուրջ
 յածեալ՝ առ ՚ի կլանել: Քաղաքացիք
 են սոքա երանաւէտ քաղաքին վեր-
 նոյն Երուսաղէմի՝ որ է մեր մայր, ա-
 ռաքեալ ՚ի սպասաւորութիւն՝ վասն
 որոց ժառանգելոցն են զփրկութիւն
 առ ՚ի ազատութիւն ՚ի թշնամեաց իւ-
 րեանց, սլահպանել յամենայն ճանա-
 պարհս իւրեանց, զօրացուցանել և
 ազգել, և զաղօթս որդւոց քոց մատու-
 ցանել առաջի փառաց մեծվայելու-
 թեանդ քոյ:

Գ. Սիրել սիրեն նոքա զքաղաքա-
 կիցս իւրեանց, որովք ակն ունին նորո-
 գել անդէն զխրամատութիւն կործան-
 ման իւրեանց: Յայն սակս մեծաւ ջա-
 նիւ և արթուն տքնութեամբ մերձ կան
 մեզ, ընթանան յամենայն ժամու և ՚ի
 տեղւոջ խնամ կալեալ պիտոյից մերոց,
 և պատգամաւոր լեալ ընդ մեզ և ընդ
 քեզ տէր՝ զիղձս մեր և զհառաչանս առ
 քեզ մատուցանեն, ընդունել վասն մեր
 առ ՚ի քէն զգթութիւնդ, և հասուցա-

Ինչ առ մեզ զփափաքելին՝ զօրհնու-
 թիւն քոյոց շնորհաց : Քանզի ընդ մեզ
 չքլին յամենայն ճանապարհս մեր , և
 մտանեն ելանեն ընդ մեզ . միտ եղեալ
 բարեպաշտ և վայելուչ գնացից մերոց
 'ի մէջ խեղաթիւր ազգին . ճգանց և
 փափաքանացս՝ որովք խնդրեմք զար-
 քայութիւն քո և զարդարութիւնն նո-
 րա , ահիւ և երկիրդիւ ծառայութեա ,
 և յուրախութեանս 'ի քեզ՝ 'ի խնդու-
 թիւն սրտից մերոց : Նսրաստ ընծայեն
 վաստակաւորաց , խնամածու լինին
 հանդարտելոց , զմարտիկս զօրացուցա-
 նեն , զյաղթականս սպակեն , խնդան
 ընդ խնդացողս՝ որք 'ի քեզն ուրախա-
 նան , և լան ընդ լացողս՝ որք վասն քո
 են տրամահար :

Դ . Մեծ է խնամ՝ նոցա վասն մեր .
 մեծ է սէր՝ նոցա առ մեզ , և այս՝ վասն
 փառաց անչափ սիրոյդ որով սիրեցեր
 զմեզ : Քանզի սիրեն՝ զորս դու սիրես ,
 պահեն՝ զորս դու պահպանես . և ար-
 համարեն՝ զոր դու 'ի բաց հերքես :
 Ոչ սիրեն զայնոսիկ որ գործեն զանի-
 րաւութիւն , զի և դու ատեաս զամե-

նեսեան որ գործեն զչար : Յորչափ բա-
 րիս գործիցեմք՝ խնդան հրեշտակք և
 տրտմին դեք . ցորչափ առ 'ի բարեաց
 զարտուղիմք՝ զդևս ուրախ առնեմք և
 զհրեշտակս քո լքուցանեմք . զի խըն-
 դութիւն է նոցա 'ի վերայ միոյ մեղա-
 ւորի որ ասպաշխարիցէ . և դիւին՝ 'ի վե-
 րայ միոյ մեղաւորի որ 'ի բաց կացցէ
 յասպաշխարութենէ : Տուր արդ , աուր
 հայր խնդալ նոցա միշտ վասն մեր բա-
 րեաց . զի և դու հանապազ դովեսցիս
 'ի բարիս , և մեք ընդ նոսա 'ի մինն ա-
 ռաջնորդիցուք խորան՝ խոստովան լի-
 նել զանուն քո սուրբ՝ ստեղծողդ մար-
 դկան և հրեշտակաց :

Ե . Զայս ամենայն յուշ ածեալ խոս-
 տովան լինիմ՝ առաջի քո և բարեբա-
 նեմ զքեզ . զի այս շնորհք են քո մե-
 ծամեծք , որովք պատուասիրեցեր ըզ-
 մեզ , աուեալ զհրեշտակս քո զհոգիս 'ի
 սպասաւորութիւն մեզ : Քանզի ետուր
 մեզ զորս էինն ընդ պարունակաւ եր-
 կնից , և իբրև դոյզն իմն համարեալ
 զորս ենն ընդ երկնիւք՝ ետուր և զորս
 ենն 'ի վերայ երկնից : Գովեն զքեզ

տէր ընդ այս՝ ամենայն հրեշտակք քո •
 խոստովան լինին քեզ ընդ այս՝ ամե-
 նայն գործք քո • նա՛ և սուրբք քո ըզ-
 քեզ բարեբանեն : Ո՛վ փառք մեր՝ որ
 պատուասիրեցեր զմեզ, ճոխացուցեր,
 պերճացուցեր բազում պարգևօքդ, զի
 սքանչելի է տէր անուն քո յամենայն
 երկրի : Ձի՛նչ է մարդ զի մեծացուս-
 ցես զնա, կամ դիցես զսիրտ քո առ
 նմա : Քանզի ասացեր ճշմարտութիւնդ
 յաւիտենից, ուրախութիւն է ինձ լի-
 նել ընդ որդւոց մարդկան • իսկ արդ՝
 ո՞չ ապաքէն ապականութիւն է մարդ,
 և որդի մարդոյ որդն, և արդար՝ բա-
 նալ զաչս քո՛ ի վերայ սորա, և ածել
 զնա ընդ քեզ՝ ի դատաստան :

ԳԼՈՒԽ ԻԸ .

Յադագս խորիև ևսխարսահմանոչ
րևան և ևսխարսգխոռչրևան Աստուծոյ

Յ. Աստ զիս խորուծիւն անբաւ՝ ա-
րարչագործ իմաստուծիւն, որ կշուե-
ցեր զլերինս և զբլուրս, և 'ի մէտ նը-
ժարի կախեցեր զերկիր երիւք մա-
տամբքդ քով. համբարձ 'ի վեր առ
քեզ զմարմինս իմ զոր կրեմ՝ երիւք
մատամբք քով անտեսանելէօք, զի տե-
սից և ծանեայց թէ զիւրդ սքանչելի ես
յամենայն երկրի: Լոյսդ առաջին՝ որ
լուսաւոր առնէիր նախ քան զամենայն
լոյսս՝ զլերինս սուրբս յաւիտենից .
որք չէին ինչ մինչ չև էին եղեալ: Լոյս՝
որ ատես զամենայն արատ, սուրբ և
անբիծ, զինչ ուրախուծիւն է քո ընդ
մարդկան. և զինչ նմանուծիւն լու-
սոյ ընդ խաւարի: Զիւրդ իցէ 'ի մար-
դիկ ինդուծիւն քո. իբր պատրաստե-

ցեր յիս արժանի օթևան մեծ վայելչութեան քոյ՝ առ ՚ի մտանել ՚ի գիւտ բերկրութեանդ քոյ . քանզի վայել է քեզ վերնատուն սուրբ, զոր խնդրես ՚ի սիրտս սուրբս :

Բ . Այլ ո՞ւր իցէ ՚ի մարդիկ տաճար սուրբ՝ առ ՚ի քո ընդունելութիւն՝ որ վարես զաշխարհս . և ո՞ ոք սրբեսցէ զյղացեալն սերմամբ պղծութեան : Ոչ ապաքէն դու միայն սուրբ ես . իսկ ո՞վ սրբեսցի յանմաքրից . զի և ըստ օրինացն զոր ետուր հարցն մերոց՝ ՚ի լերինն ծխելոյ հրով, և ամպովք շրջատետելոյ ՚ի ջուր խաւարամած՝ յոր ինչ ասացեր մերձեսցի պիղծն պղծեալ եղիցի : Մէք ամենեքեան իբրև զհանդերձ պատառատուն սպականեալ և պղծեալ՝ զբիծս պղծութեանց մերոց ոչ կարեմք թագուցանել, նա՛ մանաւանդ առաջի քո, այլ ընդ սաղարթիւք թագուցանեմք : Չեմք կարող լինել աշխարհի՝ եթէ ոչ դու սրբեսցես՝ որ միայն սուրբդ ես : Սրբեա զմեզ զորդիս մարդկան՝ յորս հաճոյ եղև քեզ բնակիլ . զորս ըստ անմատոյց խորոց

քաղտնածածուկ դատաստանաց անբո-
 վանդակելի խմաստութեան քոյ և յա-
 մենայնի արդարացելոյ՝ թէպէտ և թա-
 գուն եղելոյ՝ առանց ինչ արդեանց նո-
 ցա նախասահմանեցեր յառաջ քան
 զաշխարհս. կոչեցեր յաշխարհէ, ար-
 դարացուցեր յաշխարհի, և մեծացու-
 ցանես զնոսա յետ աստեացս: Այլ ոչ
 ամենեցուն առնես զայս. ընդ որ սքան-
 չացեալ ահաբեկ լինին ամենայն խմաս-
 տունք երկրի:

Գ. Եւ իմ՝ տէր զմտաւ ածեալ զայս՝
 զարհուրիմ և գողամ՝ ընդ բարձրու-
 թիւն ճոխութեան խմաստութեան և
 պիտութեան քոյ՝ առ որս չեմ ժամա-
 նօզ. և ընդ անբովանդակելի դատաս-
 տան արդարութեան քոյ՝ որ ՚ի նմին
 կաւոյ զոմն կազմես անօթ ՚ի սրատիւ՝
 և զոմն յանարգանս մշտնջենաւոր: Եւ
 զորս ընտրեցեր քեզ ՚ի բազմաց ՚ի սա-
 ճար սուրբ քո՝ սրբես զնոսա, հեղեալ
 ՚ի վերայ նոցա ջուր սուրբ, զորոց պի-
 տես զանուանս և զթիւ. որ ՚ի համար
 արկանես զբազմութիւն աստեղաց, և
 զամենեսեան զնոսա յանուանէ կոչես,

որք գրեալ են 'ի գիրս կենաց, և որոց
չիք հնար կորստեան նոցա. որոց գոր-
ծակից լինին ամենեքեան 'ի բարիս, նա՛
և մեղքն իսկ: Ձի 'ի գայթակղին՝ ոչ
զարկանին, զի դնես զձեռն քո ընդ նո-
քօք, զգուշացեալ ամենայն ոսկերաց
նոցա՝ զի մի 'ի նոցանէ ոչ կորիցէ:

Դ. Սակայն մահ մեղաւորաց չար է,
զորոց՝ մինչ չև լեալ էին երկինք և եր-
կիր՝ ըստ խորին և ըստ բազում դա-
տաստանաց քոց գաղտնեաց և յամե-
նայնի արդարոց դատակնքեցեր 'ի մահ
յաւիտենից. որոց առ քեզ է թիւ ա-
նուանց և գործոց չարեաց՝ որ թուես
զաւազ ծովու, և չափես զխորու-
թիւն անդնդոց. զորս թողեր 'ի սլըղ-
ծութիւնս իւրեանց որոց ամենեքեան
գործակից լինին 'ի չարիս՝ և աղօթք իսկ
նոցա փոխարկին 'ի մեղս. զի թէ մինչև
յերկինս ելցեն և գլուխ նոցա յամպս
հսկեսցի՝ և յաստեղս երկնից դիցեն ըզ-
բոյնս իւրեանց, 'ի վախճանի 'ի բաց մեր-
ժեսցին իբրև զաղբևս:

ԳԼՈՒԽ ԻԹ .

Յադագս որոց յառաջնունն արդարք
գորով՝ դառնան յամբարշտոռքիւն ,
և որոց ընդ հակառակն .

Յ . Մեծ են դատաստանք քո տէր
Աստուած՝ դատաւոր արդար և հզօր՝
որ դատիս արդարութեամբ , և անհաս
են գործք քո և խորին . զորս յուշ ա-
ծեալ զգողանի հարկանին ամենայն
ոսկերք իմ : Զի ոչ յապահովս ե-
ղիցի մարդ կենդանի ՚ի վերայ երկրի ,
առ ՚ի պաշտել զքեզ սրբութեամբ և
անբծութեամբ զամենայն աւուրս կե-
նաց մերոց երկիւղիւ , և ուրախ լինել
՚ի քեզ դողութեամբ . զի մի եղիցի ծա-
ռայութիւնս աներկիւղ , և ոչ խնդու-
թիւնս առանց զարհուրանաց . զի մի
պարծեսցի գօտևորեալն զօրութեամբ
իբրև զլքեալ . և ոչ մեծաբանեսցէ ա-
մենայն մարմին առաջի քո , այլ զար-
հուրեալ գողացի յերեսաց քոց , ուր

ոչ գիտէ մարդ՝ սիրոյն թէ աստեղութեան
 իցէ արժանի, այլ ամենայն կեղակարծք
 հանդերձելումն սլահեալ կան :

Բ. Տեսաք, տէր, զբազումս, և լը-
 ւաք 'ի հարցն մերոց, զոր յածելս
 'ի յուշ՝ սասանի անձն խմ, և 'ի խոս-
 տովան լինելս սպանում՝ երկիւղիւ, թէ
 բազումք ելին բարձրացան մինչև յեր-
 կինս, և յաստեղս անդ եղին զբոյնս
 իւրեանց, և անձինք նոցա զեղծան 'ի
 չարիս : Տեսաք զթօթափել աստեղաց
 յերկնից՝ ձգեալ տտամբ վիշապին զայ-
 րացելոյ : Եւ որք անկեալ գնէին 'ի հող
 երկրի՝ ձեռամբդ քով վերամբարձան
 սքանչելեօք . տեսաք զկենդանիս մե-
 ուեալս, և զմեուեալս՝ յարուցեալս 'ի
 մեուելոց . և զորս շրջէին ընդ որդիս Աս-
 տուծոյ՝ անկան 'ի մէջ վիմաց հրացե-
 լոց, իբրև յոչեութիւն փոխարկեալք .
 տեսաք խաւարեալ զոյս, և զի խա-
 ւարէ զծագումն զլուսոյն . զի մաքսա-
 ւորք և սրունիկք յառաջեցին քան
 զբնական յարքայութիւն երկնից . և
 որդիքն արքայութեան ելին 'ի խաւարն
 արտաքին :

Գ. Եւ ընդէր այս ամենայն • զի ելին
 'ի լեառն՝ ուր ել զառաջինն հրեշտակն ,
 և էջ սատանայ : Չորս յառաջագոյն
 սահմանեցեր՝ զնոսին և կոչեցեր , սըր-
 բեցեր և արդարացուցեր՝ զի արժանա-
 ւոր օթևան գտցին մեծվայելչութեանդ
 քոյ • ընդ նոսա և 'ի նոսա է ուրախու-
 թիւն քո , սուրբ և անարատ , յորս
 բերկրիս դու և ուրախ առնես զման-
 կութիւն նոցա • բնակեալ ընդ նոսա 'ի
 խորհուրդս նոցա • զի եղիցին տաճար
 սրբութեան քոյ , որ զբնութեանս մե-
 րոյ յաւելու զչքեղութիւն և զփառս :

ԳԼՈՒԽ Լ .

Թե տաճար է Սասունոյ հողի
հաշատացեալ .

Յ . Հողիս մեր զոր ստեղծեր ոչ առ
'ի քէն՝ այլ 'ի ձեռն բանիդ քոյ , ոչ 'ի
նիւթոց տարերաց ինչ՝ այլ յոչնչէ ,
բանաւոր , մտաւոր , միշտ 'ի կեանս և 'ի
չարժման . զոր դրոշմեցեր լուսով երե-
սաց քոց , և սրբեցեր զօրութեամբ ա-
ւազանիդ քոյ՝ գտաւ ընդունարան փա-
ռացդ քոց՝ զոր քո միայն է ընուլ՝ և ոչ
այլում ումէք : Զի մինչ զքեզ ունիցի՝
լրացեալ է ցանկութիւն նորա , և ոչ
իմիք փափաքէ այլ ևս յարտաքնոց .
քանզի երբ միտ դիցէ արտաքնոցս՝ ա-
պաքէն յայտ արար թէ չէ ստացեալ
զքեզ 'ի ներքուստ . և թէ զքեզ ստա-
ցաւ , չիք այլ ինչ խնդրելի :

Բ . Զի թէ գերագոյն և ամենայնիւ
բարիդ ես՝ չմնայ այլ ինչ առաւել

ցանկալի՝ բայց զքեզ միայն ժառանգել՝ զամենեկին բարիդ: Եւ որ ոչ միտ դիցէ գերագոյն բարւոյ՝ ըղձանայ այլում՝ որ չէ ամենայնիւ բարի • ապա և ոչ հայի ՚ի գերագոյն բարին • նա՛ և ոչ Աստուած՝ այլ յաւէտ յարարածս: Ի ցանկալն անդ ստեղծուածոց՝ միշտ մնայ սովեալ • զի թէպէտ և ՚ի ձեռին ունիցի որում հետամուտն եղև, այլ սնոտի է, զի չիք ինչ առ ՚ի ընուլ զնա՛ եթէ ոչ դու՛ ըստ որոյ նմանութեան ստեղծաւ: Լնուս դու զնոսա՛ որ ոչ ինչ իմիք ակն ունին բաց ՚ի քէն • և արժանաւորս առնես քեզ զնոսա, սուրբս, երանեալս, անարատս և բարեկամս Աստուծոյ, որք զամենայն իբրև զաղբևս համարին, և քև միայն նպաստ գրտանեն:

Գ. Այս է երանութիւնդ զոր շնորհեցեր մարդկան • այս է պատիւն՝ որով ՚ի մէջ ամենայն ստեղծուածոց քոց ՚ի վեր քան զամենեւեան պատուասիրեցեր զնա, զի սքանչելի լինիցի անուն քո՛ ՚ի վերայ ամենայն երկրի: Ահա տէր Աստուած իմ՝ բարձրեալ ամենաբարի

ամենակալ. գտի վայր ուր դու բնա-
կեսցես. զհողի ասեմ՝ զոր ստեղծելը
լստ սլատիերի քում և ըստ նմանու-
թեան, որ միայն քեզ ելցէ՛ի խնդիր և
ըղձանայցէ. և ոչ զայն՝ որ ոչ խնդրես-
ցէ զքեզ և փափաքեսցէ :

ԳԼՈՒԽ ԼԱ.

Թե լի մարք գտանել զԱստուած
զգայոչքեամբք ներքևովք կամ ար-
տաքևովք .

Ս. Մողորեցայ ես որպէս զոչևար
կորուսեալ՝ խնդրելով զքեզ արտա-
քոյ՝ որ եսդ՛ի ներքս : Բազումս տար-
ժանեցայ ՚ի տարակուսանս զքեզ խըն-
դրելով. իսկ դու յիս բնակեալ ես՝ Թէ-
պէս և ՚ի խնդիր իցեմ քեզ : Շրջեցայ
ընդ գիւղորէս և ընդ հրապարակս աշ-
խարհիս՝ ՚ի խնդրել զքեզ և ոչ գտի. զի
յուամպէտս խնդրէի արտաքոյ՝ զոր ՚ի
ներքս անդ էր : Հրեշտակս արձակեցի

զամենայն զգայարանս իմ զարտաքինս
 առ 'ի խնդրել զքեզ՝ և ոչ գտի, քան
 զի և ընդունայն վաստակէի: Տեսանել
 տեսի լոյս իմ Աստուած՝ որ լուսաւո
 րեսս զես, զի յանօգուտս խնդրէի ըզ
 քեզ նոքօք, ուր դու 'ի ներքս գոլով
 ոչ ծանեան ուր մտերն:

Բ. Ասեն տեսանելքս՝ չեմուտ ընդ
 մեզ՝ զի անգոյն էր. լսելքս ասեն, ոչ
 անց ընդ մեզ՝ զի անմուռնչ էր. հոտո
 տելքս ասեն՝ ոչ գնաց ընդ մեզ՝ զի
 չէին նորա բուրմունքս. ճաշակելքս
 ասեն, ոչ կոխեաց ընդ մեզ զի ոչ եկեր.
 շօշափելքս յաւելին 'ի վերայ. մի ինչ
 հարցաներ ընդ մեզ՝ զի չէր նորա մար
 մին: Ոչ գոն սոքա 'ի քեզ Աստուած
 իմ: Զի 'ի խնդրելս անդ զամենայնն՝
 ոչ միտ գնեմ տեսլեան մարմնոյ, ոչ
 սպառչաճ ժամու, ոչ սպայծառ լուսոյ,
 ոչ գունոյ, ոչ երգոց քաղցրութեան
 և ոչ ձայնից հնչմանց, ոչ ծաղկանց
 և սպեղանեաց կամ խնկոց. ոչ մեղու
 կամ մանանայի 'ի բերկրանս քմաց.
 և ոչ այլոց առ 'ի ձեռն արկանել և
 գրկախառն փարիլ զսիրեցելովք. և ոչ

յայլ զգայուծիւնս ընդ այսոքիւք ստոր-
անկեալս : Քաւ ինձ յայսոսիկ կար-
ծել զԱստուած իմ . որ և յանասնամը-
տաց անգամ դարովեալ է :

Գ . Այլ 'ի խնդրելս զԱստուած իմ՝
խնդրեմ զլոյսն՝ որ 'ի վեր քան զամե-
նայն լոյս , զոր չէ տեսանել աչաց . ըզ-
ձայնն խնդրեմ՝ որ 'ի վեր է քան զա-
մենայն ձայն՝ որում անմարթ է հպիլ
ականջաց . զհոտն անկշիռ՝ որում ոչ
բանին ռնգունք . զքաղցրուծիւնն ան-
չափ՝ որում ոչ տանին քիմք . զգրկա-
խառնուծիւնն սիրատարփ՝ որում ոչ
հասանեն ձեռք : Փայլատակէ լոյսս՝
զոր ոչ տանի տեղի . հնչէ ձայնս՝ ո-
րում ոչ հանդարտէ հոգի . բուրէ հո-
տըս՝ ուր ոչ հասանէ շունչ . գրկա-
խառնուծիւնս սիրահարի՝ որում չիք
զատանիլ . այս է Աստուած իմ՝ և ոչ
ինչ այլ ընդ այլոյ . զայս խնդրեմ 'ի
խնդրելս անդ զԱստուած . զայս սիրեմ՝
'ի սիրելս անդ զԱստուած :

Դ . Անագան ուրեմն սիրեցի զքեզ ըզ-
գեղեցկուծիւնդ նախկին և վերջին . ուր
ուրեմն սիրեցի զքեզ՝ ուր դու 'ի ներքս

կիր՝ և ես արտաքոյ՝ ՚ի գեղաւորս անդ
 դքեզ խնդրէի զորս ստեղծեր, և ես
 ՚ի ագեղս անդ ընթանայի. դու ընդ իս
 կիր և ես չէի ընդ քեզ՝ ՚ի հեռաւորս ՚ի
 քէն ձգէին զիս որք ոչ անձամբ են բա-
 ւական՝ այլ ՚ի քէն: Ընդ ամենայն ինչ
 շուրջ եկի ՚ի խնդիր քո՝ և յամենայնէ
 զիս ՚ի բաց կտրեցի: Հարցի զերկիր՝
 Աստուած իմ իցէ նա, և ետ պատաս-
 խանի՝ թէ չեմ. և որ ինչ կային ՚ի նմա
 զնոյն եղեն խոստովան: Հարցի ընդ ծով
 և ընդ անդունդս և զոր ՚ի նմա սողունս,
 և ետուն պատասխանի. Չեմք մէք Աս-
 տուած քո, խնդրեա զնա ՚ի վերոյ քան
 զմեզ: Հարցի ընդ հաստատու թիւն օդոց՝
 և զորս ՚ի նմա բնակք, և ետ պատաս-
 խանի. Պատրեցաւ Անաքսիմենէս, չեմ
 ես Աստուած քո: Հարցի զերկինս,
 զարև, զլուսին և զաստեղս և ասացին.
 Չեմք մէք Աստուած քո:

Ե. Ասացի անգրէն ցորս շուրջ կային
 զինև. ասացէք ինձ թէ չէք դուք Աս-
 տուած իմ, և արդ պատմեցէք ինձ
 վան նորա: Անգէն ամենեքեան զաղա-
 ղակ բարձին ՚ի ձայն բարձր. Նա արար

զմեզ: Հարցանել Հարցի զերկիր • Իցէ
 թէ դու իցես Աստուած իմ, տուր ինձ
 զրոյց • արար ինձ պատասխանի ձայ
 նիւ մեծաւ • Չեմ ես ինձէն՝ այլ նո
 վաւ եմ, 'ի վեր քան զիս խնդրեցես
 զնա՝ որ արարն և խնամէ զիս: Հար
 ցուածս ընդ արարածս խորհուրդ է
 խորին • և պատասխանիք նոցա՝ վկայ
 ութիւն նոցա զԱստուծոյ, զի գոչեն
 ամենեքեան, Աստուած արար զմեզ •
 զի ըստ ասից առաքելոյն՝ Աներևոյթքն
 Աստուծոյ արարածովքս աշխարհի ի
 մացեալ լինին:

2. Դարձ արարի անդրէն ցանձն
 իմ՝ և ասեմ ցիս • Ո՞ ես դու • և ետու
 պատասխանի • Մարդ բանաւոր և մահ
 կանացու: Աերստին հետազօտ եղէ թէ
 զինչ իցէ • և ասացի • յորմէ է այդ կեն
 դանի տէր Աստուած իմ • յորմէ այլ՝
 բաց 'ի քէն • դու արարեր զիս և ոչ ես:
 Իսկ զինչ իցես դու տէր • որով ես աս
 ըլիմ, որով ամենեքեան կեան, տէր Աս
 տուած իմ ճշմարիտ, միայն ամենա
 կալ, յաւիտենական, անբովանդակելի
 և անչափ: Որ կեաս միշտ և չիք քեզ

մեռանել . զի անմահ էս բնակեալ 'ի յա-
 լիտեան . սքանչելի յաչս հրեշտակաց ,
 անպատմելի , անխմանալի՝ և չիք քեզ
 անուռն : Աստուած կենդանի և ճշմա-
 րիտ , ահաւոր և հզօր , անսկիզբն և
 անվախճան , ծագումն ամենայնի և կա-
 տարած , որ էս յառաջ քան զսկիզբն
 աշխարհի և քան զծագումն նորա : Դու
 էս Աստուած իմ՝ և տէր ամենեցուն
 զորս ստեղծեր . և առ քե են սկզբնա-
 սիթք ամենայն եղելու թեանց . յեղա-
 վոխեալքս ամենայն անվոփոխ են առ
 քե , և ամենայն բանականքս և անբանք
 և ժամանակաւորք են ընդ քե՝ ի կեանս
 մշտնջենաւոր :

Է . Ասա Աստուած իմ ինձ ծառայիդ
 քում՝ որ կամս յողոք խոնարհեալ ,
 ասա եղկելոյս գթածդ , ասա աղա-
 չեմ ողորմութեամբդ քով . ուստի՞ իցէ
 այս կենդանի՝ եթէ ոչ 'ի քէն . և ո՞ այն
 ճարտարապետ իցէ անձին բաւական .
 'ի քէն՞ թէ յայլոց իցէ լինել և կեալ .
 ոչ ապաքէն դու էս կեանք գերադոյն՝
 յորմէ բղխեն կեանք ամենեցուն . որ
 ինչ է՝ առ 'ի քէն է , զի առանց քո է և

ոչ ինչ: Ո՞չ դու աղբիւր ես կենաց՝
 յորմէ հոսեն կեանք, զի որ կեայ՝ քե
 կեայ, զի առանց քո ոչ ոք է որ ապրի:
 Դու տէր ստեղծեր զամենայն՝ և արդ
 ելից 'ի խնդիր ստեղծողին զիս. դու
 տէր արարեր զիս՝ առանց որոյ եղև և
 ոչ ինչ. դու ստեղծիչ իմ՝ և ես գործք
 ձեռաց քոց. շնորհ ունիմ քեզ տէր
 Աստուած իմ՝ որով կեամ ես և ամե
 նեքեան՝ զի դու արարեր զիս. շնորհ
 ունիմ քեզ հաստիչդ իմ՝ զի ձեռք քո
 արարին և ստեղծին զիս. շնորհ ունիմ
 քեզ լոյս իմ՝ որ լուսաւորեցեր զիս՝ և
 գտի զքեզ և զիս. ուր գտի զիս՝ անդ
 ծանեայ զիս, և ուր զքեզ գտի՝ անդ և
 զքեզ ծանեայ. նա ուր ուրեք ծանեայ
 զքեզ՝ անդ և լուսաւորեցեր զիս. շնորհ
 ունիմ զքէն լոյս իմ՝ զի լուսաւորեցեր
 զիս:

Ը. Զի՞նչ է զոր ասացիս թէ ծա
 նեայ զքեզ. ո՞չ ասպքէն դու ես Աս
 տուած անիմանալի և անչափ՝ թագա
 ւոր թագաւորաց և տէր տէրանց, որ
 միայն ունիս զանմահութիւն, և բնա
 կիս 'ի լոյս անմատոյց, զոր ոչ ոք 'ի

մարդկանէ կտես՝ և կամ կարող իցէ տեսանել: Ո՞չ դու ես Աստուած ծածկեալ և անքննելի՝ ուր դու միայն գիտես զանճն քո, և ՚ի միտ առնուա ըսքանչեղազօր: Ո՞վ ծանեաւ զոր ոչն ետես. քանզի ասացեր ճշմարտութեօք քով, չէ ոք ՚ի մարդկանէ՝ որ տեսանիցէ զիս. ասաց զսոյն և կարապետն քո քոյովք ճշմարտութեամբ, զԱստուած ոչ ոք ետես երբէք: Իսկ ո՞ ծանեաւ թէ ոչ տեսաւ. քանզի ասաց ճշմարտութիւնդ քո. Ոչ ոք գիտէ զորդի՛ բայց միայն հայր, և ոչ զհայր ոք գիտէ՝ եթէ ոչ որդի. միայն երրորդութիւնդ քո գիտակ է անձինդ՝ որ ՚ի վեր է քան զամենայն միտս:

Թ. Իսկ զինչ է զոր ասացի՝ նմանեալս նանրութեան թէ ծանեայ ըզքեզ. ո՞ իցէ որ ծանեաւ զքեզ՝ եթէ ոչ դու, միայն Աստուած ամենակարող, ամենագովելի, փառաւորեալ, բարձրացեալ, և վերագոյակ, կոչեցեալ ՚ի սրբութեան և յաստուածութեան: Զի գերագոյն ճանաչիս բնութեամբ և իմացութեամբ ՚ի վերայ ամենայն ի

մտացական և անասուն բնութեան, և ՚ի վերայ ամենայն անուան անուանելոյ, ոչ միայն յաստիս՝ այլ և ՚ի հանդերձեալն. քանզի դերագահ և թագուն աստուածութեամբդ որ ՚ի վերայ ամենայն մտաց իմացութեանց և գոյութեան, անմատոյց և անքննին բնակես ՚ի քեզ. ուր լոյսն է անմատոյց՝ անհասանելի, անըմբռնելի և անպատմելի. առ որ ոչ հպի լոյս տարորակ. զի ոչ անկանի ընդ խորհրդեամբ, որ անտեսն է, և ՚ի վեր քան քան և զմիտս, անհպելի, անփոփոխ և անկցորդ: Զոր ոչ ղբետես ՚ի հրեշտակաց կամ ՚ի մարդկանէ. և ոչ տեսանել իսկ կարող է: Այս քո երկինք է տէր, երկինք երկնից, թագուն, անիմանալի, անդր քան ըզմիտս՝ և լոյս գերակայ, վասն որոյ ասեմքս, երկինք երկնից տեսուն են:

Թ. Երկինք երկնից՝ առ որով յերկրի գոգցես համարի ամենայն երկին. զի գերահրաշ փառօք քաղմեալ կայ ՚ի վերայ ամենայն երկնից. առ որ երկիրս իսկ հրեղէնն համարեալ է երկին. այս է երկինք երկնից տեսուն, որ չէ ծա-

'նուցեալ ումէք՝ բայց միայն տեառն ,
 ուր ոչ ոք ելանէ՝ եթէ ոչ որ էջն յեր-
 նից . զի չեք ոք որոյ ծանուցեալ իցէ
 զհայր , զորդի՝ և զհոգի նոցուն . և ոչ
 ոք գիտէ զորդի՝ եթէ ոչ հայր , և հո-
 գի նոցա . քեզ միայն երրորդութիւնդ
 ակներև է քաջ : Երրորդութիւն սուրբ ,
 դերասքանչ , անպատում , անհաս , ան-
 հպելի , անըմբռնելի , անխմանալի և գե-
 ղակայ՝ վերամբարձ քան զամենայն
 միտս , զզգայութիւնս , զբան , զխմա-
 ցութիւն և զամենայն գոյակս հոգւոց
 երկնայնոց . զոր չէ մարթ ասել , կամ
 խորհիլ , կամ առնուլ 'ի միտ . և կամ
 գիտել , նա՛ և ոչ զուարթնոց անգամ :

ԺԵ . Իսկ իբր ծանեայ զքեզ տէր
 Աստուած՝ բարձրեալ քան զամենայն
 երկիր և զերկին . որում ոչ քաջ 'ի վե-
 րայ հասանեն քերովքէք և սերովքէք ,
 այլ թևովք խորհրդոց իւրեանց սքո-
 զեն զերեսս , աղաղակելով և ասելով՝
 նստելոյն 'ի վերայ աթուոյն բարձրե-
 լոյ . Սուրբ , սուրբ , սուրբ , տէր Աս-
 տուած զօրութեանց՝ լի է ամենայն եր-
 կիր փառօք քո : Պակուցեալ մարդա-

բէին ասէր. Այն ինձ, զիւրդ կամս
 հիացեալ, զի այր պղծաշուրթն եմ ես :
 Զարհուրեցաւ սիրտ իմ և ասացի, վայ
 ինձ. զիւրդ ոչ հիացայ. զի այր պղղ-
 ծաշուրթն եմ ես : Եւ ասացի. Ծա-
 նեայ զքեզ : Եւ արդարև վայ որոց լուենն
 զքէն տէր, զի բազումք գտան վայրա-
 խօսք առանց քո : Եւ ես տէր Աստուած
 իմ՝ ոչ լուռ եղէց, փոխանակ զի ստեղ-
 ծեր զիս և լուսաւորեցեր. գտեր զիս՝ և
 ծանեայ զքեզ, քանզի լոյս ծագեցեր
 յիս :

ԺԲ. Եւ զիւրդ ծանեայ զքեզ : Ծա-
 նեայ զքեզ ՚ի քեզ. ոչ որպէս ՚ի քեզդ
 ես, այլ որպէս առ իս. ոչ առանց քո՝
 այլ ՚ի քեզ. զի դու ես լոյս՝ որ լուսա-
 ւորեցեր զիս : Քանզի քեզ միայնոյ ծա-
 նուցեալ ես՝ որպէս ետդ ՚ի քեզ. իսկ
 ծանուցեր ինձ՝ որպէս առ իս՝ շնոր-
 հօքդ քով : Զինչ ևս ինձ. ասա բարե-
 գութ տէր՝ ծառայիդ քում եղկելոյ,
 պատմեալ ինձ ողորմութեամբդ քով՝ որ
 ինչ իցես առ իս : Զայն տուր հոգւոյս
 իմում. փրկութիւն քո ես եմ. մի թա-
 դուցաներ զերեսս քո յինէն՝ զի մի մե-

ուայց : Թոյլ արա ինձ խօսել ընդ ողորմութեանդ քում՝ որ հողս եմ և մոխիր . զի մեծ է ողորմութիւնս քո՝ ի վերայ իմ . խօսեցայց ընդ տեառն իմում՝ բայց ես հող եմ և մոխիր . ասա ինձ՝ ծառայիդ քում, սպասմեա ողորմածդ քում տառապելոյս . տուր զրոյց ողորմութեամբ քով թէ զինչ իցես ըստ իմումս բաւելոյ : Որոտասցես ի վերուստ ձայնիւ մեծաւ ի ներքին լեւիս սրտի իմոյ՝ ի բաց փարատեալ զխլութիւնս իմ . և լուայ զձայն քո . լուսաւորեցեր զկուրութիւնս իմ, և տեսի զլոյս քո, և գիտացի զի Աստուած իմ ես դու . և անդ ասացի թէ ծանեայ զքեզ :

ԺԳ . Ի միտ առի զի Աստուած իմ ես դու . ծանեայ զքեզ միայն ճշմարիտ Աստուած՝ և զոր առաքեցեր զՅիսուս Քրիստոս : Էր երբեմն մինչ ոչն գիտէի զքեզ . վայ ժամանակին՝ յորում անձանօթ էի քեզ . եղո՛ւկ կուրութես՝ որ չտեսանէի զքեզ . աւա՛ղ խլութեանս՝ մինչ ոչն լէի քեզ . կոյրս և խուլ յընտրելոյ անախ զորս արարեր՝ յանարգս

գէմ՝ դնէի : Դու ընդ իս էիր և ես չէի
 ընդ քեզ . նա՛ նոքա զիս տարածիդ ու
 նէին առ ՚ի քէն՝ որք չենն անձամբ ,
 այլ ՚ի ձեռն քո : Լուսաւորեցեր զիս
 լոյսդ աշխարհի . տեսի զքեզ և սիրե
 ցի : Ոչ ոք սիրէ զքեզ՝ մինչ չև տեսեալ
 իցէ . և որ ոչն ետես՝ ոչ սիրէ զքեզ :
 Անագան ուրեմն սիրեցի զգեղեցկու
 թիւնն՝ որ յառաջնմէն էր՝ և արդ ևս
 նորոգ . վայ՛ ժամուն՝ յորում ոչ սիրե
 ցի զքեզ :

ՓԼՈՒԽ ԼԲ .

Յադուգս խոստովանոչքեանս ձշմա
 րիս հաշարոյ .

Յ . Ենորհ ունիմ զքէն լոյսդ իմ՝ որ
 լուսաւորեցեր զիս՝ և ծանեայ զքեզ :
 Եւ զիտորդ այս : Զի գիտացի զքեզ մի
 այն Աստուած կենդանի՝ և ճշմարիտ
 արարիչ իմ . ՚ի վերայ հասի՝ թէ ստեղ
 ծող ես երկնի և երկրի , տեսանելեաց

ամենայնի և աներևութից . Աստուած
 Ճշմարիտ ամենակալ՝ անմահ՝ անտե-
 սանելի՝ անսպարազրելի՝ անսահմանե-
 լի՝ յաւիտենական՝ անմատոյց՝ անըմ-
 բրանելի՝ անհասանելի՝ անփոփոխ՝ ան-
 չափ՝ անեզր՝ սկիզբն ամենայն արա-
 ծոց՝ որ երևին և որ ոչն երևին . որով
 ամենայն ինչ եղև, և կան տարերքն ա-
 մենայն, որոյ իշխանութեան նորա չլիք
 սկիզբն և ոչ կատարած : Գիտել զի-
 տացի՝ թէ մի միայն էս Աստուած ճշ-
 մարիտ՝ յաւիտենական, հայր, և որ-
 դի և հոգի սուրբ . երեք անձինք՝ այլ մի
 էութիւն . ամենայնիւ սպարզ և անբա-
 ժանելի բնութիւն : Հայր ոչ յումէքէ,
 որդի՝ ի հօրէ միայնոյ, և հոգին յերկո-
 ցունց միօրինակ . անսկիզբն միշտ և
 անվախճան Աստուած՝ երբեակ և մի
 միայն, ճշմարիտ Աստուած ամենակա-
 րող . մի սկիզբն հասարակաց . արա-
 ըիչ ամենայն երևելեաց և աներևու-
 թից՝ հոգևորաց և մարմնեղինաց, զորս
 քոյով ամենակալ զօրութեամբ՝ ի սկըզ-
 բան անդ ժամանակաց յոչէից հաս-
 տեցեր ստեղծուածս՝ որ հոգեղէն և որ

ճարմնեղէն • զհրեշտակականն ասեմ
 և զտիեզերացս, որով և զմարդկայինս,
 իբրև միօրինակ ՚ի հոգւոյ և ՚ի մարմնոյ
 գոյաւորեալ :

Բ • Գիտեմ և դաւանիմ զքեզ Աս-
 տուած հայր անձին, և զորդիդ առ ՚ի
 հօրէ ծնեալ • և զսուրբ հոգիդ միսիթա-
 րիչ՝ ոչ ծնեալ և ոչ անձին • սուրբ և ան-
 բաժանելի երրորդութի՛ն յերբեակ հա-
 մազօր անձինս համագոյակս և հաւա-
 սարս • երրորդութի՛ն ՚ի միութե՛ն, և միու-
 թիւն յերրորդութեան, սրտիւ հաւա-
 տացեալ յարդարութիւն՝ և բերանով
 խոստովանեալ ՚ի փրկութիւն : Ծա-
 նեայ զքեզ ճշմարիտ Աստուած և տէր
 մեր Յիսուս Քրիստոս՝ որդի Աստու-
 ծոյ միածին, արարիչ, ազատեցուցիչ
 և փրկիչ իմ՝ և համօրէն մարդկային
 ազգիս • ծնեալ ՚ի հօրէ յառաջ քան
 զաշխարհս, Աստուած յԱստուծոյ,
 լոյս ՚ի լուսոյ : Աստուած ճշմարիտ յԱս-
 տուծոյ ճշմարտէ • ծնունդ և ոչ արա-
 րած • համագոյակից և հաւասարակից
 հօր և հոգւոյն սրբոյ, որով ամենայն
 ինչ եղև ՚ի սկզբանէ • հաւատացեալ

վատահուժեամբ և խոստովանեալ հաս-
տատու թեամբ՝ թէ դու Աստուած միա-
ծին Յիսուս Քրիստոս՝ վասն փրկու-
թեան մարդկան մարմնացեալ յերրոր-
դու թենէդ և ՚ի միշտ կուսէն Մարիա-
մայ, յլացեալ գործակցելով հոգւոյդ
սրբոյ, ճշմարիտ մարդ եղեր՝ անձնա-
ւորեալ բանական հոգւով և մարդկե-
ղէն մարմնով:

Գ. Որ թէպէտ և միածինդ Աստու-
ծոյ անչարչարելի էիր ըստ աստուա-
ծու թեանդ՝ նա և անմահ, առ մեծի սի-
րոյդ որով սիրեցեր զմեզ՝ որդիդ Ա-
ստուծոյ չարչարելի եղեր և մահկանա-
ցու ըստ մարդկու թէ: Որ վասն փրկու-
թէ ազգի մարդկան՝ ՚ի փայտ խաչին տա-
րար տանջանաց և մահու՝ առ ՚ի փրկել
զմեզ ՚ի յաւիտենից մահուանէն: Նա՝
և ՚ի դժոխս իսկ իջեր՝ ուր նստէին
հարբն մեր ՚ի խաւարի՝ արարիչդ լու-
սոյ, և յաւուրն երրորդի հրաշալի յաղ-
թու թեամբ յարեար ՚ի դժոխոց՝ ա-
ռեալ մարմին սուրբ՝ որ վասն մեզաց
մերոց մեռեալ հանդեալ ՚ի տապանի
և կենդանացեալ ըստ գրեցելումն յեր-

ըորդ աւուր՝ առ 'ի հանգուցանել զնա
 ընդ աջմէ հօր: Եւ առեալ ընդ քեզ
 զոր առ 'ի դժոխոց գերութիւն՝ ուր
 բռնացեալն էր հին թշնամին մարդկա-
 յին բնութեանս, ճշմարիտ որդիդ Աս-
 տուծոյ, գոյացութեամբ մերովս մար-
 մնով 'ի կուսականն առեցելոյ յար-
 ցանդէ՝ ելեր 'ի վերոյ քան զամենայն
 երկինս, անցեալ ընդ դասս հրեշտա-
 կաց, ուր աթոռն է ընդ աջմէ հօր Աս-
 տուծոյ. և աղբիւրն է կենաց և լոյսն
 անմատոյց և աստուածայինն խաղա-
 ղութիւն՝ գերազանցեալ քան զամե-
 նայն միտս:

Դ. Անդ քեզ երկիր պագանեմք՝ որ
 էս Աստուած ճշմարիտ և մարդ՝ Յի-
 սուս Քրիստոս, և հաւատամք խոստո-
 վանութեամբ հանդերձ թէ Աստուած
 է քո հայր. և անտի ակն ունիմք գալ
 'ի դատաստան 'ի վախճան ժամանա-
 կաց՝ առ 'ի դատել զկենդանիս և զմե-
 ռեալս, և հատուցանել ամենեցուն՝ բա-
 րեաց և չարաց ըստ գործոց իւրաքան-
 չիւր՝ զորս գործեցին 'ի կենցաղումս
 կամ յաղթանակ և կամ պատուհաս,

ըստ որում արժանաւոր գտանիցին հանգստեան կամ աղետից : Քանզի յաւուրն յայնմիկ յարիցեն ամենեքեան 'ի ձայն զօրութեան քոյ , որք ընկալան զհոգի մարդկային հանդերձ մարմնով իւրեանց որ յաստիան էր , զի այր իւրաքանչիւր ըստ արդեանց իւրոց մնացէ փառաց կամ գեհենին . դու իսկ ես կեանք և յարութիւն մեր՝ որ ակն ունիմք ազատեցուցչիդ՝ տէր Յիսուս Քրիստոս՝ որ նորոգեաց զմարմին խոնարհութեան մերոյ՝ կերպարանեալ ըստ մարմնոյ փառաց իւրոց :

Ե . Ծանեայ զքեզ տէր Ճշմարիտ և մի հոգի սուրբ հօր և որդւոյ . յերկուցունց միօրինակ բղխեալ , համագոյ և հաւասար հօր և որդւոյ , մխիթար և օգնութիւն մեր . որ իշեր աղաւնակերպ 'ի վերայ Աստուծոյ և տեառն մերոյ Յիսուսի Քրիստոսի , և երևեցար առաքելաց հրեզն լեզուօք . ուսուցեր սարգևօք շնորհաց քոց զամենայն սուրբս և ընտրեալս Աստուծոյ 'ի սկզբանէ , և բացեր զբերանս մարգարէից պատմել զսքանչեւիս թագաւորութեանն Աս :

տուժոյ • որ երկրպագիս և փառաւորիս յամենայն սրբոցն Աստուծոյ ընդ հօր և ընդ որդւոյ : Ընդ որս և ես որդի աղախնոյ քոյ 'ի սրտէ իմմէ փառաւորեմ զանուն քո՝ զի լուսաւորեցեր զիս • զի դու ես լոյս ճշմարիտ , ճրագ ճշգրտապատում , հուր Աստուծոյ , և վարդապետ հոգւոյ՝ որ օծութեամբդ քով ուսուցանես մեզ զամենայն ճշմարտութիւն • հոգիդ ճշմարտութեան՝ աւանց որոյ յանհնարիցն է հաճոյ լինել Աստուծոյ • զի դու ինքն ես Աստուած յԱստուծոյ , լոյս 'ի լուսոյ , բղխեալ անձառաքար 'ի հօրէն լուսոյ , և յորդւոյ նորա՝ 'ի տեառնէ մերմէ Յիսուսէ Քրիստոսէ , ընդ որս համագոյութեամբ և հաւասարութեամբ և յաւիտենակցութեամբ՝ կաս յէութե՛ սուրբ երրորդութեանդ , և գերակայութեամբ փառակցեալ թագաւորես :

2 • Ծանեայ զքեզ մի Աստուած կենդանի և ճշմարիտ՝ հայր և որդի և հոգի սուրբ՝ յերբեակ անձինս և 'ի մի էութեան՝ զոր խոստովան լինիմ , երկիր սրագանեմ և փառաւորեմ յամենայն

սրտէ՛ որ ես ճշմարիտ Աստուած մի-
այն, սուրբ, անմահ, անտեսանելի, ան-
փոփոխ, անմատոյց, անհաս. մի լոյս,
մի արև, մի հաց, մի կեանք, մի սկիզ-
բըն, մի վախճան, մի ստեղծող երկնի
և երկրի. որով ամենեքեան կեան, ա-
մենեքեան կան, ամենեքեան խնամար-
կին, կառավարին և կենդանանան՝ որք
յերկինս են, որք յերկրի և որք ընդ
երկրաւ. ուր բաց ՚ի նմանէ չէք Աս-
տուած յերկինս և յերկրի :

Է. Ահա զայսօրինակ գիտացի զքեզ
տէր Աստուած՝ որ գիտեսդ զիս. ծա-
նեայ զքեզ հաւատովք քով զոր շնչե-
ցեր յիս՝ լոյս իմ, ճրագ աչաց իմոց,
տէր Աստուած իմ, յոյս ամենայն ծա-
ղաց երկրի, ուրախութիւն մանկու-
թեանս իմոյ, և բարութիւն՝ տածիչ
ձերութեանս իմոյ : Առ քեզ տէր ա-
ղաղակեն ամենայն ոսկերք իմ՝ ասե-
լով. Տէր ո՞ նման է քեզ. ո՞վ նմանիցի
քեզ յաստուածս տէր. ոչ զոր արար
ձեռն մարդոյ՝ այլ որ ստեղծեր զձեռն
մարդոյ : Կուռք հեթանոսաց ոսկի և
արծաթ են, ձեռագործք են մարդկան.

ոչ այսպէս է Տէր՝ որ հաստեացն զմար-
դիկ : Ամենայն կուռք հեթանոսաց գեք
են՝ և տէր զերկինս արար , Տէր նա է
Աստուած : Աստուածք որք զերկինս և
զերկիր ոչ արարին՝ կորիցեն յերկնէ
և յերկրէ : ԶԱստուած օրհնեսցեն եր-
կինք և երկիր՝ որ արարն զնոսա :

ԳԼՈՒԽ ԼԳ .

Խոստովանոչքիւն անձիև քշուա-
ռոչքեան .

Յ . Ո՞վ նմանիցի քեզ յԱստուածս
տէր՝ մեծդ փառաւորեալդ ՚ի սուրբս ,
ահաւոր և գովելի և սքանչելագործ :
Աստուածս ծանեայ զքեզ լոյսդ ճշմա-
րիտ , քանզի ամպ մեծ և խաւարին սա-
շարեալ ունէր զաչս ընդունայնութեան
խնոյ . մինչ զի անձեռնհաս գտայ տե-
սանել զարեգակնդ արդարութեան և
զլոյսդ ճշմարտութեան : Ի խաւարի
անդ թաւալէի ծնունդս մթութեան .

սիրէի զիմ արհաւիրս, զի զլոյս ոչ ճա-
նաչէի: Կոյր էի և կուրուժեանս սի-
րող. և 'ի խաւարէ 'ի խաւար շրջէի.
ո՞վ ամ զիս անտի այսր ուր կոյրն էի՝
նստեալ 'ի խաւարի և 'ի ստուերս մա-
հու:

Բ. Ո՞վ կալաւ զձեռանէ իմմէ առաջ-
նորդեւ ինձ, ո՞ է որ լուսաւորեացն
զիս: Չեւի ես նմին 'ի խնդիր՝ և նա
խնդրեաց զիս. ոչ կոչեցի զնա՝ և նա
կոչեաց զիս. և ո՞ իցէնա: Դու ես տէր
Աստուած իմ, ողորմած զթած՝ հայր
ողորմութեան և Աստուած ամենայն
մխիթարութեան: Դու սուրբ ես տէր
Աստուած իմ, որում խոստովան լի-
նիմ յամենայն սրտէ իմմէ՝ շնորհս ու-
նելով անուանդ քում: Ոչ խնդրէի ըզ-
քեզ՝ և դու զիս խնդրեցեր, ոչ կոչէի՝
և դու զիս կոչեցեր:

Գ. Կոչեցեր զիս յանուն քո. որո-
տացեր յերկնից ձայնիւ մեծաւ 'ի խորս
լսելեաց սրտի իմոյ. եղիցի լոյս և եղև
լոյս. 'ի բաց մեկնեցաւ ամպն մեծ՝ և
հալածեցաւ մէզն խաւարին՝ որ ծած-
կէրն զաչս իմ. տեսի զլոյս քո, ծա-

Կեայ զձայն քո և ասացի • արդարև տէր
 դու ես Աստուած իմ՝ որ հաներ զիս ՚ի
 խաւարէ և ՚ի ստուերաց մահու՝ և կու
 ճեցեր զիս ՚ի սքանչելի լոյս քո՝ և ահա
 արդ տեսանեմ : Շնորհ ունիմ զքէն
 լուսաւորիչդ իմ • դարձայ և տեսի ըզ
 խաւարն յորում էի , և զանդունդս մը
 թուլթեան յոր անկեալ կայի • սասա
 նեալ զարհուրեցայ և ասացի • վայ վայ
 խաւարին՝ յորում ես կայի • վայ կու
 րուլթեանն՝ յորում ոչ կարէի տեսա
 նել զլոյսն երկնից • աւանդ տգիտու
 թեանս իմոյ անցելոյ՝ յորում ոչ գի
 տէի զքեզ : Շնորհս ունիմ զքէն լու
 սաւորիչ և ազատիչ իմ՝ զի լուսաւո
 րեցեր զիս և ծանեայ զքեզ : Անադան
 ծանեայ զքեզ ճշմարտութիւնդ առա
 ջին • ուր ուրեմն իմացայ զքեզ ճշմար
 տութիւն յաւիտենական : Դու ՚ի լոյս
 էիր և ես ՚ի խաւարի , և վասն այնր ոչ
 ծանեայ զքեզ • զի անմարթ էր ինձ
 լոյս ընդունել առանց քո • և զի չեք
 լոյս բաց ՚ի քէն :

ԳԼՈՒԻ ԼԴ .

Խոնկուճն աստուածային մեծփայկ-
չոքեան .

Ա . Սուրբդ սրբոց՝ Աստուած մեծա-
հրաշ, Աստուած աստուածոց և տէր
տէրանց, սքանչելի, անպատմելի, ան-
ըմբռնելի . յորմէ զգողանի հարկա-
նին յերկինս հրեշտակական պետու-
թիւնք . որում երկիրպագանեն տէ-
րութիւնք և աթոռք և ամենայն զօրու-
թիւնք սասանին յերեսաց քոց . որոյ
իշխանութեանն և իմաստութեան ոչ
գոյ թիւ . որ հիմն արկեր երկրի յո-
չէից վերայ . և զծովս սնդեցեր յօդս՝
գոգցես յարգանդի, ամենակալ՝ սուրբ
հզօր Աստուած հոգւոց ամենայն մար-
մնոց . փախնուն ՚ի քոց երեսաց երկինք
և երկիր . և ակնարկութեան քոյ հպա-
տակ կան համօրէն տարրականք . քեզ
երկիր պագանեն և փառաւորեն զքեզ
ամենայն արարածք քո :

Բ. Եւ ես որդի աղախնոյ քոյ՝ ըսա
 առ 'ի քէն հաւատոցս՝ հեղու՛մ զանձն
 իմ առ ոտս մեծվայելչութեանդ քոյ,
 շնորհս ունելով՝ փոխանակ զի արժա-
 նաւոր դատեցեր զիս լուսաւորութեան
 ողորմութեամբդ քով: Եղոյս ճշմարիտ,
 լոյս սուրբ, սիրելի՛ գովելի՛ և սքան-
 ճելի. որ լուսաւորէ զամենայն մարդ
 որ գալոց է յաշխարհ՝ նա և զտեսա-
 նելիս հրեշտակաց: Ահա տեսեալ և
 շնորհս ունիմ զքէն. տեսի զլոյսդ եր-
 կնից՝ որ լուսաւորէ զմիտս իմ առ 'ի
 վերուստ ձգեալ ճառագայթիւք՝ յե-
 րեսաց լուսոյ քոյ, և ուրախ առնէ զա-
 մենայն ոսկերս իմ: Իցէ՞ թէ գլխաւո-
 րեսցի այդ յիս. խնդրեմ 'ի քէն՝ ա-
 ռատաձեռնեա զլոյսդ առ 'ի լուսաւո-
 րել զիս. ձգեսցի յիս լոյսդ առ 'ի քէն:
 • Գ. Ձկնչ է զոր յանձին տանիմ.
 զկնչ հուրս իցէ՛ որ ջեռուցանէ զսիրտ
 իմ. զկնչ լոյսս է՝ ճառագայթեալ 'ի
 սիրտ իմ: Ո՛վ հուր մշտավառ և ան-
 շէջ՝ վառեա և զիս. ո՛վ լոյս համապայ-
 ճառ՝ անմասն խաւարի՛ լուսաւորեա
 զիս: Իցէ՞ թէ վառեցայց 'ի քէն հուր

տուրք • զիսրդ բորբոքդ խնձղագին ,
 Երբ վառումնդ փափաքելի : Այն որոց
 ոչ վառին 'ի քէն • և որք ոչ ընդունին
 զլոյս քո : Ո՛վ լոյսդ ճշմարիտ՝ համօ-
 րէն տիեզերացս լուսաւորիչ • որոց լոյս
 ընու զաշխարհս :

Ի Այն կուրացելոց՝ որք ոչն տեսա-
 նեն զքեզ՝ զարեւդ լուսաւորիչ երկնի և
 երկրի • աւանդ աչաց մթագնելոց՝ որք
 չեն ձեռնհաս զքեզ տեսանել • եղնկ
 տեսանելեաց՝ որք փախեան , զի մի տե-
 սանիցեն զճշմարտութիւն • վաչ վաչ
 'ի բաց դարձելոց՝ անտես լինել ունայ-
 նութեան , զի ոչ զօրեն աչք 'ի խաւար
 ընտանեցեալք հայիլ 'ի ճառագայթս
 ճշմարտութեանն գերակայ • չգիտեն
 համարիլ ինչ զլոյսն՝ որոց 'ի խաւարի
 է բնակութիւն : Զխաւարն տեսանեն ,
 նմին լինին սիրատարփ , զնա ներբո-
 ղեն • գնան 'ի խաւարէ 'ի խաւար՝ և ոչ
 գիտեն յո՛ երթան : Աւանդ նոցա զի ոչ
 գիտեն զինչ կորուսանեն • նա և թը-
 շուառական ևս՝ որք գիտենն զոր կո-
 րուսին • անկանին աչօք բացելովք՝ և
 իջանեն կենդանւոյն 'ի դժօխ :

Ե. Ո՛վ լոյս երջանիկ՝ զոր միայն ա-
 չաց անարատից է տեսանել. երանի ու-
 ըոց սուրբ են սրտիւք զի նոքա զԱս-
 տուած տեսցեն : Սրբեա զիս՝ զօրու-
 թիւնդ սրբարար. բուժեա զտեսանե-
 լիս իմ՝ առողջ խորհրդով խորհել ըզ-
 քէն՝ յոր կորովաբիբ աչաց ևեթ է հա-
 սանել : Աղաչեմ զքեզ՝ բարձ յինէն
 զմէզն նախկին՝ ճառագայթիւք լուսա-
 ւորութեան քոյ՝ անմատոյցդ լուսա-
 սփիւռ, զի կարող եղէց տեսանել զքեզ
 անհրաժեշտ հայեցիւք, և լուսովք քով
 տեսանել զլոյս : Շնորհ ունիմ զքէն,
 լոյսդ իմ, քանզի տեսանեմ աւասիկ .
 ընդարձակեսցի տեսութիւն իմ առ 'ի
 քէն : Բարձ զքօղ յաչաց իմոց՝ խոր-
 հել զսքանչելիս օրինաց քոյ՝ որ սքան-
 չելիդ ես 'ի սուրբս քո : Շնորհ ունիմ
 զքէն լոյսդ իմ. քանզի տեսանեմ աւա-
 սիկ՝ բայց ընդ հայելի օրինակաւ. իսկ
 երբ տեսից դէմ յանդիման. երբ ե-
 կեսցէ օրն բերկրանաց և ցնծութեան
 յորում մտից 'ի յարկս սքանչելի խո-
 ըանիդ՝ մինչև 'ի տունդ Աստուծոյ. զի
 տեսից զքեզ դէմ յանդիման՝ որ տե-

սանեսդ զիս, և լիասցի ցանկութիւնս
իմ:

ՔԼՈՒԽ ԼԵ .

Յաղագս ցանկոչքեան և ծարաւոյ
հոգոյն առ Աստուած .

Յ . Զոր օրինակ փափաքէ եղջերու
յաղբերս ջուրց՝ այնպէս փափաքէ
անձն իմ առ քեզ Աստուած . ծարա-
ւի է անձն իմ առ քեզ Աստուած հը-
ղօր և կենդանի . Երբ եկից երևեցայց
երեսաց քոց : Ո՛վ աղբիւրդ կենաց,
վտակդ ջրոյ կենդանւոյ, երբ իցէ զե-
մատեայց առ ջուրս քաղցրութեան
քոյ, յանապատ՝ յանկոխ և յանջրդի
վայրաց, առ ՚ի տեսանել զգօրութիւն
և զփառս քո, և զովացուցից զծարաւս
իմ ՚ի ջուրց ողորմութեան քոյ : Ծա-
րաւի եմ տէր աղբիւրդ կենաց՝ զովա-
ցո զիս . ծարաւի եմ տէր, ծարաւի
եմ առ քեզ Աստուած կենդանի . Երբ

եկից և երևեցայց առաջի երեսաց քոց :
 Իցէ՞ թէ տեսից զայն օր զուրախու-
 թեանն և զցնծութեան՝ զոր արար տէր
 առ 'ի խնդութիւն և 'ի բերկրանս մեր :

Բ • Ո՛վ լուսասրայծառ և սքանչելի
 աւուրն՝ որոյ չիք երեկոյ և կամ մուտք ,
 յորում լուայց զձայն գովութեան զու-
 րախութեանն և զխոստովանութեան ,
 թէ մուտ յուրախութիւն տեառն քոյ ,
 մուտ յուրախութիւն մշտնջենաւոր 'ի
 տուն տեառն Աստուծոյ քոյ , ուր մե-
 ծամեծքն են և անքննելիք և սքանչե-
 լիք՝ որոյ ոչ է թիւ • մուտ յուրախու-
 թիւն առանց տխրանաց՝ որ զյաւխոե-
 նականն տանի յանձին զխնդութիւն •
 ուր ամենայն բարիք են , և չիք ինչ 'ի
 չարեաց սակի • ուր կան փափաքեալքդ ,
 և մերժեալ են ատեցեալքդ • ուր կեանք
 են քաղցր և սիրելի և յաւերժայիշա-
 սակ • ուր չիք թշնամի դիմամարտ՝ և
 ոչ հրապոյրք • այլ ամենայնիւ և ան-
 քոյթ վստահութիւն , խաղաղութիւն
 և անդորրաւէտ զուարճութիւն , քաղցր
 երջանկութիւն , երջանիկ յաւիտե-
 նականութիւն , յաւիտենական երա-

հուլթիւն, և երանեալ երրորդուլթիւն, երրորդուլթեանն միուլթիւն, միուլթեանն աստուածուլթիւն, աստուածուլթեանն տեսուլթիւն երանացեալ՝ որ խնդուլթիւնն է տեառն Աստուծոյ քոյ :

Գ . Ո՛վ խնդուլթիւն գերակայ՝ և յալթական ամենայն բերկրանաց, ուր բաց ՚ի նմանէ չեք ինչ ուրախուլթիւն : Ե՞րբ մտից առ քեզ՝ տեսանել զԱստուածն իմ՝ որ ՚ի քեզն բնակի . անդր մտից՝ և տեսից զտեսուլթիւնն զայն մեծարդի : Զի՛նչ է որ զիս յետս ՚ի բաց ընկրկէ . վայ՛ ինձ զի ընդ երկար եղև պանդխտուլթիւն իմ . մինչև ցե՛րբ ասացեն ցիս՝ ո՛ւր է աստուածն քո . մինչև ցե՛րբ ասացեն ցիս թէ կա՛ մնա . և ահա զի՛նչ ակնկալուլթիւն է իմ . ո՞չ ապաքէն ակն ունիմք փրկչիդ մերոյ տեառն Աստուծոյ Յիսուսի Քրիստոսի, որ նորոգեաց զմարմին խոնարհուլթեան մերոյ՝ ըստ փառաց մարմնոյ իւրոյ : Մնամք դարձի տեառն մերոյ ՚ի հարսանեաց՝ մուծանել և զմեզ յիւրոյին հարսանիս : Եկ տէր և մի յապաղեր . եկ տէր Յիսուս Քրիստոս, եկ

և յայց ել մեզ 'ի խաղաղութիւնս . եկ
 և հան զկապեալս 'ի բանտէ՝ զի ուրախ
 լիցուք առաջի քո լիապատար սրտիւ .
 եկ փրկիչդ մեր՝ փափաքելիդ ամենայն
 ազանց , ցոյց զերեսս քոյ՝ և անդէն փրկ-
 կութիւն է մեզ . եկ լոյս և փրկիչ իմ .
 հան 'ի բանտէ զանձն իմ՝ և խոստովան
 եղէց զանուն սուրբ քո :

Դ . Մինչև ցերբ տէր մնացից 'ի թը-
 շուառութեան 'ի ծուխ մահկանացու
 կենցաղոյս . աղաղակեմ առ քեզ՝ և գու-
 ոչ լսեա . լուր ձայնի իմում Տէր՝ որ
 կարգամս առ քեզ յայսմ մեծի ծովու ,
 և հան զիս 'ի նաւահանգիստ երանու-
 թեան յաւիտենից . երանի որոց 'ի վը-
 տանդաց ծովուս առ քեզ տէր առաջ
 նորդեցան , և յապահով նաւահան-
 գիստդ հասանել արժանաւորեցան :
 Ո՛վ երանելեացն՝ որ 'ի ծովէս յափունս
 հասին , յաքսորանացս 'ի հայրենիս , 'ի
 բանտէ յապարանս՝ 'ի ցանկացեալն
 հանգիստ երանաւէտ անդորրութեան .
 որք յաղթանակաւ մշտնջենաւոր փա-
 ռաց՝ զոր ընդ բազում փորձութիւնս
 խնդրեցին յաստիս՝ արդ ստացեալ է .

բանութեամբ ցնծան յաւիտեան : Ո՛վ
 ճշմարիտ երանելեացն , և երիցս և չո-
 րիցս երանի՛ , որոց անցեալ ընդ ամե-
 նայն չարիս , առ յապահովութիւն ան-
 կորուստ փառացն՝ դտան արժանաւոր
 հասանել առ թագաւորդ փառաց : Ո՛վ
 յաւիտենական թագաւորութիւն՝ որ
 'ի վերայ համօրէն տիեզերաց . ուր լոյսն
 անշէջ , և խաղաղութիւնն աստուա-
 ծային , որ 'ի վեր է քան զամենայն
 միտս . յորում հանգչին սրբոցն ան-
 ձինք , և ուրախութիւն է մշտնջենա-
 ւոր 'ի վերայ գլխոց նոցա . ստացան
 զցնծութիւն և զկանգութիւն , և տեղի
 տացեն 'ի նոցանէ ցաւք և հեծութիւնք :

Յ . Զխարդ հրաշափառ է թագաւո-
 րութիւնն՝ յորում թագաւորեն տէր
 ընդ քեզ ամենայն սուրբք . արկեալ
 զանձամբ զլոյս որպէս զօթոց . և սպակ
 եղեալ 'ի գլուխս իւրեանց 'ի քարանց
 պատուականաց : Ո՛վ թագաւորութեն
 մշտնջենաւոր երանութեան . ուր դու
 տէր յոյսդ սրբոց՝ և սպակ փառաց դէմ
 յանդիման երևիս սրբոց քոց , զուար-
 ճացուցեալ զնոսա ամենայն ուստեք

խաղաղութեամբդ քով՝ որ 'ի վեր է քան զամենայն միտս . անդ ուր խնդու-
թիւնն է անվախճան , ուրախութիւն
առանց տրտմութեան , փրկութիւն ան-
ցաւ , ընթացք անաշխատ , ըյս ան-
մասն խաւարի , կեանք անմահ , և ամե-
նայն բարիք՝ առանց ինչ չարեաց : Ուր
մանկութիւնն ծերանայ խակ ոչ , կենաց
չիք սահման , վայելչութեանն չիք թալ-
կութիւն , սիրոյն չիք ցրտանալ , ուրա-
խութեանն չիք նուազիլ , ցաւոց չիք յի-
շատակ , հեծութեան չիք ձայն , տրտ-
մութեան չիք երևոյթ , ցնծութիւն
միշտ , և ոչ ոք զանգիտէ 'ի չարեաց .
զի ժառանգութիւն է անդ ծայրագոյն
բարւոյն , որ է տեսանել հանապազ
զերեսս տեառն զօրութեանց :

2. Երանի որոց 'ի նաւաբեկութենէ
աստի կենացս 'ի մեծ ուրախութիւնդ
ժամանել արժանաւոր եղեն . և եղնկ
թշուառութեանս մերում՝ որ ընդ ա-
լեսաստ և ընդ մրրկայոյզ անդունդս
ծովուս մեծի նաւարկեմք . անգիտա-
ցեալք զհասանելն 'ի նաւահանգիստ
փրկութեան . թշուառս արդարեւ , զի

զի կեանք նոցա յաքսորս և՛ի վտանգս՝
 կատարածն կեղակարծ՝ անձանօթ գո-
 լով ելից մերոց՝ քանզի ամենայն որ
 ինչ անստոյգն է՝ առ յաւիտեանս պա-
 հեալ մնայ : Ծախեալ կամք ընդ ալիս
 ծովուս՝ առ նաւահանգիստդ ակնկա-
 ոոց : Ո՛վ հայրենիքդ մեր անվըդով, ՚ի
 հեռուստ տեսանեմք զքեզ, ՚ի ծովէ
 աստի ողջունեմք զքեզ, ՚ի հովտէս առ
 քեզ ակնարկեմք՝ և դուն դործեմք
 արտասուօք՝ եթէ իցէ՞ մեզ ժամանել
 առ քեզ :

Է . Ակնկալութիւնդ ազգի մարդկան
 Քրիստոս Աստուած յԱստուծոյ՝ յոյս
 մեր և զօրութիւն . որոյ ճառագայթք
 լուսոյ՝ ՚ի հեռուստ անտի ՚ի մառախ-
 լապատ ամպոց լոյս տայ աչաց մերոց՝
 դոգ իբրև զաստղ ծովու, զի դէմ դի-
 ցուք առ քեզ՝ առ նաւահանգիստդ :
 Աջրեա տէր զնաւս մեր ղեկաւ խաչի
 աջոյդ քոյոյ՝ զի մի կորկցուք ընդ կո-
 հակս ալեաց . մի ընկզմեսցէ զմեզ պը-
 տոյտ ջուրց, և մի կլցէ զմեզ անդունդ .
 այլ խարսխաւ նաւուդ ձգեա զմեզ ՚ի
 ծովէ աստի առ քեզ՝ որ միակ արգա-

Հատոգ ես մեր . զոր 'ի բացատ վայրացս
 նշմարեմք արտասուլաթոր աչօք՝ իբրև
 զաստղ վաղորդայնի՝ և զարեգակն ար-
 դարուլթեան՝ 'ի ծովափունս այդր եր-
 կնային գաւառիդ մեզ մնալով :

Ը . Առ քեզ աղաղակեմք փրկեալքս
 քե՛կ՝ որ արդ յաքսորս կամք , զորս սա-
 տուական արեամբ քով գնեցեր : Լուր
 մեզ Աստուած փրկիչ մեր , յոյս ամե-
 նայն ծագաց երկրի և որ 'ի ծով հեռի :
 Կամք 'ի խռովայոյզ ծովու՝ և դու կաս
 'ի ծովեզերս՝ հայեցեալ 'ի վտանգս
 մեր , փրկեա զմեզ վասն անուան քո :
 Տուր մեզ տէր՝ զմէջն ունելով զսկիւ-
 ղայ և զքարիբդեայ՝ զերծանել և յեր-
 կուց ժայռից . ողջանգամ՝ նաւաւ և
 լիաձեռն վարձուք յանքոյթ 'ի նաւա-
 հանդիստդ ժամանել :

ԳԼՈՒԽ ԼԶ .

Յարագս փառաց վերին հայրե-
կեաց .

Ն . Ի ժաման գտանել մեր առ քեզ
առ աղբիւրդ իմաստութեան , և առ
լոյսդ անսպառ՝ մինչև ոչ ևս ընդ հայելի
օրինակաւ տեսանել զքեզ՝ այլ դէմ
յանդիման , յայնժամ յագեսցի՝ ի բա-
րութեան ցանկութիւն մեր , զի չեք ինչ
փափաքելի արտաքոյ՝ բայց միայն դու
տէր ծայրագոյն բարի , որ յաղթա-
նակդ ես երանելեաց , պսակ վայելչու-
թեան նոցա՝ և ուրախութիւն մշտնջե-
նաւոր ՚ի վերայ գլխոց նոցա , անդոր-
րացուցեալ զնոսա ներքոյ և արտաքոյ
խաղաղութեամբդ քով՝ որ ՚ի վեր է
քան զամենայն միտս . անդ տեսցուք ,
սիրեսցուք և բարեբանեսցուք : Տես-
ցուք լուսովդ քով զլոյս քո , զի առ
քեզ է կենացն աղբիւր , և լուսովդ

քով տեսանեմք զլոյս • խսկ լոյս որ
 պիտի • անչափ, անմարմին, անսպա-
 կան, անըմբռնելի, անսպառ, անչէջ,
 անմատոյց, անստեղծ, ճշմարիտ և աս-
 տուածային, որ լուսաւոր առնէ զաչս
 հրեշտակաց, ուրախ առնէ զմանկու-
 թիւն սրբոց, որ է լոյս լուսոյ և աղ-
 բիւր կենաց՝ դու տէր Աստուած իմ:

Բ • Դու լոյս ես՝ զի լուսով քով տե-
 սանեմք զլոյսդ • քե զքեզ՝ ՚ի ճառա-
 դայթս երեսաց քոց՝ ՚ի տեսանել մեր
 զքեզ դէմ յանդիման: Զի՛նչ է դէմ
 յանդիմանն տեսանել՝ բայց զոր ասէրն
 առաքեալ ճանաչել՝ որպէս և նայն ծա-
 նեաւ զիս, ճանաչել զճշմարտութիւն
 և զփառս քո: Այս է տեսանելն դէմ
 յանդիման • իմանալն զհօր կարողու-
 թիւն, զորդւոյն իմաստութիւն, զսրբ-
 բոյ հոգւոյն գթութիւն, զամենասուրբ
 երրորդութեանն մի և անբաժանելի
 էութիւն • քանզի տեսութիւն երեսաց
 Աստուծոյ կենդանւոյ, զգերագոյն բար-
 ւոյն, զհրեշտակացն և զամենայն զսրբ-
 բոցն ինդութեան, զյաւիտենից կե-
 նացն վարձուց, զվայելչութեան սլա-

կին , զերանութեան յաղթանակին ,
 զարդասաւոր հանգստեանն , զգեղե-
 ցիկ խաղաղութեանն , զառ'ի ներքուստ
 և զարտաքուստ ուրախութեանն , զգը-
 րախաին Աստուծոյ , զվերնոյն Երու-
 սաղէմի , զերանեալ կենացն , զյաւի-
 տենական բերկրանացն և զխաղաղու-
 թեանն Աստուծոյ՝ որ 'ի վեր է քան
 զամենայն միտս :

Գ . Այս է լիուլի երանութիւն և զե-
 ղուն փառաւորութիւն մարդկան . տե-
 սանել զերեսս Աստուծոյ իւրոյ՝ որ ա-
 րար զերկինս և զերկիր , որ ստեղծն
 զնա , որ փրկեացն զնա՝ և որ փառա-
 ւորեացն զնա : Տեսցէ զնա ճանաչե-
 լով . սիրել սիրեսցէ՝ և ստացութեամբն
 բարեբանեսցէ . քանզի նա ինքն բաժին
 ժառանգութեան ժողովրդեան իւրոյ
 սրբոյ՝ զոր փրկեաց . նա ինքն ժառան-
 գութիւն երանութեան նոցա , յաղ-
 թանակ և վարձ ակնկալութեան . եղէց
 ասէ վարձ քո մեծ . քանզի և մեծաց՝
 մեծամեծքն իսկ 'ի դէպ գան : Արդարև
 տէր Աստուած իմ՝ մեծ էս յոյժ քան
 ամենայն աստուածս , և վարձք՝ առա-

ւելեալ . քանզի ոչ եթէ մեծ ես դու
 և բաշխոյք առ 'ի քէն վարձուցն դուզ
 նաքեայ , այլ ըստ մեծութեան քում
 մեծ են և պարգևքդ քո , զի ոչ այլ իմն
 ես դու , և այլ վարձք քո . այլ դու մեծ
 ես , դու ես և ողորմութիւն քո մեծ .
 դու ես որ պատկես՝ և դու ինքն սլը
 սակդ ես . դու ես որ խոստանաս՝ և դու
 ինքն՝ զոր խոստանան . դու ես պար
 գելիչ և պարգև , յաղթական և յաղ
 թանակ յաւիտենից երանութեան :

Գ . Արդ դու ես որ պատկես՝ և ո
 ըով պատկես . պատկ յուսոյ իմոյ՝ փա
 ոօք պաճուճեալ , ճրագ դուարթա
 ըար , ըյս նորոգիչ , վայելչութիւն գե
 ղազարդ . յոյս իմ մեծ՝ և ցանկութիւն
 սրտից սրբոց : Քոյդ տեսութիւն ամե
 նայնիւ պարգև է , ամենայնիւ յաղթա
 նակ է , և ամենայնիւ խնդութիւն է՝ ո
 ըում սպասեալ մնամք : Քանզի այս
 իսկ է յաւիտենականն կենդանութիւն ,
 այս է քո իմաստութիւն , կեանք յա
 վիտենական՝ զի ծանկցուք զքեզ միայն
 ճշմարիտ Աստուած՝ և զոր առաքեցեր
 զՅիսուս Քրիստոս : Եւ 'ի տեսանել

անդ մեր զքեզ միայն Աստուած ճշմարիտ, կենդանի, ամենակալ, պարզ, անտես, անպարագիր, անհաս, և զորդիգքո միածին՝ համագոյ և յաւիտենակից քեզ զտէր մեր Յիսուս Քրիստոս, զոր վասն մերոյ փրկութեան առաքեցեր յաշխարհ՝ զօրութեամբ հոգւովգքով սրբով երեքանձնեայ և միաբուն, Աստուած սուրբ միայն՝ և բաց ՚ի նմանէ չլք այլ Աստուած, յայնժամ ՚ի ձեռն ունիցիմք զոր խնդրէաքն՝ ըզկեանս յաւիտենից, զփառան մշտնջենաւոր՝ զոր պատրաստեցեր սիրելեաց քոց, պահեցեր երկիւղածաց քոց, և խոստացար տալ՝ որոց խնդրենն զերեսս քո միշտ:

Ե. Եւ դու տէր Աստուած իմ՝ որ ստեղծեր զիս յորովայնէ մօր խոյ՝ որ և յանձն արար զիս ՚ի ձեռս քո, մի թողուր զիս այլ ևս՝ ՚ի միոյն ՚ի բազումս ձգիլ. և ՚ի բաց հան զիս յորոց արտաքոյ իցեն առ յինէն. զի ասասցէ քեզ սիրտ իմ. խնդրեաց զքեզ անձն իմ. զերեսս քո տէր խնդրեցից՝ զտեսան զօրութեանց, յորում են մշտնջենա-

ւոր փառք երանելեաց : Ուրախ լիցի
 անձն իմ՝ զի երկիցէ յանուանէ քում
 մէ . ուրախ եղիցին որք խնդրենն զտէր-
 նա յաւէտ ևս՝ որք գտանենն . զի թէ
 խնդութիւն իցէ խնդրելն՝ իսկ քանի՞ն
 'ի գտանելն : Ապա խնդրեցից հանա-
 պազ զերեսս քո փութով և անյապազ
 թերևս բացցի ինձ դուռն արդարու-
 թեան՝ 'ի մուտ ինձ յուրախութիւն
 տեանն իմոյ : Այս դուռն տեանն է՝ և
 արդարք մտանեն ընդ սա :

ԳԼՈՒԽ ԼԷ .


Աղօրք առ երրորդուրիւն տարր .

Ե. Ո՛վ երէք անձիւք՝ հաւասարք և
 յաւիտենակիցք , մի Աստուած ճշմա-
 ըիտ՝ հայր և որդի և հոգի սուրբ՝ որ
 միայն բնակես յանմահութեան՝ և յան-
 մատոյց 'ի լոյս . որ հիմնեցեր զերկիր
 զօրութեամբ քով , և վարես զաշխարհս
 իմաստութեամբ քով . սուրբ , սուրբ ,

տուրք տէր Աստուած զօրութեանց՝ ա-
հաւոր և հզօր, արդար և բարեգութ,
սքանչելի, բարեբանելի, սիրելի. մի
Աստուած երեքանձնեայ՝ մի էութիւն,
կարողութիւն, իմաստութիւն, բարու-
թիւն, մի և անբաժանելի երրորդու-
թիւն, բաց ինձ որ աղաղակեմս զգը-
րունս արդարութեան՝ զի մօտից ընդ
այն և խոստովան եղէց քեզ տեառնդ:

Բ. Ահա զգրունս քո հարկանեմ
տնանկս՝ զմեծի տանուտեառնդ. հրա-
ման տուր բանալ խնդրողես՝ որ ասա-
ցերդ, թէ որ բաղես բացցի նմա. բաղ-
խեն զգրունս քո փափաք ցանկութեան
աղաղակի խնդրուածաց իմոց, և հե-
ծութիւնք արտասուաց աչաց իմոց. ա-
ռաջի քո է ամենայն ցանկութիւն իմ.
և հեծութիւն իմ չէ թագունս առ ՚ի
քէն: Տէր մի դարձուցաներ զերեսս
քո յինէն, և մի դառնար բարկութեամբ
՚ի ծառայէ քումմէ: Հայր ողորմու-
թեանց, լուր աղաղակի որբոց քոց, և
ձգեա զձեռն քո յօգնութիւն ՚ի վեր
առնուլ զիս ՚ի խորոց ջուրց, ՚ի դեժ
Թշուառութեան և ՚ի տղմոյ սպաւկա-

նութեան, զի մի կորեայց ՚ի տեսանել
 անդ աչաց ողորմութեան քոյ՝ և ՚ի հայ-
 ել կամաց զթութեան քոյ. այլ մա-
 տեայց առ քեզ տէր Աստուած իմ, տե-
 սանել զմեծութիւն թագաւորութեան
 քոյ, և հայեցեալ յերեսս քո հանա-
 պազ՝ բարեբանեցից զանուն քո սուրբ:
 Տէր սքանչելագործ՝ որ ուրախ առնես
 զսիրտ իմ յիշատակաւ քո, և լուսաւոր
 առնես զմանկութիւն իմ՝ մի թողուր
 զիս յաւուր ծերութեան իմոյ. այլ ու-
 ռախացո՛ զոսկերս իմ, և նորափետուր
 զարգարեա իբրև զարծուոյ:



ՆՈՐԻՆ

ՍՐԲՈՅՆ ԱԻԳՈՍՏԻՆՈՍԻ

Ս.ՌԶԵՌՆԱԿԱՆ

Faint, illegible text, possibly bleed-through from the reverse side of the page.

UNIVERSITY OF CHICAGO
LIBRARY

Faint, illegible text, possibly bleed-through from the reverse side of the page.

ՆՈՐԻՆ

ՍՐԲՈՅՆ ԱԻԳՈՍՏԻՆՈՍԻ


ԱՌՁԵՌՆԱԿԱՆ

Քանզի յորոգայթից միջի կամք ,
դիւրաւ հովանամք յերկնաւոր տեն-
չանաց . սմին իրի հանապազորդ կարօ-
տիմք սատարութեան , որով արթնա-
ցեալ դիմեսցուք՝ ցորչափ վայրաբե-
րիմք , ՚ի վեր կոյս առ Աստուած մեր՝
առ ճշմարիտ և ծայրագոյն բարին : Յա-
ղագս այսորիկ ոչ առ յանդուզն յանձ-
նապաստանութեան , այլ առ մեծի սի-
րելութեան Աստուծոյ մերոյ՝ բունն
հարի ՚ի սոյն պիտառութիւն ՚ի փառս
Աստուծոյ . որպէս զի ՚ի պանծալի պան-
ծալի ասացուածոց հարցն սրբոց՝ զհա-
մառօտ և զառձեռն պատրաստ բան
զԱստուծոյ իմմէ լիցի ինձ ընդ իս ու-
նել միշտ . և ցորչափ հովանամ , ՚ի հրոյ
աստի ընթերցուածոյս՝ ՚ի նորուն վա-
ռեցայց սէր : Եւ արդ մերձ լեր առ իս
Աստուած իմ , զոր խնդրեմ , զոր սի-

րեմ, զոր սրտիւ և բերանով, և յամե-
նայն զօրութենէ փառաւորեմ և եր-
կիրպագանեմ:

Սիրտ իմ եռացեալ 'ի քեզ, քոյին
վառեալ սիրով, առ քեզ հառաչէ, առ
քեզ հեծեծէ, զքեզ միայն ցանկայ
տեսանել. չիք ինչ նմա առաւել քաղցր
բայց միայն զքէն խօսել, զքէն լսել,
զքէն գրել, զքէն ճառել, զփառս քո
որոճել ստէպ 'ի խորհուրդս սրտի. որ-
պէս զի քոյդ քաղցր յիշատակ լիցի 'ի
մէջ մրրկացս դիւր ինչ և հանգիստ իմ:

Արդ զքեզ կարգամ ով տենչալիդ,
առ քեզ աղաղակեմ մեծաւ գոչմամբ
'ի խորս սրտի իմոյ ողջոյն: Եւ յորժամ
կարգամս առ քեզ, անշուշտ յանձին
իմում կարգամ: Ասան զի ամենևին
լինէի իսկ ոչ, եթէ դու չլինէիր յիս.
և եթէ ոչ էի ես 'ի քեզ, ոչ էիր դու
յիս: Յիս ես, վասն զի կաս մնաս յու-
շի իմում. յայգմանէ ծանեայ զքեզ, և
յայգմ գտանեմ զքեզ, յորժամ յուշ
ածեմ զքեզ, և զուարճանամ 'ի քեզ.
յորմէ ամենայն, որով ամենայն, յո-
րում ամենայն:



ԳԼՈՒԽ Ա.

Յադագս սքանչելի իսկոռեան և
ևերկայոռեանն Աստուծոյ .

Դու աէր զերկինս և զերկիր ընուս,
որ զամենայն կրես առանց ծանրու-
թեան, և լցուցիչ ես ամենայնի ան-
պարագրութեամբ: Մշտագործ՝ յա-
ւերժահանգիստ . ժողովող՝ անկարօտ .
խնդրող՝ ապենիազ . սիրող՝ անախտ, և
նախանձաւոր՝ աներկեան: Չղջանաս՝
անցաւութեամբ, բարկանաս՝ անախ-
տութեամբ . փոփոխես զգործս, այլ
ոչ փոխես զխորհուրդս: Ընգունիս՝
զոր գտանես . այլ ոչ երբէք կորու-
սեալ էք զայն: Ոչ երբէք չքաւո-
րիս, և ուրախ լինիս ՚ի շահելդ . ոչ եր-
բէք ագահես, այլ սգահանջես զտոկո-
սիս: Հատուցանես՝ ում չես սարտա-

կան . կամ միշտ պահանջի 'ի քէն որ
պէս թէ պարտական իցես :

Եւ ո՞րք ունի ինչ , որ ոչ քո իցէ :
Վճարես զպարտս՝ անպարտդ ամե-
նայնի . թողուս զպարտիս՝ անկորուստ
ամենայնիւ : Որ ետդ ամենուրեք , և ա-
մենայն ուրեք բովանդակ : Որ զգալի
մեզ լինիս , և անտեսանելի գտանիս :
Որ անպակասելիդ ես երբէք , և սա-
կայն հեռի ես 'ի խորհրդոցն անզգա-
մաց : Որ և ոչ անդանօր պակասես , ու-
րանօր հեռի գտանիս . վասն զի ուր-
չկաս շնորհօք , կաս վրէժխնդրու[թիւն] :
Որ յամենայն տեղիս առաջիկայ ես , և
անգտանելի : Ի կալ քո անշարժական՝
զհեա ընթանամք քո , և հասանել ան-
կարանամք : Որ 'ի բռին ունիս զամե-
նայն , ընուս զամենայն , պարագրես զա-
մենայն , գերազանցես զամենայն , և
պահես զամենայն :

Որ ուսուցիչդ ես սրտից հաւատա-
ցելոց առանց շնջման բանից : Որ ոչ
տեղեօք անջրպետիս , ոչ ժամանակօք
յեղափոխիս , անմերձենալի և անհե-
ռանալի . որ բնակեսդ 'ի լոյս անուա-

տոյց • զոր ոչ ոք ետես 'ի մարդկանէ ,
 և ոչ տեսանել կարող է : Ի քեզ կա-
 լով մնալով հանդարտեալ՝ ընդ ամե-
 նայն տեղիս յածիս համօրէն • զի ան-
 հնար է քեզ երկփեղկիլ և բաժանիլ •
 վասն զի ճշմարտապէս մի ես • և ոչ 'ի
 մասունս տրոհիս , այլ բոլորդ զբոլորն
 ունիս , զբովանդակն ընուս , զամենայնն
 զննես և ժառանգես :

Գ Լ Ո Ւ Խ Բ •

Յաղագս անձառ գիտոչեան , և
 տեսչոչեանն Աստուծոյ •

Եթէ զաշխարհ ամենայն ընուցուն
 մատեանք , քոյդ գիտութիւն անճա-
 ոական՝ մնայ անպատմելի : Եւ զի անա-
 սելի ես , վասն որոյ և անգրելի , և ան-
 պարագրելի : Դու ես ակն լուսոյ աս-
 տուածութեան , և արեգակն յաւիտե-
 նական սպայծառութեան : Մեծ՝ ան-
 քանակ , վասն որոյ և անչափ : Բարի՛

անորակ • վասն որոյ ճշմարիտ և ծայրագոյն բարի • և ոչ ոք բարի, բայց գումիայն : Որոյ կամքն է գործ, և կամեղձ կարել, որ զամենայնն՝ զոր յոչնչէ արարեր, միայն կամօք արարեր • որ զամենայն արարած քո առանց բնաւին կարօտութեան ստացեալ ունիս, և առանց աշխատութեան ղեկավարես, և առանց ձանձրութեան ուղղես, և չիք ինչ՝ որ վրդովիցէ զկարգ ինքնակալութեան քո, եթէ 'ի վեր և եթէ 'ի խոնարհ : Որ չունիս քեզ տեղի սեպհական, և ամենուրեք բնակես • որ զամենայն պարագրես՝ անպարունակ • և ամենայն ուրեք ես ներկայ առանց գրից և շարժութեան : Որ և ոչ չարին ես գտակ, զոր անհնար է քեզ առնել • այնմ՝ որում ամենայն ինչ հնարաւոր է • և ոչ երբէք զլջացար՝ ընդ որ արարեր : Որոյ բարութեամբ և բարերարութեամբ եղեաք, և արդարութեամբ վրէժս լուծանեմք, և գթութեամբ ազատիմք : Որոյ ամենակարողութիւն ղեկավարէ զամենայն, ուղղէ, և ընուզարարածս իւր : Եւ ոչ առ այս ասեմք՝

ընուլ քեզ զամենայն, որպէս այն թէ
 զքեզ բովանդակիցեն. այլ զի տիրա-
 պէս առ ՚ի քէն բովանդակին: Եւ ոչ
 մասն մասն ընուս զամենայն. և ոչ բը-
 նաւ երբէք այնպէս է կարծելի, որպէս
 թէ իւրաքանչիւր ինչ ըստ մեծութեան
 բաժնի իւրոյ ունիցին զքեզ, այս է մեծն
 զմեծ, և փոքրն զփոքր մասն. այլ ա-
 ռաւել՝ դու ինքնին գլխովին ես բոլոր
 յամենայնի, և ամենայն ՚ի քեզ: Քո
 ամենակալ զօրութի զամենայնն յինքն
 փակէ միանգամայն. և ոչ կարէ ոք
 գտանել ելս հնարից զերծ լինելոյ ՚ի
 քումմէ կարողութենէ: Զի որ ոչն ու-
 նի զքեզ հաշտ, ոչ զերծանիցի և ՚ի
 ձեռաց ցասուցելոյդ:

Գ Լ Ո Ւ Խ Գ .

Յադագս տնկչանաց սատոռածիմաց
հոգոյ .

Եւ արդ զքեզ ամենագուԹդ Աս-
տուած կարդամ 'ի սիրտ իմ, զոր սլատ-
րաստեցեր ընդունակ քեզ լինել՝ փա-
փաքանօք, զոր շնչես և ազդես 'ի նա :
Աղէ մուտ 'ի նոյն , և բարեյարմարեա
զայն քեզ, զի ժառանդեսցես զնա՝ զոր
ստեղծեր և նորաստեղծեր . եղիցի ինձ
ունել զքեզ իբրև կնիք 'ի վերայ սրտի
իմոյ : Աղաչեմ, մարդասէր, մի զիս ան-
տես առներ՝ որ կարդամս առ քեզ . զի
մինչ չև էր իմ կարդացեալ առ քեզ,
դու կոչեցեր և խնդրեցեր զիս . որպէս
զի ես ծառայ քո խնդրեցից զքեզ . 'ի
խնդրելն գտից, և 'ի գտանելն սիրե-
ցից : Խնդրեցի և գտի զքեզ տէր . և
տնկչամ սիրել : Աճեցո զտնկչ իմ, և
տուր զոր ժամանա : Զի Թէ և տայցես

ինձ զամենայն՝ զոր արարեր, չէ բա-
ւական ծառայի քում, եթէ ոչ զքեզ
տայցես: Հնապա, տուր ինձ զքեզ ինքն
գլխովին. Աստուած իմ, առատաձեռ-
նեա ինձ զքեզ: Ահաւասիկ սիրեմ ըզ-
քեզ. և եթէ սակաւ է, սիրեցից ևս
քան զևս: Այլ արդ քո սիրովք եմ
հարեալ, քո տարփանօք խորովեալ,
քո քաղցր յիշատակաւ զուարթա-
ցեալ:

Աւասիկ ցորչափ միտք իմ առ քեզ
հառաչեն, և զքոյդ խորհին անձառ
մարդասիրութիւն, բեռն մարմնոյս ան-
դամ ոչ այնչափ զիս ծանրէ, դադա-
րեն ամբոխմունք խորհրդոց, ծանրու-
թիւն աղցաւոր կենաց և թշուառու-
թեանց ոչ ըստ սովորութեան բթա-
ցուցանէ. լռէ ամենայն, խաղաղի ամե-
նայն ինչ: Սիրտ բորբոքի, ոգին բեր-
կրի, ուշն արծարծանի, միտք լուսա-
ւորին. և հոգին գլխովին՝ ի տենչմանէ
քումդ տեսլեան վառեալ՝ ի սիրոյ ան-
տի անտեսից տեսանէ զանձն յափրչ-
տակեալ: Առցէ հոգիս թևս որպէս
զարծուոյ, թռիցէ, և ոչ վաստակես.

ցի, թուիցէ և հասցէ մինչև 'ի վայել
 չուծիւն տան քո, և յաթոռ փառաց
 քոց. և անդ 'ի վերայ սեղանոյ կոչնոց
 վերին քաղաքացեաց պարարեսցի 'ի
 դաղտնեաց քոց՝ 'ի տեղի արօտոյ առ
 լիագեղուն վտակօք: Դու լիջիր ուրա
 խուծիւն մեր, դու ես յոյս մեր, կեանք
 և փրկուծիւն: Դու լիջիր խնդուծիւն
 մեր, որ լինելոցդ ես վարձ և սսակ
 մեր: Զքեզ հանապազ խնդրեսցէ անձն
 իմ. և դու տուր՝ զի մի լքայց 'ի խըն
 դրել անդ:

ԳԼՈՒԽ Դ .

Թե՛ որպէս պարտ է սիրել , և
խնայրել զՏէր .

Վայ անձին հիգացելոյ , որ ոչ խընդրէ և ոչ սիրէ զՔրիստոս . զի մնայ գօսացեալ և չուռացեալ : Կորուսանէ զիւր կենդանութիւն , այն՝ որ ըզքեզ ոչ սիրէ զԱստուած իւր : Որ հոգայ կեալ , և ոչ վասն քո՝ տէր , ոչ ինչ է և յոչինչ համարեսցի : Որ ոչ առնու յանձն կենդանի լինել՝ ի քեզ , մեռեալ է : Որ ոչն իմաստնանայ , անմտանայ : Ով ամենագութ , քեզ յանձն առնեմ զանձն իմ , հատուցանեմ և անձնատուր լինիմ . որով եմ , որով կենդանի եմ , և իմացական : Առ քեզ ապաւինիմ , քեզ ազնուանիմ , և ՚ի քեզ զնեմ զամենայն յոյս իմ . որով ունիմ յառնել , կենդանի լինել , և հանգչել : Քեզ փափաքեմ , զքեզ սիրեմ , քեզ

Էրկիրպագանեմ. ընդ որում լիցի ինձ
 կալ մնալ, թագաւորել, և երանելի լի-
 նել: Անձն՝ որ ոչ խնդրէ զքեզ և ոչ
 սիրէ, այլ սիրող է աշխարհի, ծառայ
 մեղաց, և գերի ախտից, ոչ երբէք հան-
 պիստ գտանէ և ոչ ապահովութիւն:
 Ծառայասցի քեզ միշտ անձն իմ, մար-
 դասէր. յոգւոց ելանիցէ միշտ առ քեզ
 պանդխտութիւն իմ. բորբոքեսցի սի-
 րով քո սիրտ իմ: Ի քեզ հանգիցէ
 անձն իմ Աստուած իմ. քո լիցի նկա-
 տող՝ի խորս սրտի. երգեսցից զօրհնու-
 թիւնս քո՝ի ձայն ցնծութեան. և այս
 եղիցի միթարութիւն իմ յայս աքսու-
 րանս: Ապաստան լիցին միտք իմ ընդ
 հովանեալ թևոց քոց՝ ի յարկաց խոր-
 հրդոց աշխարհիս այսորիկ: Իլասցէ
 դագարեսցէ ի քեզ սիրտ իմ, սիրտ՝
 ծով մեծ դիզացեալ ալեօք: Ո՛վ ճոխդ
 ամենայն խորտիօք բարութեանց՝ որ
 զվերինն տաս յագուրդ՝ ամենահա-
 բուստ առատաձեռնողդ. Աստուած,
 տուր յոգնելոյս կերակուր, ժողովեա
 զիս զցրուեալս, ազատեա զգերիս, և
 նոր նորոգեա զպատառեալս: Ահաւա

սիկ կայ անձն իմ՝ առ դուրս քո, և բա-
խէ: Աղաչեմ վասն գթոյ ողորմութեան
քո, որով այց արարեր մեզ ծագումնդ
'ի բարձանց. հրաման տուր բանալ
հէգ բախողիս, զի ազատաքայլ մտից
առաջի քո, և հանգեայց 'ի քեզ, և հաս-
տատեսցի սիրտ իմ՝ 'ի քէն յերկնաւոր
հացէդ: Ձի դու ես հաց կենաց, և աղ-
բիւր կենաց. դու լոյս յաւիտենական
պայծառութեան. դու ամենայն ինչ,
որով կեան՝ ողբ սիրեն զքեզ՝ ուղիւք:

ԳԼՈՒԽ Ե .

Տեսչ հոգոյ .

Աստուած, լոյս սրտից զքեզ տեսո-
ղաց, և կեանք հոգւոց զքեզ սիրողաց,
և զօրութիւն խորհրդոց զքեզ խնդրո-
ղաց, տուր ինձ յարիչ 'ի սէր քո սուրբ:
Եկ, աղաչեմ, 'ի սիրտ իմ, և արբեցո
զնա՝ 'ի սրարարութենէ փափկութեան
քո, զի մոռացայց զժամանակաւորքս:

Ամուսնեմ և հարթչիմ կրել յանձին
 զայնպիսիս, որպիսիս ներգործէ յաշ-
 խարհս այս : Տրամալի է ինձ՝ զոր տե-
 սանեմս . ծանր է ամենայնն, զոր լսեմ
 զանցաւորաց : Օգնական իմ ընր տէր
 Աստուած իմ, և տուր ուրախութիւն
 ՚ի սիրտ իմ . եկ առ իս, զի տեսից ըզ-
 քեզ : Այլ անձուկ է ինձ տուն հոգւոյ
 իմոյ, մինչև եկաւորեսցիս անգր, և ըն-
 դարձակեսցի առ ՚ի քէն : Աւերակ է,
 նորակերտեա զնա . ունել ունի բա-
 զում ինչ իրս, որք դառնացուցիչք են
 աչաց քոց, խոստովանիմ զայդ և գի-
 տեմ . այլ ո՞ սրբեսցէ զնա, կամ ո՞ւմ
 այլում բողոքեցից բաց ՚ի քէն : Ի գաղտ-
 նեաց իմոց սուրբ արա զիս տէր, և յո-
 տարէն պահեա զծառայս քո :

Տուր ինձ քաղցր և բարերար փրկիչ
 Յիսուս Քրիստոս, տուր ինձ աղաչեմ,
 սիրով և տենչմամբ քո ՚ի բաց զնել
 զճանրութիւն մարմնաւոր ցանկութեց,
 և երկրաքարչ յօժարութեանց : Իշ-
 խեսցէ մարմնոյս՝ հոգիս, հոգւոյս՝ բանն
 բանականիս՝ շնորհք քո . և ներքոյ և
 արտաքոյ՝ քոյոց ներքոյ արկջիր զիս

կամաց : Շնորհեա ինձ , զի օրհնեսցէ
զքեզ սիրտ իմ և շնորհ իմ և ամենայն
ոսկերք իմ : Ընդարձակեցո զմիտս իմ ,
և վերացո զտեսութիւն սրտիս , զի յան-
կարծ և սրբնթաց մտօք ժաման լիցի
առ քեզ հոգիս՝ առ յաւիտեանականդ
ճշմարտութիւն որ է գեր ՚ի վերոյ քան
զամենայն : Արձակեա զիս , աղաչեմ ,
՚ի կապանաց , որովք կաշկանդեալ կամ-
զի թողեալ զայս ամենայն՝ քեզ ծա-
ռայեցից , ՚ի քեզ միայն յարեցայց ,
քեզ միայնոյ ուշ կալայց :

ԳԼՈՒԽ Զ .

Երջանիկ փիճակ հոգշոյ արձակկոյ
յերկրաշոր բանտես .

Ո՛վ բարեմասնութեան հոգւոյ, ու
րոյ լուծեալ 'ի կասպանաց երկրաւոր
բանտիս՝ արձակ արձակ յերկինս դի-
մէ . որ զամենաքաղցր տէրդ դէմ՝ յան-
դիման տեսանէ . որ աներկիւղ դադա-
րէ յամենայն 'ի մահուանէ, և ցնծայ
ընդ անեղծութիւն փառացն յաւիտե-
նից : Խաղաղ է և անքոյթ . ոչ ևս է նմա
զանգիտել յերեսաց թշնամւոյ կամ
մահու : Զ քեզ ունի զմարդասէր տէրդ,
զոր յերկար խնդրեաց և միշտ սիրեաց :
Դասակցեալ ընդ սլարս փառաբանչաց՝
միաձայնութեամբ նուագեսցէ յաւի-
տեան 'ի սլատիւ փառաց քոց զմեղե-
դիս անոյշս յաւերժական տօնախում-
բութեան, փառաց թագաւոր Քրիս-
տոս Յիսուս : Ասան զի արբեսցի 'ի

պարարտութենէ տան քո, և յուղևից
 փափկութեան քո տացես ըմպել նմա :
 Ո՛վ երջանիկ միաբանութեան վերնա-
 քաղաքակցաց, և հրաշափառ հանդիսի
 հասարակաց բոլորեցուն, առ քեզ դար-
 ձելոց՝ 'ի տխուր վաստակոց այսր մե-
 լոյ պանդխտութեանս՝ առ զուարճու-
 թիւն վայելչութեան, առ դեղեցկու-
 թիւն համօրէն սայծառութեան, և 'ի
 շքեղութիւն գերասանծ փառաւորու-
 թեան : Անդանօր հանասաղ, տէր, 'ի
 քեզ են աչք քոց քաղաքակցաց : Չիք
 ինչ անդ յունկն հնչեցեալ, որ խոռ-
 վիցէ զմիտս :

Բա՛բէ, որպիսի նուագք, որպիսի
 նուագարանք, որպիսի ձայնք երաժըշ-
 տականաց, որպիսի քաղցր հնչմունք
 երգաբանեալ լինին անդանօր յաւե-
 ժաբար : Անդ հնչեցուցանեն հանա-
 պազ զանուշակ մեղեդեաց երգեհոնս
 քաղցրաբարբառ երգաձայնութիւնք
 հրեշտակաց, երգս երգոց սխրալիս-
 զորս նուագեն 'ի սրատիւ կենաց և փա-
 ռաց քոց վերնաքաղաքացիք : Ոչ ունին
 տեղի յայնմ աշխարհի դառնութիւն և

դժնէութիւն ամենայն լեղւոյ . զի չնք
անդ չար , և ոչ չարութիւն . չնք հա-
կառակորդ և դիմամարտ , և ոչ հրա-
պոյրք ինչ մեղաց : Չիք անդ կարօտու-
թիւն և ոչ մի , ոչ ինչ դժպատեհու-
թիւն , ոչ կագ և ոչ կռիւ , ոչ նախա-
տինք , ոչ պատճառադրութիւն , ոչ
երկիւղ և ոչ անհանգստութիւն , ոչ
պատիժ , ոչ երկբայութիւն , ոչ բըռ-
նութիւն , և ոչ երկպառակութիւն .
այլ անդ է խաղաղութիւն ծայրացեալ ,
սէր լիսպատար , ձայն ցնծութեան և
փառաբանութիւն Աստուծոյ յաւէժա-
կան . հանգիստ աներկևան յանվախ-
ճան յաւիտեանս , և խնդութիւն միշտ
'ի հոգի սուրբ :

Ա՛յլ , ո՞րպէս բարեբախտ գտայց , ե-
թէ եղիցի ինձ լսել զամենազուարճ
նուագերգութիւնս քաղաքակցաց քոյ ,
զքաղցր քաղցր հնչմունս , որովք մեր-
առաքին փառք բարձրելոյդ Նրբորգու-
թեան արժանաւոր պատուով : Այլ
ևս քան զևս բարերջանիկ գտայց , եթէ
և ես ինքնին արժանի եղէց երգել զերգս
տեառնդ իմոյ Յիսուսի Քրիստոսի՝ 'ի
քաղցր երգոյ անտի Սիոնի :

ԳԼ ՈՒԽ Է .

Բերկրասպատար վիճակ երկնից
արքայոշքեան .

Ո՛վ կեանք կենդանական, կենդա-
նութիւն մշանջենաւոր, և մշանջենա-
ւորապէս երանական: Ուր ուրախու-
թիւն անարտում, հանգիստ անաշ-
խատ, սրտիւ անկասկած, մեծութիւն
անկորուստ, առողջութիւն անախտ,
առատութիւն անպակասելի, կեանք
անմահական, յաւերժականութիւն
անեղծական, երանութիւն անտխեղծ .
ուր ամենայն բարիք 'ի սէր կատարեալ .
ուր տեսիլ և տեսութիւն երես առ ե-
րես . ուր գիտութիւն լիակատար յա-
մենայնի և յաղագս ամենայնի . ուր
ծայրագոյն բարութիւնն Աստուծոյ
տեսանի, և լոյս՝ որ լուսաւոր առնէ և
փառաբանի 'ի սրբոց . ուր մեծ վայել-
ջութիւնն Աստուծոյ դէմ յանդիման

նկատի : Եւ սովին անապառ կենաց կերակրով միտք ակնարկողաց յագին . միշտ տեսանեն , և տեսանել ցանկան . առանց նեղութեան ցանկանան , և առանց յափրութեան յագենան :

Ուր անդանօր ճշմարիտ արեգակն արդարութեան սքանչելահարաշ տեսութեամբ գեղոյ իւրոյ կազմութեցուցանէ զամենեսեան . և այնպէս լուսածագէ՛ի համօրէն բնակիչս երկնաւոր հայրենեաց , զի լուսափայլեսցեն և ինքեանք , իբրև լոյս լուսաւորեալ յաստուածեղէն լուսոյ , որ է լուսահարաշ՛ի վերքան զամենայն սայծառութիւն մերումս արեգական և քան զփայլումս աստեղաց առհասարակ : Միացեալք ընդ անմահ աստուածութեան , որով և անմահացեալք և անապականացեալք ըստ խոստման տեսուն և փրկչի . հայր , զորս ետուն ինձ , կամիմ , զի ուր եսն եմ , և նոքա ընդ իս իցեն , զի տեսանիցեն զփառս իմ . և զի ամենեքին մի իցեն , որպէս դու հայր յիս , և ես ՚ի քեզ և նոքա ՚ի մեզ իցեն մի :

ԳԼՈՒԽ Ը .

Դարձեալ վասն արքայոչրեան .

Արքայութիւն երկնից՝ արքայութիւն երանաւէտ, թագաւորութիւն անմահ և անվախճան . զոր ոչ ինչ ժամանակ փոխանակէ՛ի յաւիտեան : Ուր անընդհատ աիւ անդիշեր և անամանակ : Ուր զօրական յաղթող յետ վաստակոց վարձատրի անպատում պարգևօք, ՚ի սլատուականն ընկալեալ ՚ի գլուխ զսլակ յաւերժական :

Իցէ՞ թէ յեանեալս ՚ի ծառայս Քրիստոսի՝ թողութիւն առեալ մեղացս բեռանց, հրաման առնուի յաստուածային մարդասիրութենէ ՚ի բաց գնել զմարմնոյս ծանրութիւն, առ ՚ի անցանել ինձ հանդէլ ՚ի յաւիտենիցն ուրախութիւն քաղաքացեաց իւրոց, դասակից լինել սրբափայլ հանդիսի վերնոց . մերձ կալ փառաց հասուչին ընդ

հողուցն երջանկաց . նկատել զյանդի-
մանակաց զերեսս Աստուծոյ : Այնու-
հետև ոչ երկիւղ մահու յիս մերձե-
նայր . այլ՝ աներկկան ընդ յաւերժա-
կան անեղծութիւն անմահութե՛ք բեր-
կրէի . և ընդ ամենագէտն միացեալ՝
զամենայն կուրութիւն տգիտութեան
'ի բաց փարատէի . զերկրաւորս ամե-
նայն յոչ ինչ գրէի , յայս արտասուաց
հովիտս և նայել անգամ կամ յիշել
այլ ևս ոչ արժան համարէի . ուր կեանք
աղցաւոր , կեանք ապականապու , կեանք
լի ամենայն դառնութեամբ , կեանք իշ-
խեցող չարաց և սպասահարկու սան-
գարամետականաց :

Զոր հիւժք փքացուցանեն , ցաւք
նիհարացուցանեն , ջերմութիւնք ցա-
մաքեցուցանեն , օդք թուլացուցանեն ,
կերակուրք ուռուցանեն , սրահք հիւ-
ծեցուցանեն , ծաղր մեղկացուցանէ ,
արամութիւն հաշեցուցանէ , հոգ նե-
ղէ , անհոգութիւն բթէ . մեծութիւն
հպարտացուցանէ , աղքատութիւն լը-
քուցանէ . երիտասարդութիւն վերա-
ցուցանէ , ծերութիւն կորացուցանէ .

հիւանդութիւն բեկանէ, արտամութիւն
 ճմլէ. բանասարկու դարանսկալ լինի,
 աշխարհ քծնի, մարմին խայտայ, հո-
 գին կուրանայ. մարդն ողջոյն վեր 'ի
 վայր լինի: Եւ այսքանեաց և այսպի-
 սեաց չարեաց մահ գազանացեալ բար-
 կութեամբ 'ի վերայ հասանէ, և սնո-
 տի բերկրութեանց այնպէս վախճան
 ածէ 'ի վերայ, զի ուր գաղարեն 'ի գո-
 լոյ՝ և ոչ իսկ ընդ եղեալս համարին:

Գ Լ Ո Ի Խ Թ .

Աստուածային մխիթարութիւնք
 յետ քախճոռքեանց ոգոյ սգաւորի .

Այլ զոր գովութիւնս, կամ զոր
 գոհութիւնս քեզ հատուցանել բա-
 ւականք իցեմք, Աստուած մեր, որ
 զմեզ և 'ի մէջ այսչափ և այսքան թը-
 շուառութեանց ազցաւոր կենացս ոչ
 դանդաղես 'ի մխիթարելոյ սքանչելի
 այցելութեամբ շնորհի քո: Ահաւասիկ
 զիս զհէգս զբազմապատիկ տխրու-

Թեամբ լարակեալ, ուր 'ի կատարածէ
 զանգիտեմ կենացս . ուր զմեզս իմ ա-
 ծեմ զմտաւ, ուր 'ի գառապտանաց
 քոյ զարհուրիմ, ուր զժամ մահուանս
 խոկամ, ուր 'ի տանջանաց տարտարոսին
 զընդամ, ուր զգործս իմ անգիտանամ,
 որք անվրէպ ճշգուծեամբ և զննուծք
 կշռեսցին 'ի քէն, ուր իսպառ տգիտա-
 նամ թէ յորպիսի վախճան ունիմ կրն
 քել զնոսա . ուր զայս ամենայն և զայլ
 ինչ բազում 'ի սրտի իմում որոճամ
 ես ինձէն, մերձ ես 'ի մխիթարել ըն-
 դաբոյս մարդասիրութեամբ աէր Աս-
 տուած : Եւ 'ի մէջ այսց գանգատա-
 նաց, և աղիողորմ լալեացս, և 'ի խո-
 րոյ սրաէ հառաչանացս, 'ի վեր ամ-
 բառնաս զորտում և զճանրաթախիծ
 միտս վերագոյն քան զբարձրաբերձ
 գագաթս լերանց՝ մինչև 'ի բուրաստանս
 խնկենեաց, և հանգուցանես զիս 'ի տե-
 ղի արօտոյ՝ յանգիման վտակաց ջուրց
 քաղցրութեան . ուր պատրաստ առ-
 նես առաջի իմ սեղան բարեւից ամե-
 նայն պատրաստութեամբ, 'ի սփոփել
 զխոնջ ոգիս, և ուրախ առնել զսիրտ

իմ արամագինն . մինչև զօրացեալ 'ի
փափկութեանց անախի , և 'ի մոռացօնս
արկեալ զբազմութիւն թշուառութեց
իմոց , և ամբարձեալ 'ի վեր քան զեր-
կրիս բարձրութիւն՝ հանդչիմ 'ի քեզ ,
որ եսգ ճշմարիտ խաղաղութիւն :

ԳԼՈՒԽ Ժ .

Քաղցրոշիւն սիրոյն Աստուծոյ .

Սիրեմ զքեզ Աստուած իմ , սիրել
սիրեմ , և ևս քան զևս սիրել կամիմ :
Տուր ինձ տէր Աստուած իմ , գեղեցիկդ
տեսանելով քան զորդիս մարդկան՝
տենչալ առ քեզ , և սիրել զքեզ՝ որ-
չափ և կամիմ , և որչափ սարտիմ : Ան-
չափ ես , և յանչափս ես սիրելի . ա-
ռաւելապէս առ 'ի մէնջ , զորս այսչափ
սիրեցեր , և այսպէս փրկեցեր . որոց
վասն այսքանիս և այսպիսիս արարեր :

Ո՛վ սէր մշտաբօրբօք և անշիջանելի ,
քաղցր և բարերար տէր Յիսուս Քրիստոս .

տոս, Աստուած իմ սէր • բորբոքեա
 զիս ուջոյն՝ հրով քով, սիրով քով,
 քաղցրութեամբ քով, անուշութեամբ
 քով, ցանկութեամբ քով, տարփանօք
 քով, ուրախութեամբ և խրախութի
 քով, մարդասիրութեամբ և խանդա
 կաթութեամբ քով, փափկութեամբ
 և տենչանօք քո, որ է սուրբ և բարի,
 մաքուր և անախտ: Որպէս զի առ
 լցեալ բոլորովին քաղցրութեամբ սի
 րոյ քո, և բովանդակ բոցով աստուա
 ծային սիրոյդ փայլակնացեալ՝ սիրեցից
 զքեզ ամենանուշակ և ամենագեղ տէր
 իմ յամենայն սրտէ իմմէ, յամենայն
 անձնէ իմմէ, յամենայն զօրութենէ
 իմմէ, և յամենայն մտաց իմոց, հան
 դերձ սաստիկ զղութեամբ սրտի, և
 աղբերահոս արտասուօք, հանդերձ
 բազում պատկառանօք և դողութեամբ,
 ունելով զքեզ ՚ի սրտի և ՚ի բերանի,
 և առաջի աչաց իմոց յամենայն ժամ
 և ամենայն ուրեք • մինչ զի և ոչ մի տե
 ղի յիս գտանիցի օտար սիրոյ:

ԳԼՈՒԽ ԺԱ.

Յադագս խորհրդոյ փրկագործոշ-
րեան, և հաղորդութեան.

Գեղեցիկդ և ամենագեղեցիկ փրկ-
կիչ, աղաչեմ զքեզ վասն այնք նու-
րական հեղման պատուական արեանդ
քո՝ որով փրկանաւորեցաք, տուր ինձ
զեղջ սրախ և աղբիւր արտասուաց, ա-
ռաւել ՚ի կալ խնում յաղօթս և ՚ի մա-
տուցանել քեզ աղերս. ՚ի նուագել
խնում սաղմոսերգութիւնս ՚ի փառս
քո. ՚ի յիշել խնում կամ ՚ի բարբա-
ռել զխորհուրդ փրկագործութեան
մերոյ, որ է յայտասպատում դատաս-
տան ողորմութեան քո. ՚ի կալ խնում՝
թէպէտև անարժանութեամբ՝ առաջի
սրբոյ սեղանոյ, փափաքելով մատու-
ցանել քեզ զհրաշափառ և զերկնային
խորհուրդ պատարագի՝ զարժանին ա-
մենայն պատկառանաց և ջերմագին է-
ռանգեան, զոր դու տէր Աստուած իմ

անարատ քահանայդ սահմանեցեր, և
 ետուր հրաման մատուցանել 'ի յիշա-
 տակ սիրոյ քո, մահուանդ ասեմ և չար-
 չարանաց, վասն մերոյ փրկութեան, և
 'իդեղ հանապազորդեան տկարութեան
 մերոյ :

Հաստատեսցի սիրտ իմ յայսչափ
 խորհրդոց միջև՝ քաղցրութեամբ ա-
 ռաջիկայութեան քո, իմասցի զանձն
 իւր մերձ լինել քեզ, և ցնծասցէ յան-
 դիման քո՝ հուրդ մշտալոյս, սէրդ մըշ-
 տաբորբոք, քաղցր և բարերար տէր
 Յիսուս Քրիստոս, լոյս յաւիտենա-
 կան և աննուագելի, հաց կենաց՝ որ
 հաստատես զսիրտ մեր, և ես անծա-
 խելի • հանապազոր ճաշակիս, և հա-
 նապազ ամբողջ կաս մնաս : Փայլա-
 տակեա յանձն իմ, վառեա զիս, լու-
 սաւորեա և սրբեա զամանդ քո, դա-
 տարկացո 'ի չարութենէ, լցո շնորհօք,
 և պահեա լիուլի • որպէս զի 'ի փրկու-
 թիւն անձին իմոյ ճաշակեցից զկերա-
 կուր մարմնոյ քո • և զի ճաշակելով
 զքեզ՝ կեցից քե և վասն քո • Ժամանե-
 ցից առ քեզ, և հանդեայց 'ի քեզ :

ԳԼՈՒԽ ԺԲ .

Հոգեգոշարձ խնդրոշրիւն .

Ո՛վ քաղցրութիւն սիրոյ , և սէր քաղցրութե՛ն , ճաշակեսցէ զքեզ սիրա իմ , և ազնիւ գինեաւ սիրոյ քո լցցի անձն իմ , և բղխեսցեն միտք իմ զբան բարի : Աստուած իմ սէր , մեզը անոյշ , ձիւնափայլ կաթն , կերակուր և խրախուժիւն , սուր ինձ աճե՛լ 'ի քեզ . որ սկէս զի մարթացայց ճաշակե՛լ զքեզ կիրթ և առողջ քմօք : Գու ես կեանք իմ , որով կեամ . յոյս՝ յոր յենում սանձանօք , և ցանկամ ստանալ : Գու կալ ինձ զսիրտ իմ , կառավարեա ըզ կամս իմ , ուղղեա զմիտս իմ , վերուղղեա զսէր իմ , 'ի վեր առ զոգիս , և 'ի վերին ուղիս ձգեա զբերան հոգւոյս սպասելոյ առ քեզ :

Լռեսցեն , աղաչեմ , յոյզք մարմնոյ . լռեսցեն երևոյթք հողոյ և ջրոյ , օգոյ և

Եթերաց : Լուսացեն երազք , և երևու-
 թական յայտնութիւնք . ամենայն լե-
 զու , ամենայն նշանակ , և ամենայն ինչ
 անցողական : Լուսցէ առաջի քո և հո-
 գիս գլխովին , և զանց արացէ զիւրե ,
 ոչ ևս խորհելով զանձն իւր , այլ զքեզ
 միայն Աստուած իմ . զի դու ես իսկա-
 պէս բովանդակ յոյս իմ և ասպաւէն
 իմ : Այսն զի 'ի քեզ է յԱստուածդ և
 'ի տէրդ մեր 'ի Յիսուս Քրիստոս՝ յա-
 մենաբաղցրդ , յամենաբարիդ և յամե-
 նազուծդ , միոյ միոյ 'ի մէնջ և մասն և
 բաժին և մարմին և արիւն : Արդ ուր
 թագաւորէ բաժին իմ , անդ հաւատամ
 և ես թագաւորել : Ուր արիւն իմ տի-
 րէ , անդ և ես վստահանամ տիրել :
 Ուր մարմին իմ փառաւորի , անդ և զիս
 գիտեմ փառաւորելի : Թէպէտ և մե-
 զաւոր իցեմ , սակայն ընդ այս հաղոր-
 գութիւն շնորհի ոչ թերեհաւատեմ :
 Եւ եթէ մեղք իմ արգելուն , գոյացու-
 թիւն իմ սրահանջէ : Եւ եթէ յանցանք
 անձինս զիս 'ի դուրս փակեն , բնու-
 թենակցութիւնն ոչ արտաքսէ :

ԳԼՈՒԽ ԺԳ .

Մարդկոտըրիւն բանին խարխախ
յոշսոյ մկրոյ .

Ձի ոչ եթէ այնպէս թշնամի գտանի
տէր , մինչև չսիրել զմարմին իւր , զան
դամս իւր , և զաղիս իւր : Ապաքէն
մարթ էր ինձ յուսահատիլ առ բազ
մութեան մեղաց և ախտից իմոց , յան
ցաւորութեանց և զանցառութեանց
անբաւից , զոր արարի , և զոր առնեմ
զօրհանապաղ անդադար՝ սրաիւ , բե
րանով , և գործով , և ամենայն մեղօք
և յեղանակօք՝ զոր մարթ է մեղանչել
մարդկեղէնն տկարութեան . եթէ ոչ
բանդ քո՝ Աստուած իմ , մարմին լի
նէր , և բնակէր ՚ի մեզ :

Այլ այժմ ոչ ևս է ինձ մարթ յու
սահատել , վասն զի հնազանդ լեալ նո
րա քեզ մահու չափ և մահու խաչի ,
եբարձ զձեռագիր մեղաց մերոց , և

բևեռեալ զայն ընդ խաչափայտին՝ ՚ի
խաչ եհան զմեզս և զմահ : Արդ նովաւ
յապահովեալ ոգի առնում, որ նստի
ընդ աջմէ քումմէ, և բարեխօս իսկ է
վասն մեր : Ի նա ասրաստանեալ՝ ցան-
կամ ժաման լինել առ քեզ . որով ար-
դէն իսկ յարեաք և կենդանացաք, ար-
դէն իսկ յերկինս համբարձաք, և նըս-
տաք յերկնաւորս : Քեզ գովութիւն,
քեզ փառք, քեզ պատիւ, քեզ գո-
հութիւն :

ՓԼՈՒԽ ԺԴ .

Քաղցր յիշատակ Աստուծոյ .

Մարգասէր տէր, որ այսպէս սիրե-
ցեր զմեզ և փրկեցեր, այսպէս կենդա-
նացուցեր և բարձրացուցեր : Քաղցրա-
գութ տէր, իբրև զի քաղցր է յիշա-
տակ քո : Որչափ առաւել խորհիմ՝ ըզ-
քէն, այնչափ ևս քան զևս քաղցր ես
լինձ և սիրելի : Ասան այսորիկ ուրախ
առնեն զիս յոյժ բարութիւնիք քո՝ լոկ

մտաց հայեցիւք, և անուշակ բաղձա-
նօք բարեգուժ սիրոյդ, 'ի տեղւոջ
պանդխտութեան իմոյ, ըստ իմումս
փանաքի տեսութեան: Առ այժմ՝ ցոր-
չափ ներքոյ դնիմ տկար այս անդա-
մոցս, անդադար փափաքեմ 'ի ցան-
կալ և 'ի խորհրդածել զսիրելութիւնս
քո և զգեղեցկութիւնս. զի նետիւք սի-
րոյ քո խոցեալ եմ. քոյդ տենչանօք
մեծապէս խորովիմ. առ քեզ հասա-
նել փափաքեմ, զքեզ տեսանել ցան-
կամ: Այսն այսորիկ 'ի պահու իմում
կացից, և անքուն աչօք՝ սաղմոս ասա-
ցից հոգւով, սաղմոս ասացից և մտօք.
և յամենայն զօրութենէ իմմէ գովա-
բանեցից զստեղծիչդ իմ և զնորաստեղ-
ծիչ: Թափ անցեալ մտից յերկինս մը-
տօք, և տենչանօք ընդ քեզ եղէց. զի
յառաջիկայս ողորմ վիճակի մարմնով
լեւթ գտայց. այլ մտածութեամբ և
անյադ փափաքմամբ և ամենայն տեն-
չանօք իմովք ընդ քեզ եղէց հանապաղ.
որպէս զի անդ լիցի սիրտ իմ, ուր դու-
ես գանձ իմ ցանկալի, անհամեմատ,
և մեծապէս սիրելի:

Այլ աւասիկ Աստուած իմ բազմա-
 գութ և բազումողորմ, ուր կամիմս
 խորհրդածել զքո անչափ բարութեան
 և բարեգթութեան զփառս, անբաւա-
 կան գտանի սիրտ իմ. վասն զի անցա-
 նէ զամենայն հասողութեամբ մարդ-
 կեղէն մտաց վայելչութիւն քո, գեղեց-
 կութիւն քո, զօրութիւն քո, փառք
 քո, մեծագործութիւն քո, մեծվայել-
 չութիւն քո, և սէր քո: Զոր օրինակ
 անքննին և անհաս է ճառագայթ փա-
 ռաց քոց, սոյնպէս և անճառելի մար-
 դասիրութիւն յաւիտենական սիրոյ
 քո. որով զորս յոչնչէ արարեր, վեր-
 ածես յորգեզրութիւն, և ընդ քեզ
 զօգես:

ԳԼՈՒԽ ԺԵ .

Խղձ կրեկոյ զնկոչոքիւնս փասն
Քրիստոսի .

Քեզ ասեմ անձն իմ, եթէ զօր ա-
մենայն առաջի կայր քեզ զամենայն
չարչարանս յանձին բերել, եթէ դե-
հենոյ գլխովին տանել ընդ ժամանակս
ձիւս, որպէս զի մարթասցուք տեսա-
նել զՔրիստոս ՚ի փառս իւր, և դա-
սակից լինել սրբոց նորա, ոչ ասպքէն
արժան էր կրել զամենայն դժնդակս,
առ ՚ի հաղորդս լինել այնպիսում բա-
րութեան և այնպիսում փառաց : Եւ
արդ թող դարանեսցին դէք, թող լա-
րեսցեն զփորձութիւնս իւրեանց . թող
պահք ճնշեսցեն զմարմինն, հանդերձք
նեղեսցեն, աշխատութիւնք ճգնեսցեն,
տքնութիւնք ցամաքեցուսցեն : Թող
բողոքեսցէ այս ոք զլինէն, անհանգիստ
առնիցէ այս ոք կամ այն, ցուրան կը-

քեսցէ, խիղճ մտաց քրթմնջեսցէ, տօթ
տոչորեսցէ • դլուխ ցաւեսցի, կուրծք
այրեսցին, ստամոքս ճմլեսցի, դէմք դեղ
նեսցին, տկարասցի մարմինն ողջոյն •
պակասեսցին՝ ի ցաւոց ամենայն կեանք
խմ, և ամք իմ յոգւոց ելանելոյ • մտցէ
ցեց յոսկերս իմ, և մէցք ՚ի ներքոյ իմ
տարածեսցին • որպէս զի հանդեսոյց
յաւուր նեղութեան, և ՚ի վեր ելից առ
ժողովուրդ՝ որ շուրջ եղիցի զմեօք :

Վասն զի, բա՛բէ որպիսի ինչ լինի-
ցին փառք սրբոց • քանի մեծ ուրա-
խութիւն սրբոց, յորժամ երեսք իւ-
րաքանչիւր փայլեսցեն որպէս զարե-
գակն • յորժամ զանազանեալ կար-
դօք՝ սկսանիցի տէր ՚ի համար բերել
զժողովուրդ իւր յարքայութեան հօր
իւրոյ • և հատուցէ զխոստացեալ վար-
ձրս ըստ արդեանց և ըստ գործոց իւ-
րաքանչիւր • փոխանակ երկրաւորաց
ղերկնաւորս, փոխան ժամանակեայց
զյաւերժականս, ընդ փոքունց զմե-
ծամեծս : Արդարեւ լրումն երանու-
թեան եղիցի, յորժամ տէրն առեալ
ածիցէ զսուրբս իւր ՚ի տեսութիւն հայ

րական փառաց , և տացէ նստել յերկնաւորս . զի եղիցի Աստուած ամենայն յամենայնի ,

ՔԼՈՒԽ ԺԶ .

Չիւնդ յիևի առանալ զարքայութիւն

Ո՛վ երջանիկ զուարճութիւն , և զըւարճալի երջանկութիւն , տեսանել զսուրբս , ընդ սուրբս լինել , և սուրբ լինել : Չաստուած տեսանել , և ունել զԱստուած յաւիտեան և ևս : Չայսոսիկ զմտաւ ածցուք ուշի ուշով . այսոցիկ փափաքեսցուք ամենայն փափաքանօք , զի առ նոսին մարթասցուք փոյթ հասանել : Եթէ խնդրիցես , զիւնդ մարթ է այդմ լինել , կամ որո՞վ արդեամբք , և որո՞վ օժանդակութեամբք , լուր և 'ի միտ առ : Բանդ այդ եղեալ կայ 'ի ձեռս նորա , որ ճգնի . վասն զի արքայութիւն երկնից բռնաբարի :

Արքայութիւն երկնից , ո՛վ մարդ ,

ոչ զայլ պահանջէ գին, բայց միայն զանձն քո. այնքանոյ է, որքանոյ էս դու. տուր զքեզ, և ստասցիս զայն: Ձի խառովիս ընդ գինդ. Քրիստոս զանձն իւր մատնեաց, զի ստասցի զքեզ իբրև արքայու թիւն հօր իւրում: Այնպէս տուր և դու զանձն քո, որպէս թէ իցես արքայու թիւն նորա. և մի թագաւորեսցեն մեզք 'ի մահկանացու մարմինդ քո, այլ՝ հոգիդ շահեկանու թեամբ կենաց:

ԳԼՈՒԽ ԺԷ.

Վիճակ արքայու շրեան.

Ո՛վ հոգի իմ, դարձցուք անդրէն 'ի քաղաքն Երկնաւոր, յոր գրեցաքն, և քաղաքացիք եղաք սահմանեալ: Ձի իբրև քաղաքակիցք սրբոց, և ընտանիք Աստուծոյ, և իբրև ժառանգք Աստուծոյ՝ և ժառանգակիցք Քրիստոսի, խորհրդածեսցուք զգերասական թարե.

վայելուծիւն քաղաքիս մերոյ, որչափ
 և հնար է ածել զմտաւ: Օն առեալ
 զմարգարէին երկրորդեսցուք. Իբրև
 զի փառաւորեալ բանք ասացան զքէն
 քաղաքդ Աստուծոյ. Իբրև ուրախ եղե-
 լոց առ հասարակ բնակուծիւն է 'ի
 քեզ. վասն զի հիմունք արկեալ են
 քեզ ցնծուծեամբ ամենայն աիեղե-
 րաց: Չիք 'ի քեզ ծերուծիւն, և ոչ
 աղէաք ծերուծեան: Չիք 'ի քեզ խե-
 ղանդամ, ոչ կաղ, ոչ սապատողն, ոչ
 ագեղադէմ. ուր ամենեքին հասանեն
 յայր կատարեալ 'ի չափ հասակի դե-
 ղոյն Քրիստոսի:

Ձինչ այլ երանաւէտ քան զայն
 կեանս, ուր չիք չքաւորուծեան եր-
 կիւղ, ոչ հիւանդուծեան տկարու-
 թիւն. ոչ ոք մեասի, ոչ ոք բարկանայ,
 ոչ ոք նախանձի. ոչ ինչ ցանկուծիւն
 բորբոքի: Չիք ինչ ցանկուծիւն կերա-
 կրոյ. ոչ փառասիրուծիւն բախէ, և
 ոչ իշխանասիրուծիւն: Չիք և ոչ մի
 երկիւղ յերեսաց բանսարկուին. ոչ
 ինչ դաւադրուծիւնք դիւաց. հեռի է
 ահ գեհեոյն: Մահ ոչ մարմնոյ, և ոչ

հողւոյ • այլ կեանք զուարճացեալ
 պարգևօք անմահութեան : Ոչ լիցին
 անդանօր և ոչ մի չարիք, երկպառա-
 կութիւն ոչ երբէք, այլ ամենայնն
 միաբան • վասն զի ամենայն սրբոց լի-
 նիցի մի սիրտ : Խաղաղութիւն և խըն-
 դութիւն ունի զամենայն • ամենայն
 ինչ խաղաղիկ և անդորր : Մշտապայ-
 ծառ լուսաւորութիւն, ոչ որ զար-
 դիս, այլ այնչափ հրաշափայլ, որչափ
 և երջանկաւէտ • վասն զի ըստ գրեցե-
 լումն՝ չեն պէտք քաղաքին այնմիկ ա-
 թեգական կամ լուսնի • այլ տէր ամե-
 նակալ լուսաւորեացէ զնա, և ճրագ նո-
 թա է գառնն : Ուրանօր սուրբք փայ-
 լեցեն որպէս զաստեղս ՚ի մշտնջնա-
 ւոր յաւիտենականութիւնս, և որպէս
 զճագումն հաստատութեան, որք ու-
 սուցանեն զբազումս : Վասն որոյ չիք
 անդ գիշեր և ոչ մի, ոչ ինչ խաւար,
 ոչ գումարումն ամաղոց, ոչ փայլատա-
 կանց և շանթից ահագնութիւնք, այլ
 այնպիսի եղիցի բարեխառնութիւն և
 մենայնի, զոր ակն ոչ ետես, և ունկն
 ոչ լուաւ, և ՚ի սիրտ մարդոյ ոչ ան-

կաւ, բայց որոց արժանի գտանին վա
 յելել 'ի նոսին. որոց անուանք գրեալ
 կան 'ի գիրն կենաց: Այլ 'ի վեր է քան
 զայս ամենայն՝ դասակից լինել պա
 րուց հրեշտակաց և հրեշտակապետաց,
 և ամենայն երկնային զօրաց. ակնկա
 ուոյց լինել 'ի նահապետս և 'ի մարգա
 րէս. տեսանել զառաքեալս և զսուրբս
 ամենայն. տեսանել և զճնօղս մեր գրչ
 խովին: Փառաւոր են այսոքիկ. այլ
 հրաշափառագոյն է դէմ յանդիման զե
 րեսս Աստուծոյ նկատել, և զանսպա
 րագրելին զայս տեսանել: Գերահրաշ
 փառք եղիցին, յորժամ զԱստուած
 տեսանիցեմք յինքեան. զոր լիցի մեզ
 տեսանել և ունել 'ի մեզ. և տեսու
 թեան նորուն ոչ եղիցի վախճան:

ԳԼՈՒԽ ԺԸ .

Թիւ շունիսմք ինչ փոխարինել Աստուծոյ բաց ՚ի սիրոյ .

Հոգին ճոխացեալ սրտկերաւ Աստուծոյ , և զարգարեալ նմանութեամբ նորին , ունի յինքեան առ յԱստուծոյ այնպիսի ինչ , որով խրատի միշտ կամ ընդ Աստուծոյ կալ , կամ դառնալ առ Աստուած՝ եթէ ՚ի բաց խոտորեալ իցէ իւրովք կրիւք , մեծաւանդ թէ կարեօք սրտկասաւորութեան : Եւ ոչ միայն ունի , որով մարթի ոգի առնուլ ՚ի յոյս թողութեան և գթութեան , այլ և որով համարձակեսցի իղձ լինել ՚ի հարսանիս բանին . և դաշինա կուէլ միաբանութեան ընդ Աստուծոյ , և ընդ թագաւորին հրեշտակաց ամուլակից լինել ՚ի քաղցր լուծ սիրոյն :

Զայս ամենայն առնէ սէր , եթէ հոգին ՚ի ձեռն կամաց ընծայեցուցէ

զինքն նման Աստուծոյ, որում նման է
 'ի ձեռն բնութէ, սիրելով զԱստուած՝
 որպէս և սիրեցաւն 'ի նմանէ: Ասան
 զի մի միայն սէրն է 'ի մէջ ամենայն
 շարժութեանց հոգւոյ և ըմբռնմանց և
 յօժարութեանց, որով կարող գտանի
 արարածն՝ թէպէտև ոչ զուգահաւա-
 սարութեամբ՝ փոխարինել արարչին,
 կամ հատուցանել ինչ արխաուր նմին:
 Ուր 'ի մէջ գայ սէր, զայլն ամենայն
 'ի յօժարութեանց յինքն ժողովէ և
 գերէ ընդ իւրեաւ: Սէր ինքն ինքեամբ
 է բաւական, ինքեամբ հաճոյանայ, և
 վասն ինքեան: Նա ինքն է արդիւնք,
 նոյն ինքն վարձ. նոյն ինքն պատճառ,
 նոյն ինքն գործ կամ պտուղ, և նոյն
 ինքն վայելումն: Ասան զի սիրով միա-
 նամբ ընդ Աստուծոյ:

Սէրն առնէ յերկուց ոգի մի. սէրն
 տայ զնոյն կամիլ և զնոյն չկամիլ. սէրն
 տայ նախ զվարս յարգարել. երկրորդ՝
 զամենայն որ կանս՝ իբրև զոչ գոյս նը-
 կատել. և երրորդ՝ սուրբ բբօք սրտի 'ի
 վերնահանս և 'ի ներքսագոյնս յառիլ:
 Սիրով լինի յաշխարհի նախ բարիօք

առնել զվայելահանս • ապա և զաշխարհի վայելահանսն արհամարհել • և հուսկ յետոյ նկատող լինել խորոցն Աստուծոյ :

ԳԼՈՒԽ ԺԹ .

Աստուած պահանջէ 'ի մեզ զիշր և ըմանոշքիւն ըստ սիրոյ .

Աստուած հայր սէր է • որդին Աստուծոյ սէր է 'ի սիրոյ • հոգին սուրբ սէր է հօր և որդւոյ : Այս սէր և սիրելու թիւն պահանջէ 'ի մեզ զնմանութիւն ինչ, այսինքն զաստուածսիրութիւն • որով իբրու մերձաւորութեամբ ազգակցութեան զօգեսցուք և միասցուք ընդ նմա : Սէրն անգէտ գտանի մեծութեան, և ըստ նմին անպատկառ երևի : Որ սիրէն՝ ինքնին համարձակութեամբ մատչի առ Աստուած, և ընտանեբար խօսի ընդ նմա՝ աներկիւղ և անկասկած : Որ ոչն սիրէ, կորուսա-

նէ զկեալ իւր : Իսկ աստուածասէրն
հանապազ վերահնէ առ Աստուած ,
զոր սիրէ , որում փափաքէ , զորմէ խոր
հի , յորում զուարճանայ , որով կե-
րակրի , և նովին իսկ պարարի :

Այսպիսի եռանդոտն աստուածա-
սէր՝ այնպէս երգէ , այնպէս ընթեռ-
նու , և յամենայն ՚ի գործս իւր այն-
պէս է նախատես և լուրջ զգաստու-
թեամբ , որպէս այն թէ Աստուած է
առ նմա՝ առաջի աչաց նորա . որպէս և
էն ճշմարտապէս : Այնպէս կայ յա-
ղթս , որպէս թէ իցէ վերառեալ և
յանդիման եղեալ երեսաց մեծվայել-
չութեան վերանստելոյ յաթող բար-
ձրութեան , ուր հազարք հազարաց
պաշտեն զնա , և բիւրք բիւրուց կան
առաջի նորա : Նա ինքն զհոգին՝ որում
այց առնէ սիրով զարթուցանէ ՚ի թրմբ-
րութենէ քնոյ . ազգէ և կակղէ զնա ,
և խոցէ զսիրտ նորա : Զխաւարինս
լուսաւոր առնէ , զփակեալն բանայ ,
զպաղեալն հրազինէ . մեղմէ և հեզա-
ցուցանէ զսիրտ դժնեայ և զայրագին և
անհամբեր . հալածական առնէ զախ-

տըս . նկուն առնէ զմարմնաւոր յօժա-
 րութիւնս . մաքրազարդէ զվարս , նո-
 րոգէ և զարդարէ զոգին . խափանէ և
 սանձէ զգիւրաստհ հասակին զթեթև
 շարժութիւնս և զներգործութիւնս :
 Զայս ամենայն առնէ սէր , յորժամ
 մերձ իցէ . իսկ յորժամ հեռացի , այն-
 պէս սկսանի հոգին թուլանալ և ըն-
 դարմանալ , որպէս եթէ բարձցես ըզ-
 կրակ 'ի ներքոյ եռացեալ կառսայի :

ԳԼՈՒԽ Ի .

Վիճակ հոգոյ աստուածասիրի .

Մեծ իմն է սէր , որով հոգին ան-
 ձամբ անձին համարձակ մերձենայ առ
 Աստուած , պնդապէս յարի յԱս-
 տուած , ընտանեբար հարցանէ զԱս-
 տուած , և խորհուրդ առնու 'ի նմանէ
 վասն ամենայն բանի : Հոգի աստուա-
 ծասէր ոչ ինչ այլ կարէ խորհել կամ
 խօսել . քամահէ զայլ իրօք , տաղտկա-

նայ յամենայնէ : Չոր ինչ խորհի , որ
 զինչ և խօսի , համ տայ զսիրոյ , բուրէ
 զսէր . այսչափ գրաւեալ է զնա իսպառ
 սէր Աստուծոյ : Որ ոք կամի աստուա
 ծածանօթ լինել՝ աստուածասէր լիցի :
 Որ ոչն սիրէ , 'ի զուր բերի յընթեա
 նուլ , 'ի մտածել , 'ի քարոզել , և յա
 ղօթել : Աստուածսիրութիւնն ծնանի
 զհոգեսիրութիւն , և տայ հոգւոյն միա
 դնել ինքեան : Սիրէ Աստուած , զի սի
 րեսցի . 'ի սիրել անգ իւրում՝ ոչ այլ
 ինչ խնդրէ , բայց սիրել , գիտելով՝ թէ
 սիրով երանելի լինին սիրելիք նորա :

Հոգի աստուածասէր հրաժեշտ տայ
 յամենայն յօժարութեանց իւրոց , և մի
 այն անձնատուր լինի 'ի սէր . որպէս
 զի մարթասցի փոխարէնս առնել սի
 րոյ՝ սիրահատոյց լինելով : Եւ յորժամ
 աներկևան տացէ զանձն բոլորովին 'ի
 սէր , քանի՛օն են մշտնջենաբուղիս հո
 սանք աղբերն սիրոյ : Ոչ հաւասարա
 զօր զուզնթաց լինին յայսմ վայրի
 սէրն և սիրողն , Աստուած և հոգի աս
 տուածասէր , արարիչն և արարածն :
 Բայց թէ ոք բոլորովին է անձնասէր ,

ուչ ինչ է գլխովին • զի բոլորն սպակա-
սէ : Մի երկիցէ հոգի՝ որ սիրէ • զար-
հուրեացի՝ որ ոչն սիրէ :

Հոգի աստուածասէր բերի տենչա-
նօք, ձգի փափաքանօք • անտես առնէ
զարդիւնս • կափուցանէ զաչս առ մե-
ծութիւնն Աստուծոյ, և բանայ առ
գրգանս նորա, եղեալ զանձն՝ ի գիրկս
կենսաստուիս, և համարձակագոյնս վա-
րելով ընդ նմա : Սիրով հոգին մերկա-
նայ և մեկնի ՚ի մարմնեղէն զգայու-
թեանց • զի ոչ զգայ անձին, որ յան-
ձին զգայ զԱստուած : Եւ այս լինի,
յորժամ միտքն զմայլեալ յանձառ-
քաղցրութենէն Աստուծոյ՝ իւիք օրի-
նակաւ կապտէ զինքն յինքենէ, մանա-
ւանդ թէ յափշտակի և ՚ի դուրս կոր-
զի յիւրմէ, որպէս զի յԱստուած վայ-
ելեացէ զիսպառ զմայլումն : Չիք ինչ
այնպէս զմայլելի, եթէ չէր և այնչափ
հակիրճ :

Սէրն տայ զառ Աստուած ընտանու-
թիւն • ընտանութիւնն զհամարձակու-
թիւն • համարձակութիւնն զհամեղ
ճաշակ • համեղաճաշակն զքաղց : Հո-

զին՝ որ հարեալ է 'ի սէր Աստուծոյ ,
 չկարէ այլ ինչ զմտաւ ածել , այլում
 իմիք բաղձալ , այլ անդադար յողոց
 ելանէ՝ ասելով : Որպէս փափաքէ եղ
 ջերու յաղբերս ջուրց , այնպէս փա
 փաքէ անձն իմ առ քեզ Աստուած իմ :

ԳԼՈՒԽ ԻԱ .

Մարդասիրոշքիւնն Աստուծոյ .

Աստուած սիրով եկն առ մարդիկ ,
 եկն 'ի մարդիկ , մարդացաւ գլխովին :
 Սիրով անտեսանելին Աստուած եղև
 'ի նմանութիւն ծառայից իւրոց : Սի
 րով վերաւորեցաւ վասն մերոց յան
 ցանաց : Անքոյթ և ամուր հանգստա
 րան է տկարաց և մեղաւորաց՝ 'ի վերս
 փրկչին : Անկասկած բնականամ ան
 դանօր , բացերև տեսանի սիրտ նորա
 ընդ վերս նորա : Որ ինչ ինձէն ինձ
 սրակասէ , առնում ինձ 'ի սրտէ անախ
 տեառն իմոյ : Քանզի յորդահոսան խա

ղան գուժք մարդասիրին, և ոչ սրակասեն ծակտիք՝ ընդ որ խաղայցեն. ընդ ծակս մարմնոյն՝ բացեալ գտանին ինձ գաղտնիք սրտին : Բացեալ կայ մեծ խորհուրդ գթասիրութեան, բացեալ կան գուժք ողորմութեանց Աստուծոյ մերոյ, որովք այց արար մեզ ծագումն ՚ի բարձանց :

Վէրք Քրիստոսի Յիսուսի լի են գրթութեամբ, լի մարդասիրութեամբ, լի քաղցրութեամբ և սիրով : Ծակեցին զձեռս և զոտս նորա, և գեղարգեամբ խոցեցին զկողս նորա : Ընդ այս սրատառուածս ճահ է ինձ ճաշակել, թէ քանի քաղցր է տէր Աստուած իմ. վասն զի ճշմարտապէս քաղցր է և հեզ և բազումողորմ առ ամենեւեան, որք կարգան առ նա ճշմարտութեամբ, առ ամենեւեան՝ ոյք խնդրեն զնա, և առաւելապէս սիրեն զնա : Բազմառատ փրկկութիւն տուաւ մեզ վերօք Քրիստոսի փրկչին մերոյ, յորդառատ բազմութիւն քաղցրութեան, լիութիւն շնորհաց, և կատարումն առաքինութեանց :

ԳԼՈՒԽ ԻԲ .

Յիշատակ վիրաց փրկչին .

Ընդ բախիլ անձին իմոյ յանարժան
 խորհրդոց ուստեք՝ դիմեմ 'ի վերս Քը-
 բիստոսի : Ընդ նուաճել մարմնոյս ըզ-
 հողիս՝ յիշատակաւ վիրաց տեառն ի-
 մոյ 'ի վեր յառնեմ : Ընդ դարանակալ
 լինել ինձ բանսարկուին , անկանիմ 'ի
 ծերպս կողին 'ի բնակարան գթոյ տեառն
 իմոյ , և 'ի բաց հեռանայ թշնամին յի-
 նէն : Եթէ եռացումն ցանկութեան
 խլրտէ զանգամս իմ , յիշատակաւ խո-
 ցուածոց տեառն իմոյ որդւոյն Աստու-
 ծոյ շիջանի : Յամենայն ընդդիմամար-
 տութիւնս ոչ գտի դեզ այնպէս ազ-
 դու՝ որպէս զվերս Քրիստոսի : Ի սոյնս
 ննջեմ աներկեան , և հանգչիմ անսա-
 սան :

Քրիստոս մեռաւ վասն մեր : Չեք
 ինչ 'ի մահու այնպէս դառն , որ ոչ

բուժեցցի մահուամբն Քրիստոսի : Ա
մենայն յոյս ակնկալութեան իմոյ է 'ի
մահու անդ տեառն իմոյ : Մահ նորա
արդիւնք իմ և ապաւէն իմ, փրկու
թիւն, և կեանք, և յարութիւն իմ :
Արդիւնք իմ՝ ողորմութիւն տեառն :
Չեմ չքաւոր յարդեանց, ցորչափ ոչ
պակասէ այն տէր ողորմութեանց : Եւ
եթէ գթութիւնք տեառն բազում են,
բազմարդիւն ես գտանիմ : Որչափ ա
ռաւել կարող է նա 'ի փրկել, այնչափ
առաւել յապահովի եմ ես :

ԳԼՈՒԽ ԻԳ .

Զօրութիւնք սքանչելի փիրաց
փրկչիւն .

Մեղաց մեղս մեծամեծս , և զբազմութիւն յանցուածոց իմոց ևս ինձէն գիտեմ : Սակայն և ոչ այնպէս յուսահատ լինիմ . զի ուր առաւել եղեն յանցանք , առաւել ևս յաճախեցին շնորհք : Որ միանգամ յուսահատի վասն թողութեան մեղաց իւրոց , ուրանայ զԱստուած և զգթութիւն նորա և զողորմութիւն . մեծապէս անիրաւի առ Աստուած , որ ոք թերահաւատէ ընդ գթութիւն նորա : Իւրովսանն ուրաստ լինի , թէ Աստուած ունիցի զսէր և զճմարտութիւն և զկարողութիւն . յորս հաստատեալ է ամենայն յոյս իմ . այսինքն՝ ի սէր որդեգրութեան , ի ճմարտութեան խոստմանց , և ի կարողութե փրկութեան : Թող քրթմըն

Ջեւսցէ՛ որչափ և կամի՛ տխմար խոր-
հուրդ իմ, ասելով. Ո՞ր էս դու, և ո՞ր
այն փառք մեծամեծք. և որովք ակն ու-
նիս արդեամբք ստանալ զայն: Եւ էս
համարձակ վստահութեամբ տաց սլա-
տասխանի. գիտեմ յո՛ հաւատացեալն
եմ. զի անսպասուամ սիրով ընկալաւ
զիս յորդեգրութիւն. զի անսուտ է՛ի
խոսամունս, կարող ՚ի կատարումն, և
իշխան է առնել՝ զոր կամի:

Անհնար է ինձ ասաբեկ լինել յերե-
սաց բազմութեան մեղացս, եթէ մահ
տեառն իմոյ եկեսցէ ՚ի միտս իմ. զի
մեղք իմ ոչ կարեն յաղթել նմա:
Բնեռքն և դեղարդն գոչեն առ իս, թէ
ստուգապէս հաշտ ես ընդ Քրիստոսի.
միայն թէ էս սիրեցից զնա: Առնկիա-
նոս եբաց ինձ զկողս Քրիստոսի դե-
ղարդեամբ, և էս մաի ՚ի ներքս, և անդ
հանդչիմ աներկեան: Ար երկնչի, սի-
րեսցէ. վասն զի սէր ՚ի բաց մերժէ
զերկիւզ: Չիք դեղ այնպէս զօրաւոր և
ազգու ընդդէմ բորբոքման ցանկու-
թեան՝ իբրև զմահ փրկչին իմոյ: Բազ-
կատարած և ձեռնիբաց կայ ՚ի խաչին՝

պատրաստ 'ի գրկել զմեղաւորս : Ի մէջ
 բազկաց փրկչիս և կեալ և մեռանիլ
 կամիմ և փափաքեմ : Անդ անկասկած
 նուագեցից . Բարձր առնեմ զքեզ տէր ,
 զի ընկալար զիս . և ոչ ուրախ արարեր
 զԹշնամիս իմ 'ի վերայ իմ : Փրկիչն մեր
 խոնարհեցոյց զգլուխն 'ի մահուն , զի
 տացէ համբոյր սիրելեաց իւրոց : Այն
 չափ համբոյր սիրոյ տամք Աստուծոյ ,
 քանիցս և 'ի զեղջ հարկանիմք սիրով
 նորա :

Գ Լ Ո Ւ Խ Ի Դ .

Խորհրդածոչիւն սիրոյն Քրիստոսի

Ո՛վ հոգի իմ տպաւորեալ գրոշմեալ
 և կնքեալ սրտկերան Աստուծոյ ,
 փրկանաւորեալ արեամբն Քրիստոսի ,
 հարսնացեալ հաւատով , օժտաւորեալ
 հոգեով , զարդարեալ առաքինութեք ,
 և դասաւորեալ ընդ հրեշտակս , սիրեա
 զնա՝ յորմէ այսչափ սիրեցար : Միտ

զիր նմա, որ միտ եղ քեզ: Խնդրեա զխնդրելին քո. սիրեա զսիրողդ քո, յորմէ սիրիս. որ կանխեաց 'ի սիրել զքեզ, և է պատճառ սիրոյ քո: Նա ինքն է արդիւնք, նա ինքն վարձք, նա ինքն պտուղ, նա ինքն վայելք պտղոյ, և նոյն ինքն վախճան: Լէր փոյթ ընդ փութոյն, պարապեալ ընդ պարապելոյն, անբիծ ընդ անբժի, սուրբ ընդ սրբոյն: Որպիսի երևեսցիս Աստուծոյ, հարկ է զի այնպէս երևեսցի քեզ Աստուած, այն՝ որ քաղցր է և հեզ և բազումողորմ, խնդրէ զքաղցունա, զհեզս, զխոնարհս, և զողորմածս: Սիրեա զնա, որ եհան զքեզ 'ի դբոյ տառապանաց, 'ի կաւոյ և 'ի տղմոյ:

Ընտրեա զնա քեզ 'ի բարեկամ առաւել քան զամենայն բարեկամս, որ 'ի բառնիլ ամենայնի մնայ միայն հաւատարիմ առ քեզ: Յաւուր անդ թաղման քո, ուր ամենայն բարեկամք մեկնին 'ի քէն, նա ոչ թողուցու զքեզ. այլ պահեսցէ զքեզ յերեսաց այնոցիկ՝ որք մոռնէն յափշտակել զքեզ 'ի կերակուր, և առաջնորդեսցէ քեզ ընդ

աշխարհ անծանօթ , և տարեալ հասուսցէ 'ի հրապարակս վերնոյն Սիօնի , և անդ զեռեղեցուսցէ զքեզ ընդ հրեշտակս յանդիման երեսաց մեծ վայելուծէ իւրոյ . ուր լուիցես զհրեշտակականն զմեղեղի . Սուրբ սուրբ սուրբ , և որ 'ի կարգին : Անդ է երգ ցնծութեան , ձայն ուրախութեան և փրկութեան և գոհութեան , և ձայն օրհնութեան և գովութեան , և ալլուք յաւերժական : Անդ է լրումն երջանկութեան , գերապանծութիւն փառաց , զեղումն ուրախութեան , և բարութիւնք ամենայն :

Ո՛վ հոգի իմ , հառաչեա եռանդազին , փափաքեա ուժգին , զի մարթասցիս հասանել 'ի քաղաք անդր վերին , զորմէ այնչափ փառաւորեալ ասացան բանք . յորում բնակութիւն է որպէս ցնծացելոց առ հասարակ : Սիրով կարող ես ելանել անդր :

Սիրողին ոչ ինչ է դժուարին , ոչ ինչ անհնարին : Հոգի աստուածասէր ստէս ստէս 'ի վեր ելանէ և յածի ընտանեբար ընդ հրապարակս երկնա

ւորն Երուսաղէմի , այց առնելով նա-
 հապետաց և մարգարէից , ողջունելով
 զառաքեալս , յակճիւս կալով ընդ դասս
 վկայից և խոստովանողաց , և դէտ ակն
 ունելով 'ի պարս կուսանաց : Երկինք
 և երկիր , և ամենայն՝ որ 'ի նոսա , մի
 դադարեսցեն ասել ցիս . սիրեա զտէր
 Աստուած քո :

ԳԼՈՒԽ ԻԵ .

Բաղձանք սրտից մերոց առ ծայ-
 րագոյն բարին , և զօրոշրիւն կաււաց .

Սիրս մարդոյ ցորչաւի չէ հաստա-
 տեալ 'ի ցանկութեան յաւիտենակա-
 նութեան , ոչ երբէք կարէ հաստա-
 տուն կալ . այլ քան զամենայն յեղա-
 վոյժոյս դիւրաւոյժոյս՝ 'ի միոյ 'ի միւսն
 անցանէ , խնդրելով զհանդիսս՝ ուր
 ոչն է : Իսկ 'ի դիւրակործան և յանցա-
 ւոր իրս յայսոսիկ՝ յորս դերեալ կան
 յօժարութիւնք նորս , ոչ ունի դաս .

նել զճշմարիտն հանգիստ . վասն զի
 այնչափ է գերապատիւ , զի ոչ ինչ այլ
 բարի կարող է բաւական լինել նմա ,
 բայց միայն ծայրագոյն բարին : Այն-
 չափ ազատութեամբ է ճոխացեալ , զի
 անհնար է բռնադատել զնա առ վատ-
 թարութիւն ինչ : Սորին աղագաւ իւ-
 րաքանչիւր ումք իւրոյին կամքն է
 պատճառ իւրումն դատապարտութե-
 կամ փրկութեան . և վասն այսորիկ
 ոչ ինչ այնպէս ճոխ ընծայ հնար է մա-
 տուցանել Աստուծոյ՝ որպէս զկամս
 բարիս : Կամք բարի զԱստուած՝ ՚ի մեզ
 բերէ , և տանի զմեզ առ Աստուած :
 Բարի կամօք սիրեմք զԱստուած , ըն-
 րեմք զԱստուած , դիմեմք առ Աս-
 տուած , հասանեմք առ Աստուած , և
 ժառանգեմք զԱստուած :

Ա՛յլ կամք բարի , որով կերպարա-
 նիմք անդրէն ՚ի նմանութիւն Աստու-
 ծոյ , և նման նմա եղանիմք : Այնպէս
 սիրելի է Աստուծոյ կամք բարի , մինչ
 զի ոչ կամի նա բնակել ՚ի սրտի անդ՝
 յորում չկայցէ կամք բարի : Կամք բա-
 րի զնա ինքն զմեծվայելութիւն սուրբ

Երրորդութիւն յինքն խոնարհէ : Ասան
 զի իմաստութիւնն լուսաւորէ զնա 'ի
 ճանաչումն ճշմարտութեան : Սէր հրա
 զինէ զնա 'ի փափաքումն բարութեան :
 Հայրութիւնն պահէ և պահպանէ 'ի
 նմա՝ զոր ինչ ստեղծն , զի մի կորիցէ :

ԳԼՈՒԽ ԻԶ .

Ճանաչումն ճշմարտութեան .

Զինչ ճանաչումն իցէ ճշմարտու
 թեան : Նախ՝ ճանաչել զանձն քո . և
 զի՝ որ ինչ պարտիս լինել , լինել ջա
 նասցիս . և զոր արժան է ուղղել , ուղ
 ղեսցես : Դարձեալ՝ ճանաչել և սիրել
 զարարիչն քո . զի այս է ամենայն բա
 րին մարդոյ : Արդ տես թէ՛ ո՞րպէս ան
 պատմելի է իսկութիւն սիրոյն Աստու
 ծոյ , որով սիրեացն զմեզ : Արար զմեզ
 յոչնչէ , և զոր ունիմքս՝ նա պարգևեաց :
 Այլ քանզի առաւել սիրեցաք զտուր
 սըն՝ քան զտուիչն , զարարածն քան

զարարիչն, անկաք յորոգայթ սատա-
նայի, և ծառայք եղաք նորա: Այլ Աս-
տուած գթասիրեալ առաքեաց զորդի
իւր 'ի փրկել զծառայքս, առաքեաց
և զսուրբ զհոգին գրել զծառայս յոր-
դեգիրս: Զորդին ետ 'ի գին փրկանաց.
զհոգին սուրբ 'ի գրաւական սիրոյ. և
զինքն գլխովին սրահէ 'ի ժառանգու-
թիւն որդեգրութեան:

Ահա այսպէս Աստուած մարդասէր
և բարեգութ առ փափաքանաց կամ
առ սիրոյ մարդոյն՝ ոչ միայն զիւրան,
այլ և զինքն գլխովին ծախեաց, զի
վերստին ստասցի զմարդն, ոչ այնչափ
ինքեան՝ քան որչափ նմին իսկ մար-
դոյ: Առ 'ի կարող լինելոյ մարդկան
ծնանիլ յԱստուծոյ, նախ ինքն Աս-
տուած ծնաւ 'ի մարդոյ: Ո՞ է այնչափ
խստասիրտ, զոր ոչ կակղեցէ սէր Աս-
տուծոյ այսպէս կանխեալ առ մարդս.
սէր ասեմ՝ այնչափ սաստիկ, զի ար-
ժան համարեցաւ մարդ լինել յաղագս
մարդոյն: Ո՞ կարէ այսուհետև ատել
զմարդ, զորոյ զքնութիւն և զնմանու-
թիւն տեսանէ 'ի մարդկութեանն Աս-

տուծոյ : Ապաքէն որ զնա ատեայ ,
 զԱստուած ատեայ . և այնպէս կորու-
 սանէ՝ զոր միանգամ գործէ :

Քանզի և Աստուած վասն մարդոյ
 մարդացաւ , զի արարիչն լինիցի և ա-
 զափիչ , և զի 'ի ձեռն իւր ազատեսցի
 մարդն : Եւ որպէս զի ընտանեգոյնս
 սիրեսցի Աստուած 'ի մարդոյ , 'ի նմա-
 նութիւնն մարդոյ յայանեցաւ . միան-
 գամայն զի և կրկին տեսարան մարդոյս
 նովաւ երանասցի և զմայլեսցի . ակն
 սրտի տեսութեամբ աստուածութեան
 նորա , և ակն մարմնոյ տեսութեամբ
 մարմնոյ նորա . զի թէ 'ի մտանել , և
 եթէ յեւանել՝ նովաւ ճարակ գտցէ
 բնութիւնս մարդկային , որ նովաւ հաս-
 տատեցաւ :

ԳԼՈՒԽ ԻԷ .

Ներգործութիւնք Հոգւոյն սրբոյ .

Վասն զի փրկիչ մեր ծնաւ մեզ, խաչեցաւ և մեռաւ վասն մեր . զի մահուամբ իւրով աւերեացէ զմահ մեր : Եւ քանզի ողկոյղ մարմնոյն արկեալ էր 'ի հնձան խաչին, ուր և ճմլեալ սկսեալ էր հոօիլ քաղցու աստուածու[թեանն, հողին սուրբ առաքեցաւ պատրասաել զամանս սրտից, և դնել զգլինի նոր 'ի աիկս նորս : Նախ՝ զի սիրտք սրբեացին . զի մի արկեալն պղծեացի . և դարձեալ՝ զի և կապեացին , զի մի արկեալն կորուսանիցի : Սրբեացին ասեմ՝ յուրախութենէ անօրէնութեան, և կապեացին ընդդէմ ուրախութեան ունայնութեան : Վասն զի անմարթ էր գալ բարւոյն՝ մինչ չև մեկնեալ էր չարին : Ուրախութիւն անօրէնութեան պղծէ, և ուրախութիւն

ունայնութեան 'ի դուրս զեղու . ուրա-
 խութիւն անօրէնութեան աղտեղէ զա-
 մանն , և ուրախութիւն ունայնութե-
 ծակոտէ զնոյն : Ուրախութիւն անօ-
 րէնութեան է մեղսասիրութիւն . և ու-
 րախութիւն ունայնութեան՝ սէր ան-
 ցաւորաց : Հապա արտաքսեա զչարն ,
 զի մարթասցիս 'ի ներքս ընդունել ըզ-
 բարին : Թափեա զգառնութիւն , զի
 մարթասցիս ընուլ անուշութեամբ :
 Հոգին սուրբ խնդութիւն է և սէր : Ի
 բաց հան զհոգի դիւական և զհոգի աշ-
 խարհիս այսորիկ , որպէս զի առնու-
 ցուս զհոգին Աստուծոյ : Ոգին դիւա-
 կան գործէ զխնդութիւն անօրէնու-
 թեան , և հոգի աշխարհիս զխնդութիւն
 ունայնութեան : Ահա այս խնդութիւնք
 են չարք . վասն զի մին յինքեան բերէ
 զյանցանս , և միւսն զառիթ յանցա-
 նաց : Արդ գալով գայցէ հոգին սուրբ ,
 յորժամ 'ի բաց հանցին ոգիք չարու-
 թեան . և մտցէ 'ի տաղաւար սրտի , և
 ներգործեսցէ զխնդութիւն բարի և ըզ-
 սէր բարի . որով վանեալ լինի սէր աշ-
 խարհի և սէր մեղաց : Սէր աշխարհի

հրապուրէ և խաբէ . սէր մեղաց պըղծէ և 'ի մահ տանի : Սէր Աստուծոյ լուսաւորէ զմիտս , սրբէ զխիղճ մտաց , ուրախ առնէ զհոգի , և ցուցանէ զԱստուած :

ԳԼՈՒԽ ԻԸ .

Աստուածսիրտքիւն .

Աստուածասէրն միշտ զայն խորհի ,
 Էրբ իցէ՝ զի առ Աստուած հասանիցէ .
 Էրբ իցէ՝ զի զաշխարհ թողուցու . Էրբ
 իցէ՝ զի զերծանիցի յապականութե-
 նէ մարմնոյ , որպէս զի մտցէ 'ի Ճշմա-
 րիտն խաղաղութիւն . հանապազ սիրտ
 նորա և փափաքումն 'ի վերինս անդր-
 է : Թէպէտ և նստիցի , թէպէտ և գնայ-
 ցէ , թէպէտ և հանգիցէ , և յամենայնի
 զինչ և առնիցէ , սիրտ նորա ոչ մեկնի
 յԱստուծոյ : Զամենեսեան յորդորէ
 սէրն Աստուծոյ , ամենեցուն գովելի
 ընծայեցուցանէ զսէր Աստուծոյ . և

Թէ քանի՛ քաղցր է սէր Աստուծոյ, և քանի՛ չար և քանի՛ դառն սէր աշխարհիս, սրտիւ և բերանով և դործով յայտնի ցուցանէ ամենեցուն :

Ծիծաղի ընդ փառս աշխարհի • յանդիմանէ զհողս • և ցուցանէ Թէ ո՞ր քան է յիմարութիւն ապաստան լինել յիրս անցաւորս : Զարմանայ ընդ կուրութիւն մարդկան, որ սիրենն զնոսին : Զարմանայ ևս Թէ ո՞րպէս ոչ Թողուն ամենեքին զայս ամենայն անցաւոր և զգիւրասահ իրսդ : Ամենեցուն անոյշ կարծէ զայն՝ որ ինքեան համեղանայ • ամենեցուն հաճոյական՝ զոր ինքն սիրէ • և ամենեցուն իսկ յայտնի, զոր ինքն ճանաչէ : Ստէպ նկատող լինի Աստուծոյ իւրոյ, և ՚ի նորուն մտածութեան իբրև ՚ի տեսութեան՝ անուշակ տիտիանօք կազդուրի • և այնչափ առաւել զմայրմամբ, որչափ առաւել յաճախութեամբ : Ասան զի քաղցր է ՚ի խորհիւ, որ միշտ անոյշն է ՚ի սիրել և ՚ի գովել :

ԳԼՈՒԽ ԻԹ.

Խաղաղութիւն սրտի յՍատուած՝
սատուածաւ կըճոշեաւք .

Ճշմարտապէս այս է ճշմարիտ հան-
գիստ սրտի , յորժամ բողբոլինն 'ի
սէրն Աստուծոյ բեկուի տենչանօք : Եւ
ոչ այլում իմիք ցանկայ , այլ 'ի նմա՝
զոր պինդ ունի , երջանիկ իմն անուշու-
թեամբ քաղցրանայ , և քաղցրութեամբ
զուարճանայ : Ապա եթէ սնտաի իւր
մտածութեամբ , կամ զբաղանօք իրաց
առ փոքր մի քեցեցի անտի , անհնա-
րին ճեպով անդր դառնալ աճասպարէ ,
աքսորանս անձին համարեալ այլուր
երբէք գեգերիլ արտաքոյ նորա : Ասան
զի որպէս չիք վայրկեան , յորում ոչ
վայելեացէ կամ զմայլեսցի մարդ 'ի մար-
դասիրութեանն Աստուծոյ , սոյնպէս
չպարտի լինել վայրկեան՝ յորում չու-
նիցի զնա ներկայ յուշի իւրում :

Մորին աղագաւ ոչ ընդ թեթև յան-
 ցանօք է այն, որ միանգամ 'ի խօսելն
 ընդ Աստուած յաղօթս՝ փոյթ ընդ
 փոյթ վայրավատնի 'ի նորուն ներկա-
 յուլթենէ, իբր մեկնելով յաչաց նորա՝
 որպէս թէ ոչ տեսանիցէ կամ ոչ լուի-
 ցէ: Եւ այս լինի, յորժամ զհետ եր-
 թայ վատթար և տարագէտ խորհրդոց
 իւրոց, և նախապատիւ քան զնա առ-
 նէ զչնչին արարած՝ յոր դիւրաւ ցնդին
 հայեցուածք մտաց, այս է՝ շատ ևս ո-
 ռոճելով զայն 'ի միտս կամ խորհելով՝
 քան զԱստուած, զոր սլարտի անդա-
 դար յուշ ածել իբրև Արարիչ, եր-
 կիրպագանել որպէս Փրկիչ, յուսալ
 որպէս Կենագործիչ, և երկնչիլ որպէս
 'ի Դատաւորէ:

ԳԼՈՒԽ Լ .

Յադագս օտարանաւոյ յաշխարհե ,
 և մերձեկնաւոյ առ Աստուած .

Որ միանգամ սիրես զաշխարհ ,
 Տես թէ իցէ՞ն քնացքդ անվրթար .
 Եւ որ երթասդ ընդ այդ ուղի ,
 Ի մահառիթ և զարտուղի :

Արդ այսուհետե խոյս տուր ո՛վ մարդ
 առ փոքր մի 'ի զբաղմանց քոց այտի ,
 և թաքո զանձն քո յաղմկայոյզ խոր-
 հըրդոցդ : Ի բաց թօթափեա արդ ըզ-
 ծանրաբեռն հոգս , 'ի բաց դիր զտար-
 ժանաւոր երկպառակութիւնս . սպա-
 րապեա առ ժամանակ մի Աստուծոյ ,
 և սակաւ մի հանգիջիր 'ի նմա : Մուտ 'ի
 սենեակ սրտի քո , արտաքսեա զամե-
 նայն բաց յԱստուծոյ՝ և յորոց օգ-
 տենն 'ի խնդրել զնա , և դրօք փակե-
 լովք խնդրեա զնա : Արդ ասասցէ Աս-

տուժոյ սիրտ քո բոլոր • Խնդրեմ՝ զե-
րեսս քո, զերեսս քո տէր խնդրեմ՝:

Եւ արդ աղէ տէր Աստուած իմ, դու
ուստ զիմ սիրտ, թէ ո՛ւր և որո՞վ օրի-
նակաւ խնդրիցէ զքեզ, ո՛ւր և ո՞րպէս
գտանիցէ զքեզ: Տէր, եթէ չես աստա-
նօր, ուրանօր՝ ի բացականութեան ըզ-
քեզ խնդրեցից: Ապա եթէ ամենայն
ուրեք ես, զի՞ է զի ոչ տեսանեմ զքեզ
առաջիկայ: Բայց ստուգապէս բնակես
՚ի լոյս անմատոյց • այլ զիա՞րդ մա-
տեայց ՚ի լոյս անմատոյց: Կամ ո՞ ա-
ռաջնորդեսցէ ինձ և տարեալ կացու-
ցէ առնթեր լուսոյդ, զի տեսից զքեզ
՚ի նմա: Եւ դարձեալ՝ որո՞վք նշանօք,
և ո՞ր զիմօք զքեզ խնդրեցից: Ոչ տեսի
զքեզ երբէք տէր Աստուած, ոչ եր-
բէք ծանեայ զերեսս քո: Զի՞նչ ա-
լասցէ ո՞ բարձրեալդ տէր, զի՞նչ առ-
նիցէ տարաշխարհիկ այս քո վտարան-
դի: Զի՞նչ գործեսցէ ծառայ քո՝ անձ-
կացեալ ՚ի սէր քո, և հեռագոյն ընկե-
ցիկ յերեսաց քոյ: Ահաւասիկ յոգւոյ
եւրանէ տեսանել զքեզ, և երեսք քո
հեռի են յոյժ առ ՚ի նմանէ: Մերձե-

նալ առ քեզ փափաքէ, և անմերձե-
 նալի է բնակութիւն քո: Գտանել ըզ-
 քեզ ցանկայ, և անգիտանայ խնդրել
 զտեղի քո: Առ քեզ է տարփացեալ,
 և տգիտանայ զգէմն քո:

ԳԼՈՒԽ ԼԱ.

Չխաբոյ եղև մարդոյ կորուսանելոյ
 զԱստուած, և ընդպէս պարտ է խըն-
 դրել.

Տէր տէր, Աստուած իմ ես դու և
 տէր իմ, և ես ոչ տեսի զքեզ երբէք.
 դու ստեղծեր զիս, և նորաստեղծեր.
 և զամենայն զքո բարիս շնորհեցեր ինձ.
 և ես տակաւին ոչ տեսի զքեզ, և ոչ
 ծանեայ: Եւ սլարզաբար՝ եղեալ եմ
 ես առ 'ի զքեզ տեսանել, և ոչ ես ա-
 րարի ինչ, ոյր վասն արարայ: Ո՛վ ա-
 ւաղելի վիճակի մարդոյս, երբ կորոյս
 զայն ինչ, ոյր վասն եղև: Աւա՛ղ դառն
 և զժնդակ պատասխիցս, բա՛րէ, զի՛նչ

կորոյս, և զինչ եգիտ: Ձինչ գնաց, և զինչ մնաց: Կորոյս զերանութիւն, առ որ արարաւ. և եգիտ զթշուառութիւն, յոր ոչն արարաւ: Տեղի ետ գնաց այն, առանց որոյ ոչ դք երջանկանայ. և եկաց մնաց, որ ինքնին սոսկ չուառական է: Յայնժամ ուտէր մարդն զհաց հրեշտակաց, յորմէ սովեալ է այժմիկ. այժմ ուտէ զհաց ցաւոց, զոր յայնժամ անգիտանայր:

Ո՛վ դու տէր, մինչև յերբ մոռանաս իսպառ. մինչև յերբ դարձուցանես զերեսս քո՝ ի մէնջ: Ե՛րբ հայեցիս ՚ի մեզ, և լուիցես: Ե՛րբ լոյս տացես աչաց մերոց, և ցուցցես մեզ զերեսս քո. ե՛րբ տացես մեզ անդրէն ըզքեզ: Նայեաց տէր և լուր. և լոյս տուր մեզ, և ցոյց մեզ զանձն քո: Տուր մեզ անդրէն զքեզ, զի բարի լինիցի մեզ, առանց որոյ այսչափ չարիք անցանեն ընդ մեզ: Հրաւիրեա զմեզ, օգնեա մեզ, աղաչեմ, տէր: Դառնացաւ սիրտ իմ ՚ի լքման իւրում: Քաղցրացո զնա մը խիթարութեամբ քով, աղաչեմ տէր: Սովեալ անձամբ ելի ՚ի խնդիր քո. մի

արձակեր զիս նքթեալ առ 'ի քէն :
Քաղցեալ ոգևով մատեայ, մի մեկնե-
ցայց նօթի : Աղքատս առ ճոխդ եկի ,
ողորմելիս առ ողորմածդ . մի դարձայց
յեսս ունայն և ամաչեցեալ :

Կարկամեալ եմ տէր , և ոչ կարեմ
այլուր հայել , բայց 'ի վայր . ուղղեա
զիս , զի կարող եղէց 'ի վեր հայել կամ
միտ դնել : Անօրէնութիւնք իմ բարձ-
րացան քան զգլուխ իմ , ծածկեցին
զիս , և որպէս բեռն ծանր ծանրացան
'ի վերայ իմ : Շրջեա զիս , և թեթևա-
ցո 'ի բեռանցս , զի մի կափուսցէ 'ի վե-
րայ իմ գուբն զբերան իւր : Ուստ ինձ
խնդրել զքեզ , և ցոյց զքեզ խնդրո-
ղին . վասն զի ոչ խնդրել կարող եմ ,
եթէ ոչ դու ուսուսցես . և ոչ գաա-
նել , եթէ ոչ դու ցուցցես : Խնդրեցից
զքեզ փափաքելով , փափաքեցից քեզ
խնդրելով , գտից սիրելով , սիրեցից դը-
տանելով :

ԳԼՈՒԽ ԼԲ .

Բարոշքիւնն Սատուծոյ .

Խոստովան լինիմ՝ տէր և գոհա
 նամ, որ արարեր զես 'ի այն սրաակեր
 քո, զի յիշատակաւ քով՝ խորհեցայց
 զքէն, և սիրեցից զքեզ: Այլ այնպէս
 շաղախեալ է ապականութեամբ ախ
 տից, և այնպէս թխացեալ ծխով մե
 ղաց, մինչև անկարանալ առնել՝ վասն
 որոյ արարաւ, եթէ ոչ դու նորոգեսցես
 զնա 'ի նոր կերպարանս: Աղաչեմ տէր,
 որ տաս զգիտութիւն հաւատոց, տուր
 ինձ՝ որչափ և կարևոր դատիս, գիտել
 հաւատովք, զի դու ես՝ որպէս հաւա
 տամք, և այն ինչ ես՝ զոր հաւատամք:
 Ապաքէն հաւատամք զքեզ գոլ այն
 պիտի ինչ, քան զոր ոչ ինչ առաւելա
 գոյն կամ լաւագոյն մարթ է զմտաւ
 ածել: Արդ զինչ իցես տէր Աստուած,
 քան զոր ինչ մի մեծագոյն կամ լաւա

գոյն անհնար է երբէք ածել զմասւ ,
 եթէ ոչ այն ինչ , որ գոլով ծայրագոյն
 բարի ամենեցուն , և միայն ինքնագո-
 յակ անեղական , զայլն ամենայն ա-
 ըրար յոչնչէ : Արդ ո՞ր բարի պահասէ
 ծայրագոյն բարւոյն , որով է ամենայն
 բարի : Այսն որոյ դու ես արդար ,
 ճշմարիտ , երանելի , և որ ինչ այլ իցէ ,
 որոյ գոլն լաւ ևս է քան զոչն գոլ :

Բայց ո՞րպէս է , զի խնայես 'ի չարս ,
 եթէ ես բոլորովմբ ծայրագոյնս ար-
 դար : Թերևս զի անհասանելն է բա-
 րութիւն քո : Ծածկեալ է այդ 'ի լոյս
 անմատոյց , յորում բնակես : Ստու-
 գապէս 'ի խորագոյն և 'ի գաղտնագոյն
 խորս բարութեան քո ծածկեալ կայ
 աղբիւր , ուստի բղխեն հոսանք գթու-
 թեան քո : Այսն զի ուր բոլորովն և
 ծայրագոյն արդար ես , այլ տակաւին
 յայն սակս բարերար առ չարս գտա-
 նիս , վասն զի բոլորովն և ծայրագոյն
 բարի ես : Քանզի նուազ բարի լինէիր ,
 եթէ ոչ ումեք 'ի չարաց բարերար գը-
 տանէիր : Այսն զի բարեգոյն ևս է՝ որ
 բարեաց միանգամայն և չարաց է բա-

րի, քան որ բարեաց ևեթ է բարի: Եւ
բարեգոյն է՝ որ բարին է չարաց խնա-
յելով միանգամայն և պատժելով, քան
որ պատժելով ևեթ: Ապա ուրեմն
վասն այն ողորմած ես, վասն զի բոլո-
րովին և ծայրագոյն բարի ես:

ԳԼՈՒԽ ԼԳ.

Յաղագս զմայլեցոռցիչ փայլիցն
Սատուծոյ.

Ա՛յլ անսահման բարութեանդ, որ
այսպէս ՚ի վեր ես քան զամենայն տե-
տութիւն մտաց. եկեսցէ ՚ի վերայ իմ
ողորմութիւն քո, որ յայգպիսի հա-
րուստ ճոխութենէ յառաջագայի: Հեղ-
ցի յանձն իմ, որ զեղու յորդութեամբ
առ ՚ի քէն: Խնայեա պթութեամբ, զի
մի վրէժ խնդրիցես արդարութեամբ:
Արդ՝ զարթիր անձն իմ, և ուղղեա ըզ-
միտս քո ողջոյն, և խորհեաց ըստ քում
կարի, թէ որչափ և որպիսի իցէ բա-
րին այն, որ է Աստուած:

Զի եթէ մի մի 'ի բարեաց ախորժե-
 լքք են, քանի՞ ախորժ իցէ բարին այն,
 որ բովանդակէ զղուարճութիւնն ամե-
 նայն բարեաց: Եւ այն՝ ոչ որպիսի ա-
 ռաք զփորձ յեղականս, այլ այնչափ
 անզուգական, որչափ խտիր է ընդ ա-
 րարիչն և ընդ արարածս: Ասան զի ե-
 թէ բարի է կեանք արարածական, քա-
 նի՞ ևս բարի՝ կեանքն արարչական: Ե-
 թէ ցանկալի է փրկապործութիւնն,
 քանի՞ ևս ցանկալի փրկութիւն՝ որ ա-
 րարողն է ամենայն փրկութեան: Եթէ
 սիրելի է իմաստութիւնն 'ի խորհրդեան
 իրացն ծանուցելոց, քանի՞օն սիրելի է
 իմաստութիւնն՝ որ զամենայնն արար
 և հաստատեաց յոչնչէ: Միով բանիւ,
 եթէ բազմապատիկ և մեծամեծ են ա-
 խորժակք յիրս ախորժելիս, որպիսի
 և որչափ ախորժ իցէ 'ի նմա, որ արար
 զնոյն ախորժելիս: Բա՛բէ, որ միան-
 գամ վայելեսցէ 'ի բարիս յայս, զի՛նչ
 լինիցի նմա. զի՛նչ ոչ լինիցի ընդ նա:
 Յայտ է, թէ զոր ինչ ոչ կամի, ոչ լի-
 նիցի: Ասան զի անդ եղիցին նմա բա-
 րեք հոգւոյ և մարմնոյ, զոր ակն ոչ ե-

տես, և ունին ոչ լուաւ, և 'ի սիրտ
մարդոյ ոչ անկաւ:

ԳԼՈՒԻ ԼԴ.

Տենչ ծայրագոյն բարշոյ.

Արդ ո՛վ մարդ սնտաի, հիմ ընդ բա-
զումս յածիս վարանիս՝ խնդրելով ըզ-
բարիս հոգւոյ քո և զմարմնոյ: Սիրեա-
ղմի բարի, յորում են ամենայն բա-
րիք. և շատ է: Տենչա առ պարզապէս
բարի, որ է ամենայն բարի. և շատ է:
Ձի զինչ է, զոր սիրես մարմին իմ.
զինչ է, որում փափաքես հոգի իմ:
Անդ է՝ զոր ինչ և սիրես. անդ է՝ իմ
իմիք և փափաքես: Եթէ դեզ զուար-
ճացուցանէ, ծագեսցեն արդարք իբրև
զարեգակն: Եթէ արագութիւն կամ
կորովութիւն կամ ազատութիւն մար-
մնոյ՝ որում ոչ կարիցէ զդէմ ունել և
ոչ ինչ, եղիցին նման հրեշտակաց.
Վասն զի սերմանի մարմին շնչաւոր, և

յառնէ մարմինն հոգևոր, յայտ է թէ ըստ կարողութեան, և ոչ եթէ ըստ բնութեան :

Եթէ ցանկալի է յերկարութիւն քաջաւորը կենաց, անդ եղիցի ողջ յաւիտենականութիւն, և յաւիտենական ողջութիւն. զի արդարք յաւիտեան կեցցեն, և փրկութիւն արդարոց 'ի տեառնէ. եթէ յագուրդ, յագեսցին յերևիլ փառաց տեառն : Եթէ արբեցութիւն, արբեսցին 'ի պարարտութենէ տանն Աստուծոյ : Եթէ քաղցրաձայնութիւն, անդ զուարթունք միաբան երգեսցեն երգս անլուելիս Աստուծոյ : Եթէ որ և է փափկութիւն սուրբ, և ոչ անսուրբ, զուղիս փափկութեան տացէ նոցա տէր ըմպել : Եթէ իմաստութիւն, նա ինքն Աստուծոյ իմաստութիւնն ցուցցէ նոցա զինքն գլխովն զիսկն իմաստութեան : Եթէ բարեկամութիւն, սիրեսցեն զԱստուած առաւել քան զանձինս, և զմիմեանս որպէս զանձինս. և Աստուած զնոսա, քան թէ նոքա զանձինս. զի նոքա զնա և զմիմեանս նովաւ. իսկ նա զինքն և

զնոսա իւրեալ : Եթէ միաբանութիւն ,
ամենեցուն նոցա եղիցի կամք մի . զի
ոչ այլ կամք եղիցի նոցա , եթէ ոչ ծայ-
րագոյն կամքն Աստուծոյ :

Եթէ կարողութիւն , ամենակարող
եղիցին 'ի խնդիրս կամաց իւրեանց ,
որպէս Աստուած իւրումն : Ասան զի
որպէս Աստուած կարող է՝ զոր կա-
մի , իւրև , նոյնպէս կարողք եղիցին նո-
քա՝ զոր կամինն , նովալ : Ասան զի
որպէս նոքա ոչ այլ ինչ կամին , բայց
զոր նա կամի , սոյնպէս նա կամիցի՝ որ
զինչ նոքա կամիցին . և զոր ինչ կամինն
նոքա՝ անհնար է թէ ոչ լինիցի : Եթէ
պատիւ և մեծութիւն , Աստուած զիւր
ծառայս բարիս և հաւատարիմս կա-
ցուցէ 'ի վերայ բազում բարութեանց ,
զի և որդիք Աստուծոյ և աստուածք
անուանեսցին . և եղիցին ժառանգք
գլխովին Աստուծոյ , և ժառանգակիցք
Քրիստոսի : Ապա եթէ աներկեան ա-
պահովութիւն , այնպէս անքոյթ եղի-
ցին հաւաստեօք՝ թէ ոչ երբէք իւրե-
կրօք պակասիլ ունի յինքեանց բարին
այն , որչափ հաւաստի են՝ թէ ինքեանք

կամաւ իւրեանց ոչ ունին կորուսա-
 նել զայն, և ոչ Աստուած՝ որ սիրեացն
 զնոսա, ընդդէմ՝ կամաց նոցա բառնալ
 ունի զայն՝ ի սիրողաց իւրոց, և ոչ իսկ
 է ոք զօրագոյն քան զԱստուած, որ ո-
 րոշեսցէ ընդ Աստուած և ընդ նոսա :
 Իսկ խնդութիւն որպիսի և ո՞րքան ա-
 սիցես, ուր է այսպիսի և այսչափ բա-
 րի :

ԳԼՈՒԽ ԼԵ .

Սեր սրբոց առ միակեանս յերկինս .

Քեզ ասեմ՝ սիրտ մարդկային, սիրտ
 կարօտեալ, սիրտ փորձառու աղէտից
 և թշուառութեանց, մանաւանդ թէ
 ընկղմեալ ի թշուառութիւնս, քանի՞ խըն-
 դութիւն խնդայիր, եթէ սոքիմբք առհա-
 սարակ ճոխանայիր : Հարցըիր ցխորչս
 սրտի քո ցնեբքինս, եթէ կարող էին տա-
 նել ուրախութիւն իւրեանց ընդ այսչափ
 երանութիւն իւրեանց : Այլ անշուշտ ,

եթէ այլ ոք քո սիրական յամենայն սրտէ որպէս անձն քո՝ ունէր զայն երանութիւն, կրկնապատիկ լինէր քո ուրախութիւն • վասն զի ոչ նուազ ուրախ լինէիր ընդ նա՝ որպէս ընդ անձն քո : Ապա եթէ երկուք, կամ երեք, կամ ևս բազումք ունէին զնոյն, այնչափ յաճախութեամբ ընդ մի մի՝ ի նոցանէ խնդայիր, որպէս ընդ անձն քո, եթէ զմի մի ըստ անձին սիրէիր : Եւ արդ զինչ լինիցի յայն կատարեալ սէր անհամար հրեշտակաց և մարդկան, ուր ոք ոչ նուազ սիրէ զոք քան զանձն իւր : Զի ոչ այլազգ խնդասցէ իւրաքանչիւր ոք վասն այլոց իւրաքանչիւր՝ որպէս վասն անձին իւրոյ :

Արդ եթէ սիրտ մարդոյ դժուարաբաւական լինի տանել զխնդութիւն իւր ընդ մեծութիւն այնչափ բարութեանց անձինն, իբր բաւական լինիցի տանել զխնդութիւն անչափից զայնչափ : Եւ արդարև՝ որովհետև որչափ ոք զոք սիրէ, այնչափ խնդայ ընդ բարին նորա, զոր օրինակ յայնմ երանաւէտ երջանկութեան իւրաքանչիւր

ոք անհամեմատ օրինակաւ առաւել
 ունի սիրել զԱստուած քան զանձն
 իւր և քան զայլն առհասարակ ընդ
 իւր, սոյնպէս ևս՝ առաւել խնդասցէ
 անզուգական օրինակաւ ընդ երջան-
 կութիւնն Աստուծոյ, քան ընդ եր-
 ջանկութիւն իւր և այլոցն ամենեցուն
 ընդ իւր : Եւ եթէ զԱստուած այնպէս
 սիրեսցեն յամենայն սրտէ, յամենայն
 մտաց և յամենայն անձնէ, զի տա-
 կաւին սիրտն ամենայն և միտքն ամե-
 նայն՝ և անձն ամենայն անբաւական
 գտանիցի առ չափ արժանեաց սիրե-
 լոյն, ասլա անշուշտ այնպէս խնդաս-
 ցեն յամենայն սրտէ, յամենայն մտաց
 և յամենայն անձնէ, զի տակաւին սիրտն
 ամենայն և միտքն ամենայն՝ և անձն ա-
 մենայն, անբաւական գտանիցին առ
 լիութիւն խնդութեանն :

ԳԼՈՒԽ ԼԶ .

Անպատուով խնդրոչքիւն կենացն յաշիտենից, և ընտանուչքիւն սիրոյ ընդ Աստուծոյ .

Աստուած իմ և տէր իմ, յոյս իմ և ուրախութի սրտի իմոյ, ասա ցանձն իմ եթէ այս է ուրախութիւնն այն, զորմէ ասացերն մեզ 'ի ձեռն միածնի քո . խնդրեցէք և աւնուցուք, զի ուրախութիւն ձեր լցեալ եղիցի : Ասան զի գտի աւասիկ ուրախութիւն ինչ լիուլի և ծայրալիր : Լի սրտիւ, լի մտօք, լի անձամբ, լի լրութեամբ մարդոյն . և տակաւին 'ի վերայ այսր ուրախութեան կայ մնայ գերածայրեալ ուրախութիւն : Ապա ուրեմն ոչ բովանդակն այնր ուրախութեան ընդամտանիցէ յուրախացեալս անդր, այլ բովանդակապէս ուրախացեալքն մտանիցեն յուրախութիւն քո՝ տեառն իւրեանց :

Ասա աէր, ասա ծառայի քում ներ-
քուստ 'ի սրտի խմում, եթէ այս է ու-
րախուծիւնն, յոր մտանիցեն ծառայք
քո, որք մտանենն յուրախուծիւն
տեառն իւրեանց: Այլ գիտեմք, զու-
րախուծիւնն զայն՝ որով ուրախ լինի-
ցին ընտրեալք քո, ահն ոչ ետես,
ունկն ոչ լուաւ, և 'ի սիրտ մարդոյ ոչ
անկաւ: Ապա ուրեմն չև ևս ածի զմը-
տաւ կամ ասացի. Տէր, որչափ ուրախ
լինիցին ընտրեալք քո: Ապաքէն այն-
չափ խնդացեն, որչափ սիրեսցեն. և
այնչափ սիրեսցեն, որչափ զքեզ ծա-
նիցեն, աէր: Եւ որչափ արդեօք սի-
րեսցեն: Արդարև ահն ոչ ետես, և ոչ
ունկն լուաւ, և 'ի սիրտ մարդոյ ոչ
անկաւ յաստի կեանս, թէ որչափ ծա-
նիցեն և սիրեսցեն զքեզ յանտի կեանս:

Արդ խնդրեմ 'ի քէն Աստուած իմ,
զի ծանեայց զքեզ, սիրեցից զքեզ, որ-
պէս զի խնդացից ընդ քեզ: Եւ եթէ
չկարեմ 'ի կեանս յայս լիովին, գէթ
յառաջադէմ եղէց օր քան զօր, մինչև
եկեսցէ լրումն այն: Յառաջադէմ լիցի
յիս աստանօր ճանաչումն քո, զի անդ

Եղիցի լիակատար : Աճեացէ յիս աս-
 տանօր սէր քո , զի անդ եղիցի լիակա-
 տար : Արտէս զի աստ ուրախութիւնն
 իմ իցէ յինքեան մեծ , և անդ 'ի քեզ
 լցեալ : Աստուած անսուտ , ժառմաւ
 նու՛ զոր խոստանասդ , զի ուրախու-
 թիւնն իմ լցեալ եղիցի : Առ այժմ զայն-
 մանէ խորհեացին միտք իմ , զայնմանէ
 խօսեսցի լեզու իմ , զնոյն սիրեսցէ սիրա
 իմ , և բարբառեսցի բերան իմ : Ի նոյն
 քաղցիցէ հողի իմ , 'ի նոյն ծարաւեսցի
 մարմին իմ . նմին փափաքեսցէ բովան-
 դակ գոյացութիւն իմ , մինչև մտից
 յուրախութիւն տեառն իմոյ , ուր կայ
 մնայ ինձ կալ մնալ յաւիտեանս :



Ց Ա Ն Կ

Ա • Յաղագս անպատում քաղցրութեանն Աստուծոյ . . .	1
Բ • Յաղագս թշուառութեան և տկարութեան մարդկան . . .	8
Գ • Յաղագս սքանչելի աստուածեղէն լուսոյ	14
Դ • Յաղագս մահկանացու բնութեան մարդկան	16
Ե • Զինչ իցէ յոչեութիւն դառնալ	19
Զ • Յաղագս գայթաղելոյ հոգւոյն 'ի մեղս	23
Է • Յաղագս բաղմադէմ բարերարութեանցն Աստուծոյ . . .	26
Ը • Յաղագս արժանաւորութեն մարդոյ հանդերձելոյ . . .	30

Թ.	Յաղագս ամենիշխան զօրու- թեանն Աստուծոյ	35
ժ.	Յաղագս գովութէն Աստու- ծոյ որ 'ի վեր է քան զմիտս .	37
ժԱ.	Յաղագս վստահութեան առ Աստուած	41
ժԲ.	Յաղագս որոգայթից ցան- կութեանց	43
ժԳ.	Յաղագս մարդկային թշուա- ռութեան, և բարերարու- թեանցն Աստուծոյ	47
ժԴ.	Նայի Աստուած յամենայն ժամ 'ի գործս և 'ի խոր- հուրդս մարդկան	52
ժԵ.	Զի մարդ չէ իմիք բաւական առանց աստուածատուր շը- նորհաց	57
ժԶ.	Յաղագս դիւին և բազմադէմ փորձութեանց նորա	62
ժԷ.	Թէ Աստուած լոյս է արդա- րոյ	66
ժԸ.	Յաղագս բարերարութեանցն Աստուծոյ	71
ժԹ.	Յաղագս եռանդեան սիրոյ .	77
Ի.	Յաղագս նուաճելոյ Աստու-	

	ծոյ զամենայն ինչ ընդ ծա	79
ԻԵ.	Յաղագս յուշ ածելոյ զա ռաւելու[թի երկնաւոր խոր հըրդոց՝ի քննու[թեան ժա մանակաւոր բարեացս . . .	82
ԻԲ.	Յաղագս ՚ի բաց բառնալոյ աս տուածային քաղցրու[թեան զամենայն զգառնու[թի աս տի կենցաղոյս	85
ԻԴ.	Յաղագս զի յԱստուած հաս տատել արժան է զամենայն ակրնկալու[թի մեր եւ զիղձս սրտի	89
ԻԴ.	Թէ յԱստուծոյ է փրկու [թիւն մեր	91
ԻԵ.	Յաղագս տկարու[թե մարդ կային կամաց առ ՚ի բարին՝ առանց աստուածային շնոր հաց	94
ԻԶ.	Յաղագս նախնի բարերարու [թեանց Աստուծոյ	96
ԻԷ.	Յաղագս հրեշտակաց՝ի պահ պանու[թիւն մարդկան կար գելոյ	98

- ԻԸ. Յաղագս խորին նախասահ
մանութե և նախադիտու
թեան Աստուծոյ 103
- ԻԹ. Յաղագս որոց յառաջնուն
արդարք գոլով գառնան
յամբարչտութիւն, և որոց
ընդ հակառակն 107
- Լ. Թէ տաճար է Աստուծոյ հո
գի հաւատացեալ 110
- ԼԱ. Թէ չէ մարթ գտանել զԱս
տուած զգայութիք ներք
նովք կամ արտաքնովք . . . 112
- ԼԲ. Յաղագս խոստովանութեան
ճշմարիտ հաւատոյ 124
- ԼԳ. Խոստովանութի անձին թը
չուառութեան 132
- ԼԴ. Խոկունն աստուածային մեծ
վայելչութեան 135
- ԼԵ. Յաղագս ցանկութեան և ծա
րաւոյ հոգւոյն առ ԱՃ 139
- ԼԶ. Յաղագս փառաց վերին հայ
րենեաց 147
- ԼԷ. Աջութք առ երրորդութիւն
սուրբ 152

ՆՈՐԻՆ

ՍՐԲՈՅՆ ԱԻԳՈՍՏԻՆՈՍԻ

ԱՌՁԵՌՆԱԿԱՆ

Ա.	Յաղագս սքանչելի խսկութեան և ներկայութեանն Աստուծոյ	159
Բ.	Յաղագս անճառ գիտութեան, և սեպուղիքն Աստուծոյ	161
Գ.	Յաղագս տենչանացաստուած ծխանց հոգւոյ	164
Դ.	Թէ որպէս պարտ է սիրել, և խնդրել զՏէր	167
Ե.	Տենչ հոգւոյ	169
Զ.	Երջանիկ վիճակ հոգւոյ ար- ձակելոյ յերկրաւոր բան- տէս	172
Է.	Բերկրապատար վիճակ երկ- նից արքայութեան	175
Ը.	Դարձեալ վասն արքայութեան	177
Թ.	Աստուածային միութարու-	

	Թիւնք յետ ԹախծուԹեց ողոյ սգաւորի	179
Ժ .	ՔաղցրուԹիւն սիրոյն Աս- տուծոյ	181
ԺԱ .	Յաղագս խորհրդոյ փրկա- գործուԹեան, և հաղորդու- Թեան	183
ԺԲ .	Հոգեզուարճ խնդուԹիւն .	185
ԺԳ .	ՄարդեղուԹիւն բանին խա- րխա յուսոյ մերոյ	187
ԺԴ .	Քաղցր յիշատակ Աստուծոյ .	188
ԺԵ .	Իղճ կրեւոյ զնեղուԹիս վասն Քրիստոսի	191
ԺԶ .	Զիարդ լինի ստանալ զար- քայուԹիւն	193
ԺԷ .	Վիճակ արքայուԹեան	194
ԺԸ .	Թէ չունիմք ինչ փոխարինեւ Աստուծոյ բաց 'ի սիրոյ	198
ԺԹ .	Աստուած պահանջէ 'ի մեզ զիւր նմանուԹիւն ըստ սի- րոյ	200
Ի .	Վիճակ հոգոյ աստուածա- սիրի	202
ԻԱ .	ՄարդասիրուԹիւնն Աստու- ծոյ	205

ԻԲ.	Յիշատակ վերաց փրկչին	207
ԻԳ.	Զօրութիւնք սքանչելի վերաց փրկչին	209
ԻԴ.	Խորհրդածութիւն սիրոյն Քրիստոսի	211
ԻԵ.	Բաղձանք սրտից մերոց առ ծայրագոյն բարին, և զօրութիւն կամաց	214
ԻԶ.	Ճանաչումն ճշմարտութե	216
ԻԷ.	Ներգործութիւնք Հոգւոյն սրբոյ	219
ԻԸ.	Աստուածսիրութիւն	221
ԻԹ.	Խաղաղութիւն սրտի յԱստուած՝ աստուածամերձութեամբ	223
Լ.	Յաղագս օտարանալոյ յաշխարհէ, և մերձենալոյ առ Աստուած	225
ԼԱ.	Զիարդ եղև մարդոյ կորուսանել զԱստուած, և ո՞րպէս պարտ է խնդրել	227
ԼԲ.	Բարութիւնն Աստուծոյ	230
ԼԳ.	Յաղագս զմայլեցուցիչ վայելիցն Աստուծոյ	232
ԼԴ.	Տենչ ծայրագոյն բարւոյ	234

- 1.6. Սէր սրբոյ առ միմեանս յերկինս 237
- 1.2. Անպատում խնդութիւն կէնացն յաւիտենից, և ընտանութիւն սիրոյ ընդ Աստուծոյ 240



ՀՀ Ազգային գրադարան



NL0694604

